

Milik Departemen P.dan K  
Tidak diperdagangkan  
Untuk umum

# Hikayat Bangta Kumari 2

Ramli Harun

Direktorat  
Kebudayaan

Departemen Pendidikan dan Kebudayaan

09.2242  
KAH  
Milik Dep. P dan K  
Tidak diperdagangkan

# HIKAYAT BANGTA KUMARI 2

Alih Aksara  
RAMLI HARUN

DIREKTORAT KESENIAN	
SUB. DIREKTORAT PENGEMBANGAN	
APREKASI DAN PRESTASI SENI	
Seksi Dokumentasi	
Klas / Kole	Induk
DPE	1134/85
1134	Tarikh
85	Paraf
14 DES. 1985	
Paraf : Mrs	

Departemen Pendidikan dan Kebudayaan  
PROYEK PENERBITAN BUKU SASTRA  
INDONESIA DAN DAERAH  
Jakarta 1984

**Diterbitkan oleh  
Proyek Penerbitan Buku Sastra  
Indonesia dan Daerah**

**Hak pengarang dilindungi undang-undang**

## KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1984

Proyek Penerbitan Buku Sastra  
Indonesia dan Daerah

## **KATA PENDAHULUAN**

Seperti dalam kata pengantar Hikayat Nabi Yusuf dan Hikayat Nabi Sulaiman, Ishak Peutua Gam dari Meureudu selain menyalin hikayat-hikayat Aceh juga telah mengarang sendiri beberapa hikayat Nabi. Naskah Hikayat Bangta Kumari ini merupakan hasil salinannya dari naskah lama. Menurut pengakuannya, di beberapa tempat ia telah merubah susunan kata-katanya. Hal ini dilakukan ada kalanya disebabkan naskah aslinya sudah tidak terang lagi ataupun karena menuruti selera bahasanya sendiri. Namun ia tidak merubah jalan ceritanya.

Naskah setebal 330 halaman dan berukuran 21 X 16 cm ini, kami dapati di rumah penyalinnya sendiri bulan Agustus 1983. Tulisannya jelas dan bahasanya cukup baik. Tiap halaman terdiri dari rata-rata dua puluh dua baris. Kami alih aksarakannya ke dalam huruf Latin sebagaimana adanya, dengan membaginya menjadi dua jilid, serta ringkasan ceritanya dalam bahasa Indonesia.

Oleh karena jalan cerita dalam jilid pertama lebih padat dibandingkan dengan jilid dua, maka ringkasan cerita dalam jilid dua pun lebih sedikit.

Tema ceritanya banyak persamaannya dengan beberapa hikayat Aceh lainnya. Keadaan saling pengaruh dalam hikayat-hikayat Aceh kiranya akan menjadi bahan pembicaraan yang menarik bagi pengamat kesusastraan daerah.

Jakarta, 28 Mei 1984

**Ramli Harun**

**RINGKASAN  
HIKAYAT BANGTA KUMARI  
JILID II**

Bangta Kumari memanggil dua anak raksasa di Biwan Lama yang telah diberi nama masing-masing Silasiman dan Silanaga untuk membantunya melawan Raja Sakdon Lila. Dengan burung bayan sebagai penunjuk jalan kedua raksasa muda sampai di Hindustan. Bangta Kumari berpesan supaya mereka tidak membunuh. Dimintanya supaya Datok Menteri dan Menteri Tok Labala ditangkap dan dibawa kehadapannya. Dalam waktu singkat kedua orang menteri itu sudah berada di hadapan Bangta Kumari. Mereka meminta ampun dan berjanji akan menemui raja untuk diminta berdamai. Keduanya dilepaskan dan tak lama kemudian kembali lagi dengan membawa pesan bahwa perang telah dihentikan dan baginda raja merestui pernikahan Bangta Kumari dengan Putri Rakna Keumala.

Setelah pernikahan Bangta Kumari dengan Putri Kakna Ku-mala berlangsung, armada Bangta Silah kembali ke Yaman. Mereka singgah di Biwan Lama. Di sana diadakan upacara peresmian pernikahan Bangta Sawang dengan Putri Din Syarifah yang sudah lama ditinggalkan. Sesudah itu armada Yaman meneruskan perjalanan. Bangta Sawang juga turut serta.

Di Dusun Yaman, Bangta Sawang menyamar sebagai seorang pengemis, sehingga tidak seorang pun menegurnya, termasuk pamannya sendiri Teuku Keujrueñ. Pamannya pernah merampas harta peninggalan ayahnya. Dimintanya supaya ia segera mengembalikannya. Sesudah dikembalikan, dua pertiga dari hartanya diwakafkan dan sepertiga dihadiahkan kepada pamannya itu.

Dua bulan kemudian Bangta Sawang dan Bangta Kumari kembali ke negeri isterinya masing-masing. Kemudian Bangta Sawang diangkat menjadi Raja di Biwan Lama menggantikan Raja Batukiah. Bangta Kumari pun diangkat pula sebagai raja di negeri Hindustan menggantikan mertuanya yang sudah tua.

Ketika negeri Hindustan sedang jaya-jayanya, suatu malapetaka datang menimpa. Seorang raja dari negeri Cina dengan armada-nya yang besar datang dengan tujuan hendak merebut Putri Rakna Keumala. Dalam pertempuran melawan pasukan Cina, Bangta Kumari dapat menewaskan seorang panglima Cina terkenal bernama Mando Silan. Raja Cina segera memanggil Raja Pupot yaitu adiknya yang sangat ditakuti karena keberaniannya. Sementara itu Bangta Kumari telah memanggil Bangta Silah bersama Putri Lason dari Yaman dan Bangta Sawang serta Din Syarifah dari Biwan Lama. Juga dipanggilnya Silasiman dan Silanaga.

Ketika Raja Pupot datang peperangan pecah lagi. Silanaga dan Silasiman dapat menewaskan tiga dari lima panglima Cina yang gagah berani. Atas desakan Raja Cina seorang ahli sihir membuat Bangta Kumari dan Bangta Sawang serta Bangta Silah tidak berdaya. Demikian pula dengan Silanaga dan Silasiman. Kellimanya kena sihir. Akan tetapi Putri Rakna Keumala, Putri Lason dan Putri Din Syarifah dengan memakai pakaian suami mereka masing-masing terjun ke medan perang melawan musuh. Ketika Rakna Keumala hendak membunuh Raja Cina, pedangnya patah. Ia kembali ke istana hendak mengambil pedang lain. Tetapi sayang ia dapat dikenali oleh Raja Cina dari suaranya. Dengan serta merta Rakna Keumala ditangkap. Atas permintaannya sendiri ia dimasukkan kedalam sebuah peti kaca. Seluruh angkatan perang Cina berlayar pulang ke negrinya dengan membawa Putri Rakna Keumala.

Bangta Kumari bersama dengan kedua temannya dan Silasiman serta Silanaga telah pulih kembali. Mereka mendapat kabar dari Putri Lason dan Din Syarifah bahwa Rakna Keumala telah dibawa ke negeri Cina. Maka sebuah armada yang besar segera bertolak ke negeri Cina menyusul putri. Sampai di sana armada Bangta Kumari langsung menyerang kubu-kubu pertahanan raja Cina di tengah malam. Serangan mendadak itu membuat pertahanan Cina kucar-kacir dan seluruh pasukan Bangta Kumari mendarat. Raja Cina yang tidak beragama itu diminta untuk me-

nyerahkan putri, sebelum negerinya dihancurkan. Raja Cita tidak menyerah karena dua orang pahlawannya yaitu Panglima Kha dan Tok Pang Lumpoe mendesaknya untuk melawan. Maka terjadilah pertempuran seru didaratan Cina. Kedua Panglima tersebut akhirnya tewas. Raja Pupot turut membantu. Ia menggunakan ilmu sihir, namun kesaktian Bangta Kumari membuatnya tidak berdaya. Dalam suatu pertarungan bersenjata ia dapat ditewaskan oleh Bangta Kumari dan kawan-kawannya. Melihat adiknya tewas raja Cina nekad menghadapi Bangta Kumari yang sudah mencapai pertahanan terakhir di istana. Pertempuran satu lawan satu berlangsung seru. Dengan dibantu oleh Bangta Sawang dan Silasiman serta Silanaga, Bangta Kumari akhirnya dapat menamatkan riwayat raja yang hendak merebut isterinya.

Dengan tewasnya raja Cina perang usai dan Putri Rakna Keumala selamat. Armada Bangta Kumari pulang ke negerinya masing-masing. Negeri Hindustan menjadi sebuah negeri yang aman dan makmur berkat pimpinan Bangta Kumari. Ajaran agama dilaksanakan dengan sebaik-baiknya sehingga ia sangat dicintai oleh rakyatnya.

**HIKAYAT  
BANGTA KUMARI  
2**

**HIKAYAT  
BANGTA KUMARI  
II**

**BISMILLAHIRRAHMANIRRAHIM**

Ie unoe di dalam kaca  
Lam piala minyeuk sapi  
Bak simalam Rakna Bangta  
Leumah kira dalam ate

Ka nam buleuen ulon meuprang  
Talo meunang hana meuri  
Meunyo meunoe akhe teulah  
Mate ayah Putroe Siti

Keu peue guna lon tueng putroe  
Jiprang nanggroe singoh lagi  
Hana meunan kadang meunoe  
Lon bak putroepi ka beunci

Sabab di jih mate ayah  
Lon jimarah hana sakri  
Pakri jinoe mita ilah  
Yoh nyan sosah Bangta Kumari

Teuma leumah dalam ate  
Meunoe pike Bangta ahli  
Bah lon meuhei Silasiman  
Bandua nyan nyang beurani

Keumah pike deungon pakat  
Peugot surat uleh doli  
'Oh lheueh ase peugot surat  
Neuheu leugat bayeuen juhari

Wahe ulon nyang seutia  
Jinoe sigra kapeureugi  
Deungon surat saboh kaba  
U Biwam Lama he juhari

Kajok ubak Silasiman  
Ulon tuan ka peugah kri  
Dalam surat nyo habaran  
Mangat han ban narit ini

He Silasiman adek badan  
Gaseh sayang abang Kumari  
Ulon jinoe di dalam prang  
That sukarana hana sakri

Nibak nanggroe nyan Hindustan  
Ulon tuan ka jitaki  
Meuna gaseh deungon sayang  
Adek badan beutro ili

Tacok ulon di dalam prang  
Bek jitawan lon he akhi  
Lam buleuen nyoe beutroh datang  
Adek badan nyang juhari

Nyankeu haba dalam surat  
Haba mangat hana sakri  
Bayeuen deungo neuyue intat  
Jicok leugat jipeureugi

Jipo laju bayeuen rimba  
Bak ulama ahlus sufi  
Bak Beurahaman jipeuteupat  
'Oh troh leugat jibeureunti

Silasiman sinap teutap  
Bak teumpat guree juhari

Silasiman Silanaga  
Jinok sigra surat ini

Jibeuet laju teuma yoh nyan  
Jideungo nyan narit doli  
Laju jimoet jisayang  
Di dalam prang Bangta Kumari

Ubak teungku jijak pantah  
Ate sosah hana sakri  
Ubak teungku jijok surat  
Jikheun teupat ubak syekhi

Yoh nyan teungku neueu surat  
Meufom hajat Bangta Kumari  
Teuma neukheun lon paban bah  
Han peue salah jak peureugi

Jibeudoh le teuma pantah  
Ka jiseumbah teungku sufi  
'Oh lheueh idin nibak teungku  
Jitren laju han le lanti

Bandua jih ka troh u leuen  
Deungon bayeuen sajan ili  
Silasiman Silanaga  
Bandua jijak u pasi

Bayeuen jipo di udara  
Silanaga jak ngon gaki  
Troph u pasi ka na sampan  
Bandua nyan mangat ate

Laju jiek dalam sampan  
Pelayaran malam hari  
Padum lawet peulayaran  
Sampoe tuan bak Kumari

Troph bak nanggroe Hindustan  
Tamong keu nan le u pasi  
Jiteungoh le troh u darat  
Jak leugat bak Bangta ahli

Cicem bayeuen nyang jak dilee  
Jak peuteuntee pat Kumari  
Ka troh keu nan dalam kuta  
Hana Bangta nyang juhari

Sideh laloe di dalam prang  
Han tom reunggang meusihari  
Teuma seupot le ngon uroe  
Banalhee droe laju keumbali

Deungon rakyat meuploh katoe  
Dum jak woe lam kuta pasi  
Bangta neuwoe troh lam kuta  
Silanaga com di gaki

Ureueng lhee droe ka jiseum bah  
Marit pantah Siman ahli  
Deelat ampon po meukuta  
Keu peue hamba neuyue ili

Teuma seuot Rakna Bangta  
He adekda deungo kami  
Nyang lon peusan gata adoe  
Lon prang nanggroe raja doli

Lon meuhajat meung tueng putroe  
Wahe adoe jinoe pakri  
Singoh uroe gata meuprang  
Gantor abang meusihari

Kuta meuligoe taprang singoh  
He adoe jroh nyang juhari  
Bandum ureueng bek tapoh-poh  
Takalon toh nyang beurani

Tok Labala tadrop sidroe  
Datok Meuntroe teuma lagi  
Nyankeu dua taboh taloe  
He adoe gaseh keu kami

Meunan pakat po samlakoe  
Beungoh uroe prang mulai

Bangta Silahpi ka meuprang  
Bangta Sawang Bangta Kumari

Silanaga Silasiman  
Limong gop nyan that beurani  
Geuk laju u mideuen prang  
That guransang hana sakri

Nyang rot rajapi ka geuek  
Surat deumpek dum sipai  
Pahlawan nyang tarek-tarek  
Peudeueng leuntek nibak jari

Raja Sakdanpi ka neujak  
Geupeusak beude Turuki  
Ka meuteumeung dua pihak  
Geumeutak hana beureunti

Tok Labala ngon Tok Meuntroe  
Bandua droe sang keudidi  
Beurani that bandua droe  
Pantah bagoe rajawali

Meucron keu deh meucron keu noe  
Meusogumoe hana sakri  
Uroë nyan prang that klam-kabot  
Uroe seupot han taturi

Surak deumpek miseue ribot  
Kalang-kalot han tatkri  
Uroe nyan prang that meuguncang  
Hana ranggang siat lanti

Rakna Bangtapi ka meucang  
Peudeueng panyang nibak jari  
Silasiman jidong keudroe  
Hana sapeue jipadoli

Jitanyong toh Datok Meuntroe  
Bandua droe nyang beurani  
Peugah bak lon jinoe rijang  
Ureueng tungang nak kuturi

Rakna Bangta seuot rijang  
Jeh rot Tunong rot wie kami  
Tok Labala nyang rot uneun  
Meunan neukheun Bangta Kumari

Silannaga laju peutor  
Bak Tok Meuntroe jipeurab le  
Teuma jidrop nibak jaroe  
Jikheun meunoe narit keuji

He Tok Meuntroe bek meulawan  
Silasiman han taturi  
Bit daruet nyoe jimeulawan  
Kupeh kaman ubak bumi

Hana guna kameulawan  
'Oh kureugam klik meu'i-i  
Bandua droe ka jireugam  
Lagee bang-bang nibak jari

Bek le kaklik he Tok Meuntroe  
Hana paloe kah ngon kami  
Kah han kupoh bandua droe  
Kajak jinoe kuta pasi

Kupeuwoe kah bak sulotan  
Raja laman Bangta Kumari  
Bandua droe jiba sajan  
Keu deh rijang kuta pasi

Silanaga saboh sagoe  
Na siploh droe ka jirapi  
Panglima prang keujruen meuntroe  
Pahlawan nyoe nyang beurani

Uleebalang nyang seureuloe  
Jipeuwoe lam kuta pasi  
Rakna Bangtapi ka neuwoe  
Lam kuta droe neukeumbali

Sira geuwoe deumpek surat  
Sang meuhayak donya ini

Geuhei sare deungon surak  
Ate galak dum sipai

Abeh jiwoe bandum rakyat  
Meusapat lam kuta pasi  
Bansinaroe ka meusapat  
Rakyat-rakyat doli-doli

Tok Labala ka lam ikat  
Dua meuhad nyang beurani  
Jinoe ulon balek ayat  
Sang-sang han mangat lagee nyoe le

Bah lon balek dilee siat  
Deungo sahbat bandum sare  
Timoh di gle kayee jatoe  
Lam nanggroe timoh bak jeumpa

'Oh lheueh jidrop Datok Meuntroe  
Raja nanggroe sosah raya  
Neumeung seutot jak cok pulang  
Tan pahlawan nyang kuasa

Ingat Bangta that pahlawan  
Sulotan gadoh bicara  
Tan beurani baranggasoe  
Geupeuwoe laju lam kuta

Troh lam kuta ka geupeuwoe  
Aduen adoe sisyeedara  
Sangat sosah raja nanggroe  
Dua meuntroe ka gop hila

Teuduek siat raja nanggroe  
Lon hareutoe Rakna Bangta  
Neucok rante laju yoh nyan  
Ikat rijang ureueng dua

Balah dilee lon karante  
Kupoh mate kah bandua  
Bek kakeubah he Lasiman  
Balah laman dilee masa

Balah ulon yoh saboh roe  
Tapoh jinoe uleh gata  
Silasiman yoh nyan teukhem  
Pakri dalem kupoh gata

Kupoh gata nyawong ka len  
Lheueh nyan dalem kupoh raja  
Weueh that ate lom ngon malee  
Raja kee gata enaya

Jipeuayang balah dilee  
Jinoe teuntee gata fana  
He Tok Meuntroe pakri lagee  
Masa dilee tadrop Bangta

Meukon geutueng keu meulinnee  
Hana bak kee dua cita  
Meunan neukheun po samlakoe  
Peubeungeh droe pura-pura

Teuma seuot Datok Meuntroe  
Deungon jaroe di jeumala  
Deelat ampon tuanku droe  
Gata sidroe meulinnee raja

Meuhan geutueng judo putroe  
Ulonteu nyoe kuprang raja  
Asai tuanku peulheueh kamoe  
Ulon jinoe nyang yue rela  
  
Neuploh rijang he pangulee  
Bek that malee ulon hamba  
Meunyo ubah ban lon kheun nyoe  
Neudrop dudoe neutueng nyawa

Barangian ase neupeubuet  
Kamoe ubeut droeneu raya  
Meunan neukheun Datok Meuntroe  
Neuyue jak woe uleh Bangta

Geuploh rante bandua droe  
Laju geuwoe Tok Labala

**Bandua ngon Datok Meuntroe  
Laju geuwoe troh bak raja**

'Oh sare troh keu deh geuwoe  
Marit meunoe deungon raja  
Ampon tuanku payong nanggroe  
Neungo kamoe po meukuta

Neutueng Bangta keu meulintee  
Yoh goh malee poteu raja  
Meukon meunan he pangulee  
Dudoe teuntee raya bala

Reuloh kuta deungon mideuen  
Deungon sijeuem ek seureupha  
Hom hai Datok ban gata kheun  
Nibak ulon han troh juga

Teuma raja kheun lom pantah  
Tok meutuah deungo hamba  
Ubak Bangta tajak peugah  
Han peue salah ulon rela

Beugot uroe buleuen leumah  
Putroe indah lon boh gaca  
Keurija nyoe bek rayek le  
Ubat beude di lon hana

Ubak raja keu deh takheun  
Tujoh buleuen tapeumada  
Keu jeunamee ban nyang mudah  
Meuh nyang mirah dua gunca

Meule jiba raya sosah  
Dudoe teulah saboh masa  
Meunan lon kheun jakleh peugah  
Buleuen ieumah phon keurija  
Datok Meuntroe beudoh pantah  
Geumeulangkah ubak Bangta  
'Oh troh keu deh ka geupeugah  
Hana ubah ban kheun raja

Bangta deungo meunan ulah  
Ate dahsyah suka cita  
Teuduek haba po samlakoe  
Raja nanggroe lon calitra

Suroh raja ubak meuntroe  
Dum sinaroe neuyue peuna  
Takrah rakyat dalam nanggroe  
Ulon jinoe meukeurija

Tayue beutroh dum sinaroe  
Si nyak putroe lon bri jeumba  
Peugot teumpat meupeurasan  
Di dalam blang luah raya

Ka geupeugot ngon bantayan  
Meuatoran jroh meubanja  
Ngon peurasan meuribee ban  
Tambo geundrang han ek kira

Peue nyang napsu taeu sinan  
Dum peurasan dalam kuta  
Saman inong saman agam  
Tari wayang leupah gura

Lon nyang kalon galak han ban  
Han sapeue tan taeu rupa  
'Oh ban ase wahe adoe  
Tango jinoe he adekda

Lam kuta nyan ureueng binoe  
Limong ploh droe laen hana  
Nyang peh gaca dara baro  
Bandum taeu aneuk dara

'Oh takalon tahe gante  
Bungong kundo muda-muda  
Bak nam uroe dilee janji  
Bangta Kumari geuboh gaca

Bak malam nyan jroh han sakri  
He akhi peurasan donya

Cantek maneh mudawangsi  
Jinari nyang muda-muda

Han ek peugah wahe akhi  
Dan lagi peurasan raya  
Hana teudoh jimeunyanyi  
Su rapai mangat raya

Jimeupanton jimeunari  
Jaroe gaki crang-cring geunta  
Soe nyang kalon ate beureuhi  
Jaroe gaki gleueng suasa

Nyang su suleng deungon bangsi  
Meu'i-'i han ek takira  
Watee malam supot uroe  
Meupadoe tanglong meugisa

Dum jipasang panyot kande  
Sipai nyang jaga-jaga  
'Oh kureueng hu tango kiroh  
Minyeuk jiboh hana reuda

Langet bumoe hu seumeuloh  
U jeuoh leumah meucahya  
Bungong apui hana teudoh  
Seun sireutoh jitet lanja

Troh u langet hu seumeuloh  
Jitet sunggoh han jikira  
Meusimalam hana teudoh  
He adek beh got that gura

Boh beuleuhak hu seumeuloh  
Hana piyoh meuk teupanca  
Meunan-meunan geunap malam  
Tango kiam sangat kubra

Galak ate dara agam  
Watee malam jimeujaga  
Keunan jijak uroe malam  
Dara agam ate suka

Dua buleuen nyang ka meunan  
Meupeurasan dalam kuta  
Raja nanggroe teuduek 'oh nan  
Lon peugah ban Rakna Bangta

Kuta pasi meupeurasan  
Nyanpi teelan leupah gura  
Rakna Bangta meupeurasan  
Le that ragam he syeedara

Saboh bangon he nyak puteh  
Cidah abeh aneuk dara  
Hana teungeut malam jieh  
Taloe tapeh jijak mita

Jiikat le taloe ayon  
Jimeupanton ek-ek guda  
Agam keu nan inong keu nan  
Jimeutunang hana reuda

Abeh teukhem baranggasoe  
Lakoe binoe keu nan teuka  
Geutet kuta saboh bagoe  
Peungeuh nanggroe hu meucahyu

Laen nibak nyan han peue rawi  
Keucapi ngon gambang wangsa  
Got peurasan kuta pasi  
Bangta Kumari raja raya

Geunap malam meunan sabe  
Sang nan ek le bak takira  
Ka peuet buleuen meunan sabe  
Tan beureunti sikutika

Aneuk dara meugleueng subang  
Geunap malam keu nan teuka  
Hana jieh meusimalam  
Dara agam galak raya

Ka nam buleuen wahe akhi  
Kuta pasi peurasan raya

Ureueng gampong ka jiili  
U pasi bak Rakna Bangta

Got peurasan that ugari  
Bangta Kumari ureueng teuka  
Aneuk dara meugleueng gaki  
Hana sakri jimeuwa-wa

Ngon peukayan jroh han sabé  
Taloë gule bandum rata  
Deungon pawon nibak bajee  
Meureuntang lhee nibak dada

Sapotangan nibak jaroe  
Jipot-pot droe aneuk dara  
Agam muda abeh wawoe  
Jikalon nyoe sang ka gila

Siladiman saboh lagee  
Jibet kayee ubé raya  
Abéh teulet ngon peureudee  
Hana lagee jih that teuga

Ureueng nanggroe keu nan ka troh  
Jingo kiroh hana tara  
Dalam kawan peulheueh tikoh  
Sang ka runtoh alam donya

Dumnan kiäm deungon kiroh  
He adoe beh han tom nyang ka  
Bungong apui hana putoh  
Seun sireutoh jitèt lanja

Aneuk Inggréh jitiek-tiek droe  
Tadeungo nyoe he adekda  
Jiek jitren atueuh taloe  
Jikiloe droe lam-lam mata

Di Meulayu puteh bibi  
Aneuk Cati mirah muka  
Soe nyang kalon that beureuhi  
Han tatukri peugah rupa

Uroe malam taloe pasi  
Ulee ili aneuk dara  
Keu deh keu noe jak-jak sabé  
Galak ate ureueng donya

Sepkeu 'oh noe ulon peugah  
Bandua blah meukeurija  
Bangta Kumari ulón peugah  
Bangta indah geuboh gaca

Watee lheueh nyan geuboh laen  
Meunan kayem buetan maja  
Ngon peukayan sangat canden  
Haloh licen bajee meudokma

Deungon bungkoh tapak cato  
Meuh meuato banpeuet punca  
Kreh ngon peudeueng meusarong meuh  
Takalon deuh deungon mata

Teuma ija kuneng hijo  
He adoe e bandum sutra  
Jroh that rupa linto baro  
Abeh tahe aneuk dara

Jaroe gaki gaca hitam  
Soe nyang pandang ate suka  
Cukop leungkap ngon peukayan  
That analan hana tara

Aneuk dara bandum tahe  
Jingieng linto galak raya  
Teiduek haba nyang rot linto  
Dara baro lon calitra

Lheueh peurasan ka seuleusoe  
Si nyak putroe geuboh gaca  
Sie ngon lumo geunap uroe  
Geutalak droe ureueng lingka

Nibak maja syaratpi le  
Dara baro geuboh gaca

Geupeungui le dara baro  
Kuneng hijo ija sutra

Soe nyang kalon dara baro  
Tahe gante teuka hawa  
Agam inong abeh tahe  
Bungong kundot jroh that rupa

Andam mantong ka limong seun  
Hana peue kheun nyan takira  
Bek tatanyong pakon le seun  
Tujoh buleuen meukeurija

Teuma jinoe rab woe linto  
Dara baropi ase ka  
Malam singoh geuwoe linto  
Tango a-o lam istana

Abah kiam ureueng inong  
Beukah beulangong bak tet bada  
Ladom laloe ramah teupong  
Beukah mangkong ka ro sira

Nyang jeuet beukah tango lon kheun  
Meuantok gleueng bak meuseunda  
Meuantok gleueng reuloh subang  
Mate geucang ka na bala

Han ek peugah le that macam  
Subra kiam hana nyang sa  
Hingga teuma haba nyang toe  
Tango jinoe ulon rika

Ase dumpeue di meuligoe  
Ase putroe di istana  
'Oh ban ase dara baro  
Syam kasyum sye peh nukara

Rot deh rot noe geundrang tambo  
Linto baro teungoh geuba  
Nyang ba linto uleebalang  
Bentara blang sama juga

Dalam kaha ka geupeuduek  
Geuteupuek geundrang suasa  
Tango riyoh that jikasyuk  
Sang su canggueuk 'oh ie raya

Sira geujak deungon gaki  
Jinari panglima muda  
Geuba linto raja ahli  
Bangta Kumari aneuk raja

Lom ngon geukheun salli walo  
Su meuo-o that meu taga  
Bandum rata geuyue seuot  
Meunan patot nibak maja

Raja deungo salli walo  
Geutet laju beude raya  
Beude raya su meu'u-'u  
Ampeueng linto jamee teuka

Ampeueng jamee dum sibarang  
Meunan reusam poteu raja  
Geutet beude jareueng-jareueng  
Geulinteueng linto ban teuka

Na sikeujab lheueh geuampeueng  
Ka troh u leuen linto geuba  
'Oh troh keu nan geuba linto  
Salli walo piyoh sigra

Teuma peukek u seuramoe  
Ureueng binoe kalon rupa  
Teungku linto teutop ulee  
Meunan teuntee suroh raja

Teuma raja bri wakilah  
Teungku syiah sambot sigra  
Teungku cok ie neusrab babah  
Neupeunikah putroe muda

Bahwa ulon teupeunikah  
Putroe indah aneuk raja

**Deungon Bangta nyang meu tuah  
Judo nyang sah Rakna Keumala**

Rakna Bangta kabui pantah  
Hukom Allah ka saporna  
Teuma raja bri seu deukah  
Teungku syiah laju gisa

Leupah neuwoe teungku syiah  
Ulon peugah Rakna Bangta  
Teuka maja keu nan laju  
Geumat teungku linto muda

U rumoh inong peuek teungku  
Bak cut meulu Rakna Keumala  
'Oh sare troh keu nan linto  
Dara baro seumbah raja

Geupeudeuk le teuma linto  
Ateueh kaso nyang meutia  
Jiduek putroe di geunireng  
Sapeng-sapeng deungon Bangta

Meuna taeu han tapaleng  
Hana bandeng ureueng dua  
Agam inong jikeureuleng  
Putroe linteng deungon Bangta

Rot deh indah noe canden  
That sibandeng ureueng dua  
Aneuk dara tahe hireuen  
Jieu buleuen ateueh geuta

Sabe keudroe jimeukheun-kheun  
Payah meu teumeung meunan rupa  
Jikheun Bangta jroh han sakri  
Putroe Siti jroh hana sa

Miseue sakin saboh pande  
Sabe-sabe meuadoe a  
Hana bacut kureueng leubeh  
Han meualeh lidah neuraca

Lagi umu teungoh baleh  
Adat leubeh sithon dua  
Rupa indah hana bagoe  
Hireuen laloe taeu rupa

Ngo lon peugah ureueng sidroe  
Di jih laloe peubloe mata  
Puliek pineung ngon rampagoe  
Ateueh putroe keu nan mata

Laloe jingieng ateueh putroe  
Inong jaroe putoh dua  
Hana jithee teusie jaroe  
Sabab putroe jroh that rupa

Dumnan cidah putroe linteng  
Hana bandeng ngon tapeusa  
Jikhem mantong yum sikatoe  
Kilat gigoe yum sibara

Jeuet ka dumnan lon hareutoe  
Rupa putroe deungon Bangta  
Teuduek 'oh nan dilee siat  
Lon peurab haba nyoe lanja

Nyoe lon peugah Bangta Kumari  
Ngon Cutti Rakna Keumala  
Sapat neuduek dara baro  
Sajan linto Rakna Bangta

Putroe lop keuleumbu baro  
Beudoh tido le bandua  
Lop keuleumbu tujoh lapeh  
Putroe eh dua ngon Bangta

Kaso sutra bantai tindeh  
Sinan neueh ureueng dua  
Keu deh keu noe that meugaseh  
Han peue abeh lon calitra

Bandua droe ate puleh  
Lam tika eh teungeut indra

**Hingga teuma beungoh uroe  
Jaga putroe deungan Bangta**

'Oh lheueh manoe suci asoe  
Idang sampoe dendayang ba  
Makeuen Bangta deungan putroe  
Nekmat ka troe ate suka

'Oh lheueh makeuen Bangta Kumari  
Kheun bak Siti Rakna Keumala  
Idin keu lon bungong giri  
Jak u pasi bak adekda

'Oh lheueh idin nibak putroe  
Po samlakoe neujak lanja  
Watee malam wahe adoe  
U meuligoe neuwoe Bangta

Beungoh neujak malam neuwoe  
Ubak Putroe Rakna Keumala  
Ate sunang hana bagoe  
Bandua droe sangat suka

Meuanan sabé he teungku lem  
'Oh lheueh kawen Rakna Bangta  
Na nam buleuen lheueh meukawen  
Jinoe laen lon calitra

Bungong rom ngon bungong jeumpa  
Abéh mala dalam uroe  
Amma bakdu nyang that gura  
Adek Bangta lon hareu toe

Putroe Lason nyang meutuah  
Banta Silah judo putroe  
Prang hana le buet ka sudah  
Keumeung langkah woe u nanggroe

Kheundak langkah woe u gampong  
Ubak aduen jak peugah proe  
He kakanda bungong sukón  
Idin keu lon he cut bang droe

Neubri idin dalem raja  
Ulon bungka woe u nanggroe  
Teuma seuot Rakna Bangta  
He adekda bungong geutoe.

Tadeungo lon puteh leusoh  
Lon meutanggoh dua uroe  
Nyang jeuet adek lon meutanggoh  
Lon peugah troh ubak putroe

Lon jak peugah bak teumuda  
Gata bungka woe u nanggroe  
Meunan neukheun Rakna Bangta  
Lason muda ka neuiem droe

Lheueh nyan teuma Bangta Kumari  
Bak Putroe Ti laju neuwoe  
'Oh sare troh keu nan u leuen  
Neukek rinyeun puta taloe

Leupah pinto troh u rambat  
Neukek leugat u meuligoe  
Rakna Keumala ban neulihat  
Beudoh leugat seumbah lakoe

Putroe seumbah nibak teuot  
Bangta sambot deungon jaroe  
Teuma uroepi ka seupot  
Panyot jitit lam meuligoe

Yoh nyān neuduek Rakna Bangta  
Ateuh geuta meuh sinaroe  
Na sikeujap neuduek Bangta  
Idang raya keu nan sampoe

Buet dendayang keu nan jiba  
Makeuen Bangta deungon putroe  
'Oh lheueh makeuen pinah idang  
Keubah rijang le lam sagoe

Ranuppi ka lheueh jigapu  
Miseue Bungsu areh ragoe

**Meunan mise Rakna Keumala  
Keu Cut Bangta got jisiboe**

Nak bek saket ate Bangta  
Lisek raya si nyak putroe  
Ranuppi ka lheueh jisuleueng  
Si nyak meugleueng jikheun meunoe

Teuma putroe lakee seupah  
Putroe indah sang leuek ragoe  
'Oh sare lheueh neubri seupah  
Bangta peugah ubak putroe

Tabri idin dara baro  
He adoe e siat lon woe  
Teuma seuot bungong ceuko  
Tuanku e ureueng lakoe

Cempala cut mirah baho  
Aneuk tulo di cong panjoe  
Bek neuboh lon wahe judo  
Got that hijo ranup jatoe

Asoe tarek goh lom keundo  
Pakon judo han neupakoe  
Meunan jikheun dara baro  
Jimeututo deungon lakoe

Mangat that su bungong ceuko  
Tadeungo sye lam meuligoe  
Soe nyang deungo bandum tahe  
Jingo tuto cut sambinoe

Teuma seuot Bangta Kumari  
He Putroe Ti han trep lon woe  
Tabri idin bungong pade  
Siat lon cre lam buleuen nyoe

Seuot putroe meunyo neucre  
Ulon mate meuhad sinoe  
Ho nyang neujak po meukuta  
Ulon neuba he judo droe

Teuma seuot Rakna Bangta  
He adekda deungo kamoe  
Bahle tinggai sinoe gata  
He Cut Rakna tanglong nanggroe

Lon jak intat Lason muda  
Parui gata adek kamoe  
'Oh troh keu deh Putroe Lason  
Kuwoe di lon laju keu noe

Meukon meunan he bintang lhon  
Jeuheut lon ngon gata adoe  
Kadang adek teuka bala  
Rugoe raya 'ayeb bunyoe

Sabab adek mantong muda  
Akhe masa jeuet meupaloe  
Meunan neukheun Bangta muda  
Rakna Keumala ka jjiem droe

Putroe tanyong teuma sigra  
Pajan masa keu noe neuwoe  
Meunyo hana sapeue mara  
'Oh puasa troh lon keu noe

'Oh meujan woe po meukuta  
Putroe muda han le jimoe  
Beukit judo neumeung bungka  
Lusa raya bek uroe nyoe

Lhœuh jikheun nyan panyot tanglong  
Yuë top teupong leukat jatoe  
Jimeung peugot peunajoh dum  
Keu cut Lason woe u nanggroe

Putroe yue peugot dum peunajoh  
Han peue lon boh macam bagoe  
Hingga teuma troh bak tanggoh  
Bangta utoh bungka jinoe

Bangta seumbah Sakdan Lila  
Ngon tuan tha bunda putroe

Lakee idin nibak raja  
Kheundak bungka woe u nanggroe

'Oh lheueh idin poteu raja  
Neutren lanja po samlakoe  
Leupah neujak Rakna Bangta  
Neuwoe raja u meuligoe

He nyak Cut Rakna Keumala  
Ho jibungka po samlakoe  
Teuma seuot putroe muda  
Neugisa neuwoe u nanggroe

Teutap jimoe Rakna Keumala  
Rakna Bangta lon hareutoe  
Neujak laju Bangta muda  
Keu deh lanja ubak adoe

Laju neujak Bangta Kumari  
U pasi bak Lason Putroe  
'Oh troh keu nan Bangta ahli  
Lason Siti tanyong meunoe

Wahe dalem uleebalang  
Peue na lintang tuanku droe  
Rakna Bangta seuot bagah  
Cut indah tanggoh siuroe

Wahe nyak Cut Putroe Lason  
Tadengo lon bungong geutoe  
Singoh beungoh talet saoh  
He adoe beh woe u nanggroe

Hingga teuma troh bak tanggoh  
Teuma beudoh dum sinaroe  
Beungoh uroe tarek layeue  
Angenpi kheue reumbang uroe

Kapai jijak teuma lanja  
Laju bungka woe u nanggroe  
Saboh kapai nyang that raya  
Sinan Bangta nyang samlakoe

Silasiman Silanaga  
Sajan Bangta Lason Putroe  
Kapai jiplueng han peue pike  
Mangat ate dum sinaroe

Jipot anget Timu laot  
Teuma jipot Timo jatoe  
Mangat ate dum lasyeuka  
Bungka lanja woe u nanggroe

Jiplueng gurap jroh meunggok  
Jiplueng bidok cula-caloe  
Jiplueng bahtra ie meupuseng  
Jiplueng banteng ie meutaloe

Kapai jijak jroh meuikot  
Po bintang sret woe u nanggroe  
Padum lawet peulayaran  
Troph curam u gampong adoe

Biwang Lama keu nan datang  
Wahe abang ka troh sampoe  
Troph bak nanggroe Din Syarifah  
Batukiah raja nanggroe

Ayah Putroe Din Syarifah  
Raja indah that meu budoe  
'Oh troh keu nan sampoe bahtra  
Rakna Bangta marit meunoe

Wahe nyak Cut Putroe Lason  
Tadeungo lon wahe adoe  
Bandua ngon Bangta Silah  
Ngo lon peugah he samlakoe

Tamong bandum u kuala  
Sampan bahtra dum sinaroe  
Lon meung tamong Biwan Lama  
Hajat lon na bak teumpat nyoe

Raya hajat ulon tuan  
Piyoh intan bak nanggroe nyoe

**Lon peukawen nyan cut abang  
Bangta Sawang aduen kamoe**

**Bangta Silah seuot sigra  
Ban nyang suka tuanku droe  
Geulhom saoh kapai bahtra  
Rab kuala dum sinaroe**

**Teuma geutet beude nubat  
Su raya that leungo nanggroe  
Ban geudeungo meusu beude  
Teukeujot le ayah putroe**

**Sigo apo geutet beude  
Sang kaphe jijak prang nanggroe  
Ka teukeujot Batukiah  
Neuheu pantah sidroe meuntroe**

**Cuba tajak nyan u pasi  
Raja pane teuka keu noe  
Jikalee nyan kapai musoh  
Tayue piyoh dua uroe**

**Adat kapai ba meuneukat  
Lakee adat wase nanggroe  
Talakee nyan miseue nyang ka  
Bak siploh sa takheun jinoe**

**Adat kapai ba peurasan  
Tanyong beu trang pane nanggroe  
Tayue tamong nyan u peukan  
Peue peurasan taeu jinoe**

**Lheueh peurintah nibak doli  
Bujang tandi beudoh jinoe  
Jijak laju tan beureunti  
Troh u pasi bandua droe**

**Jicok sampan dayong leugat  
Deungon siat troh le sampoe  
Bujang kalon ureueng dua  
Rakna Bangta yoh saboh roe**

Jingieng leumah Bangta dua  
Jitren lanja leugat jiwoe  
Troph bak deelat jipeuhaba  
Jikheun Bangta ka troh geuwoe

Jikheun ureueng poh geureuda  
Dilee masa bak nanggroe nyoe  
Ban raja ngo narit bujang  
Neukheun rijang ubak putroe

Wahe aneuk Din Syarifah  
He meutuah peuase droe  
Ka troh jiwoe Bangta Sawang  
He cut intan aneuk kamoe

Din Syarifah deungo meunan  
That sukaan hana bagoe  
Jicok sawak ija sutra  
Tet le baja boh bak gigoe

Taeu mehmoh hana tara  
Cidah raya jitumeh droe  
'Oh ban jisok gleueng suasa  
Got that gura si nyak putroe

Rumah teukhem hana reuda  
Galak raya 'oh woe lakoe  
Teuduek siat putroe indah  
Ulon peugah raja nanggroe

Nama Raja Batukiah  
Nyankeu ayah si nyak putroe  
Neukrah rakyat dum barollah  
Ureueng meugah keujruen meuntroe

Abeh jitren dum sibarang  
Uleebalang geusyik sagoe  
'Oh troh keu nan sikalian  
Uleebalang beuet jaroe

Deelat ampon he khalifah  
Peue na titah ka troh kamoe

**Sabda Raja Batukiah  
Din Syarifah ka woe lakoe**

Tasie keubeue nyang raya pha  
Uleh gata singoh uroe  
Bek that rayek meukeurija  
Tapeumada siploh uroe

Meunan neukheun poteu raja  
Bak peutua imum sagoe  
Uleebalang seu ot sigra  
Ban nyang sabda tuanku droe

Jipeubuet le teuma pantah  
Ban peurintah raja nanggroe  
Ladom ureueng jiseumeugah  
Jimeusah-sah sabe keudroe

Pajan kawen Din Syarifah  
Putroe indah nyang toh lakoe  
Hana lon thee pajan masa  
Siri Bangta pane nanggroe

Teuma seuot ureueng tuha  
Meunoe haba geuhareutoe  
Masa mate cicem-geureuda  
Yoh nyan masa kawen putroe

Gatib mantong masa dilee  
Jinoe tathee ka woe lakoe  
Aneuk Raja Duson Yaman  
Lon ngo meunan yoh saboh roe

Meunan-meunan dum geupeugah  
'Oh nan sudah saboh bagoe  
Bahle 'oh nan saboh kisah  
Batukiah lon hareutoe

Deungon bujang marit raja  
Neukheun sigra ubak meuntroe  
Neuyue jak kheun ubak Bangta  
Meukeurija siploh uroe

**Meunan sabda nibak deelat  
Beudoh leugat bandua droe  
Troh u pasi jibeurangkat  
Jieu rakyat meuploh katoe**

**Rakyat Bangta dum di pasi  
Dum meuriti atueuh anoe  
Uleebalang meuntroe wadi  
Bak keurusi dum sinaroe**

**Ban geuteungoh dalam bahtra  
Rakna Bangta aduen adoe  
Putroe Lasonpi ka keu nan  
Silasiman bandua droe**

**Bujang turi Rakna Bangta  
Poh geureuda yoh saboh roe  
Ka jiseumbah laju sigra  
Lheueh nyan teuma angkat jaroe**

**Deelat ampon po meukuta  
Suroh raja ulonteu nyoe  
Neuyue peugah bak meukuta  
Meukeurija siploh uroë**

**Bangta seuot insya Allah  
Ban nyang titah raja nanggroe  
Wahe bujang tajak peugah  
Han peue salah rela kamoe**

**Teuma bujang lheueh seumeugah  
Geuwoe pantah bandua droe  
Ban troh ubak Batukiah  
Ka geupeugah haba bunoe**

**Neukheun ka jeuet ubak Bangta  
Ban nyang suka tuanku droe  
Ban geudeungo meunan haba  
Poteu raja peuase droe**

**Teuduek siat raja doli  
U pasi kisah lon peuwoe**

**Putroe Lason duek di pasi**  
**Bangta Kumari marit meunoe**

Wahe dalem Bangta Sawang  
He cut abang deungo kamoe  
Bak ulama tajak rijang  
Bak meudagang yoh saboh roe

Bangta Sawang meunoe neukheun  
Nibak ulon ban kheun adoe  
Teuma neukheun bak Cut Lason  
Tadeungo lon he sambinoe

Keu deh tawoe adek gata  
Dalam bahtra bandua droe  
Jarak ulon siklep mata  
Bak ulama siat lon woe

Putroe Lason seuot pantah  
Insya Allah tuanku droe  
Teutap sinan putroe indah  
Ngon kafilah dum sinaroe

Nyankeu pasi poh geureuda  
Dilee masa yoh saboh roe  
Bangta Sawang neujak lanja  
Rakna Bangta aduen adoe

Silasiman Silanaga  
Peuet sireut ta neujak sampoe  
Ban sare troh ubak teungku  
Seumbah laju gaki jaroe

Teungku tanyong teuma leugat  
Ho ka rakyat po samlakoe  
Bangta peugah na di laot  
Beuncalang bhot teumpat putroe

Teuma teungku peugah patot  
He bintang cut jak tueng keu noe  
Bahle sinoe meukeurija  
He aneukda bungong uroe

**Jak tueng aneu ka rikayat gata**  
Keu nqe taba bansinaroe  
Bangta deungo haba meunan  
Bak Silasiman neupeugah proe

Neuyue jak tueng Lason muda  
Rakyat taba limong ploh droe  
Bangta Silahpi beutaba  
Lakoe putroe muda parui kamoe

Teuma jijak Silasiman  
Peugah rijang ubak putroe  
Ka jipeugah laju yoh nyan  
Ban surohan po samlakoe

Putroe Lason deungo meunan  
Neujak yoh nyan le ngon lakoe  
Bangta Silah neujak lanja  
Rakyat neuba limong ploh droe

'Oh troh keu nan bak ulama  
Peumulia hana bagoe  
Watee malam meupeurasan  
Ban lakuhan reusam nanggroe

Geuboh gaca Bangta Sawang  
Geupuh geundrang le geukiloe  
Peurasan dum han ek kira  
Le that rupa taeu bagoe

Miseue kawen Rakna Bangta  
Meunan rupa keurija nyoe  
Geusie keubeue han ek peugah  
Batukiah ureueng meusoe

Seun-seun siploh laju reubah  
Luma kibah kameng dum roe  
Ureueng nanggroe galak leupah  
Mutah darah dum jiseudoe

Meunan kawen Din Syarifah  
Han ek peugah meunankeu proe

**Ladom ciret dum ka biyoh**  
**Leupah pajoh jitalak droe**

**Han jikira ciret biyoh**  
**Sie reuboh le that jiseudoe**  
**Dumna ureueng talak hawa**  
**Tuha muda dum sinaroe**

**Siploh uroe meukeurija**  
**Dum ase ka nibak putroe**  
**'Oh ban ase dara baro**  
**Geuba linto teuma jinoe**

**Bangta Sawang nyankeu linto**  
**Geuba laju ubak putroe**  
**Inong agam intat linto**  
**Salli walo kiam bunyoe**

**'Oh troh geuba teungku linto**  
**Peukek laju u meuligoe**  
**Di seuramoe peunduek linto**  
**Ateueh kaso meuseunujoe**

**Dara agam abeh tahe**  
**Jieu linto that samlakoe**  
**Bangta Sawang rupa indah**  
**Din Syarifah beyek budoe**

**Miseue buleuen reumbang peuet blah**  
**Hana tiwah keu deh keu noe**  
**Di seuramoe teungku linto**  
**Dara baro lam meuligoe**

**Dara baro gaca hitam**  
**Taeu andam yum sikatoe**  
**Soe na kalon salah waham**  
**Euntreuk malam leumah lumpoe**

**Teuka sidroe ureueng tuha**  
**Nyankeu maja wahe adoe**  
**Geumat linto Bangta muda**  
**Laju geuba u meuligoe**

Geuba laju ubak judo  
Ateueh kaso peuduek dudoe  
Ban putroe ngieng leumah linto  
Dara baro seumbah lakoe

Bak seumeumah putroe muda  
Utoh raya hana bagoe  
Teuma jiduek sapat dua  
Cit na maja nyang hareutoe

Putroe jiduek di geunireng  
That sibandeng taeu bagoe  
Bangta indah putroe lintang  
Ureueng nyang ngieng tahe keudroe

Hingga tauma wahe teelan  
Teutap sinan po samlakoe  
Sinan teutap Bangta Sawang  
Dua sajan deungon putroe

Teuma geuwoe ureueng datang  
Tinggai bintang lam meuligoe  
Maseng-maseng woe u teumpat  
Laju meuhad woe u nanggroe

Tinggai sinan Bangta Sawang  
Sajan intan nyang sambinoe  
Bangta Sawang lam keuleumbu  
Neubeuradu deungon putroe

Bandua droe ate suu  
Han peue teungku lon hareutoe  
Padum buleuen sinan teutap  
Deungo sahbat aduen adoe

Rakna Bangta neujak keu nan  
Bak cut abang syeedara droe  
Bangta Sawangpi cit meunan  
Bak Beurahman neujak neuwoe

Padum lawet akhe teuma  
Rakna Bangta lon hareutoe

**Neupeukawen Simansila**  
Silanaga bandua droe

Ubak aneuk ureueng kaya  
Bak peutua geusyik sagoe  
Bandua droe neupeukawen  
Hana neusyen laba rugoe

Karena ka jeuet aneuk seubot  
Meunan patot wahe adoe  
Jih meuteumeung dilee masa  
Bak geureuda saboh peutoe

**Silasiman Silanaga**  
Bit that raya hana bagoe  
Badan kuat hana tara  
Sangat teuga bandua droe

Got that baten he syeedara  
Rakna Bangta lon hareutoe  
Nibak nanggroe Biwan Lama  
Padum lama sinan laloe

Neukeumeung woe teumpat nyang'ka  
Nanggroe bapa yoh saboh roe  
Rakna Bangta kheundak bungka  
He syeedara woe u nanggroe

Putroe Lason Bangta Silah  
Nyansi sosah wahe adoe  
Neujak ubak syahi alam  
Bak cut abang jak peugah droe

'Oh troh keu deh neudong di leuen  
Meunoe neukheun po samlakoe  
Putik pisang klat jantong pisang nu  
Soe di leupu lam meuligoe

Putik pisang klat jantong pisang roh  
Na di rumoh he adek droe  
Taek keu noe bungong sukun  
Ka troh bak lon tajak keu noe

**Teuma neukek Rakna Bangta**  
Ngon teumuda meumat jaroe  
Nateu keu noe adoe raja  
Bak teumuda po samlakoe

He adek cut raja muda  
Simansila ka teumpat roe  
**Teuma seuot Rakna Bangta**  
Ka teumuda ulon peuwoe

Lon peukawenjih bandua  
Aneuk peutua geusyik sagoe  
Jawueeb Putroe Din Syarifah  
Han tapeugah bak lon sidroe

Kareunajih aneuk yatim  
Tapeukawen le geutanyoe  
Bek teumuda jinoe teulah  
Buet ka leupah nyan di kamoe

Mate-mate lon teumuda  
Peue takira ka seuleusoe  
Bek 'ayeb bak ureueng lingka  
Simansila tan judo droe

Teuma marit putroe muda  
He adekda po samlakoe  
Pajoh ranup he adekda  
Ka trep gata teuka keu noe

Bangta seuot kru seumangat  
Ranup neumat po samlakoe  
He teumuda nyang meutuah  
Saket babah ulonteu nyoe

Teuma marit Rakna Bangta  
He teumuda tango kamoe  
Ho ka saleh cut bang Bangta  
Hana teuka ka lhee uroe

**Seuot Putroe Din Syarifah**  
Jipeugah dalam meuligoe

**Jeh pat teungeut lam keuleumbu**  
**Neubeuradu wahe adoe**

**Teuma beudoh Din Syarifah**  
**Jiek pantah u meuligoe**  
**Jijak peugoe Bangta Sawang**  
**Ceupet rijang deungon jарoe**

**Ban jiceupet ka teukeujot**  
**Po Bangta cut tanyong meunoe**  
**Soe peugoe lon han tom nyang ka**  
**Lon he raja seuot putroe**

**Keu peue judo peugoe ham ba**  
**Seuot sigra po sambinoe**  
**Beudoh laju po meukuta**  
**Jeh adekda ka troh keu noe**

**Bangta Sawang deungo meunan**  
**Neutren rijang u seuramoe**  
**Ban sare troh bak syeedara**  
**Meucom meuwa meumat jaroe**

**Teuma marit Rakna Bangta**  
**He kakanda deungo kamoe**  
**Neubri idin dalem raja**  
**Ulon bungka woe u nanggroe**

**Bangta Sawang seuot sigra**  
**Lon adekdapi cit kuwoe**  
**Lonpi adek lon woe sajan**  
**U Duson Yaman he samlakoe**  
**Bangta Sawang marit pantah**  
**Bah lon peugah ubak putroe**  
**Wahe nyak Cut Din Syarifah**  
**Lon meulangkah woe u nanggoe**

**Tabri idin he cut indah**  
**Lon cok langkah bak uroe nyoe**  
**Teuma seuot Din Syarifah**  
**Sangat gundah taeu jimoe**

Beukit neujak wahe deelat  
Bek trep lambat keu noe neuwoe  
Lon keumeung tham hana dapat  
Lon meung ikat putoh taloe

Na leubeh nyoe deungon jameun  
Gatib mantong deungon kamoe  
'Oh lheueh gatib neu tem bungka  
Hana daya ulon sidroe

Meunan jikheun putroe muda  
Ngon mata ka tahe keudroe  
Teuma marit Bangta Sawang  
Wahe intan bek le tamoe

Rijang keu noe lom lon riwang  
Meubek intan na meupaloe  
Putroe seumbah Bangta Sawang  
Jikheun rijang teuma meunoe

Adat neujak judo meutuah  
Buleuen leumah beutroh neuwoe  
Meunan jikheun Din Syarifah  
Bangta indah seuot meunoe

Meuna umu Tuhan keubah  
Insya Allah troh ulon woe  
Teuma neutren neucok langkah  
Ubak syiah laju neuwoe

Neujak laju bak Beurahman  
Neukheun yoh nyan lon keumeung woe  
Putroe Lasonpi di sinan  
Bandua nyan deungon lakoe

Bangta peugah bak Beurahman  
Idin laman teungku jinoe  
Lon kheundak woe u nanggroe du  
Idin teungku keu lon jinoe

Duson Yaman nanggroe bapa  
Ka trep lama hana lon woe

Abeh neukheun dum peukara  
Rakna Bangta bungka jinoe

Troh u laot dalam bahtra  
Tuha muda bansinaroe  
Bak Silasiman sama juga  
Rakna Bangta neupeugah proe

Silasiman Silanaga  
Jih bandua aduen adoe  
Reumbang uroe got kutika  
Sampan bahtra bungka jinoe

Sikhan buleuen peulayaran  
Uroe malam angen tampoe  
Hingga sampie Duson Yaman  
Piyoh yoh nyan dum sinaroe

Nyankeu nanggroe Rakna Bangta  
Nanggroe bapa po samlakoe  
Geutengoh le bandum keu nan  
Nanggroe nyan teumpat saboh roe

Meuthhee Bangta woe di jeuoh  
Ureueng dum troh keu nan sampie  
Ladom jime ngon bu leukat  
Meunan adat reusam nanggroe

Peurumoh geusyik deungon keujruen  
Dum meuron-ron keu nan sampie  
Me haluan ban sikada  
Rame raya hana bagoe

Lheueh meu teumeung deungon raja  
Lheueh nyan teuma geumeuwwoe-woe  
Maseng-maseng woe u teumpat  
Aneuk rakyat imum meuntroe

Troh u teumpat bandum rata  
Teutap haba ureueng nanggroe  
Nyoe lon peugah Rakna Bangta  
Bak syeedara keu nan neuwoe

Keu nan neuwoe deelat ampon  
Bak Cut Lason syeedara droe  
Teutap sinan Rakna Bangta  
Bak syeedara bandua droe

Bangta Silahpi di sinan  
Peuet droe gop ny an lam meuligoe  
Bangta Sawang Rakna Bangta  
Lason muda ny ang sambinoe

Teutap sinan he syeedara  
Lon calitra laen jinoe  
Bitpi laen lon peuhaba  
He syeedara teum on ngon ny oe

Meukrum reudok meugrum ujeuen  
Ka peunoh krueng taeu ceukoe  
Ayat laen jinoe lon kheun  
Deungo bandum aduen adoe

Ujung ayat lon tuka-tuka  
Bek le sa-sa lagee meunoe  
Meunyo sot-sot kureueng gura  
Bak keunira ulon sidroe

Bungong meulu lhee sikarang  
Abeh leukang angen tampoe  
Amma bakdu adek badan  
Bangta Sawang lon calitra

Meuwoe kisah Bangta Sawang  
Neiduek sajan Rakna Bangta  
Padum lawet teutap sinan  
Bangta Sawang buka haba

Wahe adek Bangta Kumari  
Wahe nyak Ti Lason muda  
Jinoe ulon idin tabri  
Lon keumbali woe bak apa

Ulon woe bak apa Keujruen  
Sikhan buleuen adat lama

**Bangta Sawang meunan neukheun  
Seuot ureueng nyan bandua**

Han peue salah wahe cut bang  
Bek trep riwang he kakanda  
**Bangta Sawang deungo meunan  
Neuwoe yoh nyan ubak apa**

**Rakna Bangta tinggai sinan  
Bangta Sawang neujak lanja  
Bangta Sawang neujak sidroe  
Trok bak nanggroe teungku apa**

'Oh troh keu deh malam uroe  
Laen bagoe meungui Bangta  
**Neukek ubak baranggasoe  
Neupeujeuet droe namiet raja**

**Neukheun namiet Bangta Silah  
Droe neupeugah ubak maja  
Sinan neuduek Bangta Sawang  
Bak rumoh nyan he syeedara**

**Teuma beungoh le ngon uroe  
Tango jinoe lon calitra  
Bangta Sawang laen ulah  
Neupeuleumah droe that hina**

**Bungkoh boh ro Bangta keubah  
Kupiah tampok meugisa  
Ija sutra kreh meudulang  
Bangta Sawang hana neuba**

**Peukayan got Bangta keubah  
Ngui nyang beukah ija tuha  
Ija brok nibak pupalang  
Neungui rijang uleh Bangta**

**Ngon seunampai macam-macam  
Puteh hitam le wareuna  
Bangta Sawang ngui u soe  
Neujak jinoe dalam banda**

Neucok tungkat sikrak yoh nyan  
Gadoh ruman Bangta muda  
Gadoh gura watee neujak  
Tan le sigak aneuk raja

Troh lam peukan Bangta Sawang  
Soe nyang pandang tan mulia  
Jeuep-jeuep keude Bangta teudong  
Tan soe tanyong sikrak haba

Neucre ninan ngo lon peugah  
U meunasah neujak lanja  
Nyanpi meunan wahe teelan  
Bangta Sawang tan mulia

Neucre ninan ngo lon peugah  
Neuwoe pantah ubak apa  
Neuwoe laju u meuligoe  
Bak apa droe Keujruen muda

Banta Sawang atueh bale  
Sinan lale sikutika  
Keujruen muda ka troh keu nan  
Neuturi han Bangta muda

Sang neuturi han cit neukheun  
Teuka hireuen lam bicara  
Bangta Sawang teuma pike  
Meusyawe di dalam dada

Teuma beudoh Bangta Sawang  
Nuwoe rijang ubak maja  
'Oh troh Bangta keu nan neuwoe  
Teuma uroepi ka sinja

Bak malam nyan neueh sinan  
Bak rumoh nyan meuseunia  
Hingga teuma beungoh uroe  
Po samlakoe laju jaga

Beudoh laju Bangta Sawang  
Neutren yoh nyan jak srah muka

Lheueh srah muka ek u lepu  
Po nek bet bu idang raya

Neupajoh bu laju sidroe  
Po samlakoe Bangta muda  
'Oh lheueh makeuen neusrah jaroe  
Neungui jinoe nyang jroh rupa

Kreh meudulang kupiah meutampok  
Teuma neusok siluweue sutra  
Abeh neungui dum peukayan  
That analan hana tara

Teuma neujak le u peukan  
Soe nyang pandang kajisapa  
'Oh ban leuman han peue pike  
Jisapa le aneuk raja

Assalam 'alaikum muda samlakoe  
Pajan keu noe bijeh mata  
Seumbah ampon bandum kamoe  
Ka meutusoe gata raja

Bangta Sawang deungo meunan  
Neukheun yoh nyan di nap mata  
Seuot laju he peukayan  
Jeh cut abang sapa gata

Seuot laju kreh meudulang  
Seuot pinggang ija sutra  
Meunan neukheun Bangta Sawang  
Kreh meudulang gata sapa

Gata sapa tampok kupiah  
Sabab indah taeu rupa  
Beukit gata sapa kamoe  
Pakon baroe seupot mata

Pakon baroe dum taiem droe  
Peue uroe nyoe laen rupa  
Meunan neukheun Bangta Sawang  
Malee han ban ureueng sapa

**Soe nyang deungo wahe sampee**  
Sipu malee he syeedara  
Teuma neujak u meunasah  
Nyanpi teulah ureueng sapa

Neucré sinan Bangta Sawang  
Neuwoe rijang ubak apa  
'Oh sare troh keu nan u leuen  
Apa Keujruen kalon rupa

Peukayan jroh hana peue kheun  
Aneuk keumuen neu turi ka  
Ban neukalon jroh peukayan  
Bak uroe nyan ka neusapa

Nateu keu noe po samlakoe  
Pajan tawoe bijeh mata  
Bangta Sawang seuot leugat  
Neukheun teupat di nap mata

Neuyue seuot le kupiah  
Geusapa kah teungku apa  
Keujruen muda deungo meunan  
Neukheun yoh nyan ubak Bangta

Bek he aneuk takheun meunan  
Deungo laman bijeh mata  
Bit na lon eu tajak baroe  
Lon sangka soe he aneukda

'Oh tabeudoh tapeureugi  
Teuma lon turi wahe Bangta  
Lon keumeung hei nyan ka jarak  
Lon keumeung jak saket lam pha

Apa sapa cit peukayan  
Meunan neufam uleh Bangta  
Bitpi neuthee wahe adoe  
Bangta iem droe hana haba

Ureueng meugah bek tapeucut  
Ube na buet takeurija

**Ureueng ubit wahe sahbat**  
Bek maken that tapeuhina

Beugot tafam wahe adoe  
Tafam sinoe ube kada  
Nyoe lon peugah Bangta Sawang  
Teutap sinan sajan apa

Bak malam nyan teutap sinan  
Bangta Sawang buka haba  
Na neudeungo apa Keujruen  
Wase jameun soe po jeumba

Boh adat gle boh adat blang  
Dum sibarang wase kuala  
Jinoe pakri han neupulang  
Neukheun rijang teungku apa

Adat neupulang ngo lon peugah  
Tango beusah tuto hamba  
Lam buleuen nyoe beuneupulang  
Meuhan meunan peugot kuta

Peugot kuta suda pacang  
Mangat lon prang wahe apa  
Teum seuot apa Keujruen  
Wase jameun hom hai Bangta

Pike keudroe wahe keumuen  
Meunan lon kheun bijeh mata  
Wahe keumuen Bangta Sawang  
Lon kheun rijang ubak gata

Teungku Keujruen meunan neukheun  
Ubak keumuenneu nyang Bangta  
Lom neumarit Bangta Sawang  
Got neupulang wahe apa

Lheueh neukheun nyan Bangta Sawang  
Neuwoe rijang ubak maja  
Bangta Sawang neuwoe leupah  
Yoh nyan sosah Keujruen muda

**Yoh nyan neuhei bandum rakyat**  
Neupeusapat dum peutua  
'Oh troh keu nan hana peue kheun  
Marit Keujruen apa Bangta

Neukheun narit Bangta Sawang  
Lakee pulang dum areuta  
Boh adat gle got adat blang  
Jiyue pulang bandum rata

Pakri jinoe takheun rijang  
Tatem meuprang deungon Bangta  
Bitpi lon kheun ban nyang reumbang  
Bangta Sawang han soe sangga

Bangta Sawang na taturi  
Aduen Siti Lason muda  
Nyan aduen Bangta Kumari  
Tajul Baki nan ayahda

Nyan teumuda Bangta Siah  
Ureueng meugah aneuk raja  
Bangta Sawang kon ureueng cut  
Aduen seubot Rakna Bangta

Meutameuprang ngon geutanyoe  
Sikhan uroe han meumada  
Meusijkeuem han ek talawan  
Jisimpan bandum simua

Jinoe nyang got bak lon reumbang  
Bah tapulang areuta Bangta  
Meuhan pulang jeuet keu teulah  
Gadoh meugah po meukuta

Teuma seuot Teungku Keujruen  
Jakleh tatueng keu noe Bangta  
Jinoe bahle ulon pulang  
Bangta Sawang han soe sangga

Tajak seutot jinoe rijang  
Bangta Sawang bijeh mata

Bujang beudoh laju rijang  
Bangta Sawang jijak mita

'Oh meuteumeung meumat jaroe  
Jimaba woe ubak apa  
Bangta Sawang teuma neuwoe  
Keu deh sampoe u istana

'Oh sare troh jaroe meumat  
Bri horeumat teungku apa  
Teuma laen ureueng nanggroe  
Meumat jaroe deungon Bangta

Bri horeumat dum sinaroe  
Keu samlakoe Bangta muda  
Teuma Keujruen marit leugat  
Neukheun teupat ubak Bangta

Wahe aneuk Bangta Sawang  
Jinoe pulang areuta gata  
Boh adat gle got wase blang  
Dum sibbarang wase kuala

Teungku Keujruen bandum pulang  
Sibbarang bek le meudawa  
Wahe aneuk bangta Sawang  
Bek meujantang le ngon gata

Meunan neukheun apa Keujruen  
Areuta keumuen pulang dumna  
Meureuta droe Bangta Sawang  
Umong di blang limong gunca

Abeh bandum ka neupulang  
Tan sigupang le di apa  
Hana tinggai meusigantang  
Bandum pulang keu Cut Bangta

Geusyik waki bandum sinan  
Jideungo nyan tuha muda  
Teuma marit Bangta seudang  
Neukheun rijang ubak apa

Wahe apa deungo kamoe  
Areuta nyoe hukom gata  
Beuthat apa ka neupulang  
Bak lon tuan di jeumala

Teuma jinoe apa jeunulang  
Areuta nyan hibak apa  
Umong di blang lon kheun khusuh  
Apa wakeueh limong gunca

Nyang lhee gunca ngo lon peugah  
Hukom Allah hukom gata  
Meunan neukheun Bangta Sawang  
Jroh that seunang niet lam dada

Rakyat laen bandum sinan  
Jideungo nyan narit Bangta  
Bangta Sawang dum jipujoe  
Baranggasoe tuha muda

Jroh that akai pie budoe  
Seunang han soe Keujruen muda  
Bangta Sawang nyang samlakoe  
Neukheun meunoe lom bak apa

Wahe apa deungo kamoe  
Ulon jinoe kheundak bungka  
Keujruen muda seuot meunoe  
Bek trep tawoe wahe Bangta

Kareuna ulonpi ka la'eh  
Ka bak bineh uruek geuba  
Nyankeu lon kheun bek trep tawoe  
He keumuen droe lon ka tuha

Adat mate han soe tanom  
Meuhana lom tawoe gata  
Meunan neukheun Teungku Keujruen  
Adat tamakeuen mameh raya

Bangta Sawang seuot meunoe  
Rijang lon woe wahe apa

Apa Keujruen Bangta seumbah  
Neucok langkah laju bungka  
Limong uroe neujak pantah  
Trok langkah bak Lason muda  
'Oh trok keu nan Bangta neuwoe  
Meumat jaroe ngon syeedara

Rakna Bangtapi di sinan  
Bak nanggroe nyan Lason muda  
Nyankeu nanggroe Duson Yaman  
Lon ngo meunan bak calitra

Teuduek siat dilee meunan  
Karangan ayat lon tuka  
Puteh-puteh bungong meulu  
Bee meuharu beungoh seupot

Amma bakdu adoe teungku  
Nyang teumon bu meuhad eungkot  
Meuhana nyan geunap uroe  
Meuhad adoe mukateu krot

Meunan mise hikayat nyoe  
Tango adoe ube patot  
Naleueng awe timoh di gle  
Nyang jahe naleueng peuneuncet

'Oh takalon han peue pike  
Jimat le meuhad meusangkot  
Beugot talam he boh ate  
Beutapike ube patot

Meunan-meunan wahe teungku  
Nyang lawan bu meuhad eungkot  
Meuhana nyan ate tunu  
Meuhad karu beungoh supot

Bangta Sawang lon calitra  
Rakna Bangtapi lon subot  
Teutap sinan bak syeedara  
Lason muda adoe tulet

**Padum lawet teutap sinan**  
**Neukheun yoh nyan ube patot**  
**Wahe adek Putroe Lason**  
**Tadeungo lon putik rambot**

**Tabri idin he adekda**  
**Lon meung bungka he bintang sret**  
**Putroe deungo meunan haba**  
**Jimoe rugha adoe tulet**

**Taeu jimoe Putroe Lason**  
**Syae panton han ek seubot**  
**Adat neujak he dalem cut**  
**Neuleueng paleuet beungoh seupot**

**Putroe Lason meunan jikheun**  
**Miseue ujeuen ie mata sret**  
**Teuma marit Bangta Sawang**  
**He cut bintang putik rambot**

**Bek le tamoe he adekda**  
**Beule do'a cit di likot**  
**Kamoe bungka bandua droe**  
**Taleueng iaroe he adoe cut**

**Bangta Sawang Rakna Bangta**  
**Keumeung bungka rot meulaot**  
**Rakna Bangta neucok langkah**  
**Putroe seumbah nibak teuot**

**Ngon bismillah phon neumula**  
**Neujak lanja iroh meuikot**  
**Bangta Sawang nyang dilee iak**  
**Bak laku hak meunan patot**

**Deungon bayeuen neuba sajan**  
**Sampoe tuan bineh laot**  
**Troh u pasi neuek sampan**  
**Bak uroe nyan saoh neubet**

**Rakna Bangta tarek layeue**  
**Angenpi kheue laju jipot**

Jipot angen hana reuda  
Barat Daya Barat Laot

Sampan jiplueng tajam raya  
Ie meuburà nap ngon likot  
Bandum ureueng ate suka  
Hana reuda angen jipot

Kapai jiplueng cula-caloe  
Bangta neuwoe bak bintang sret  
Woe bak judo po samlakoe  
Aduen adoe putik rambot

Kapai jiplueng meuanggok-anggok  
Yoh nyan mabok aneuk eungkot  
Padum lawet peulayaran  
Ka troh sampan bineh laot

Nyankeu nanggroe Biwan Lama  
Simua layeue geupeusret  
Kapai jidong di mieng kuala  
Meubanja tangieng meuikot

Nyankeu nanggroe Din Syarifah  
Putroe indah ban bintang sret  
Aneuk Raja Batukiah  
Raja meugah ureueng patot

'Oh troh keu nan Bangta Sawang  
Neukheun rijang bak adek cut  
Wahe adek Rakna Bangta  
He meutika adoe tulet

Ulon ka troh he adekda  
Tawoe gata bacut-bacut  
He samlakoe Bangta muda  
Ingar hamba he adek cut

Teuma seuot Rakna Bangta  
Dalem raja ngo lon seubot  
Dalem teungku deungo hamba  
Bek meutuka rukuek sujud

Narit gata dalem payong  
Ulon seuon barut-bacut  
Han ek lon me ulon tatang  
Hana wayang he dalem cut

Ulon seuon di jeumala  
Cit ka jeumba meunan patot  
Lheueh seumeusan meumat jaroe  
Geumeumoe-moe ie mata sret

Bak uroe nyoe ka cre dua  
Woe bak nisa bungong rambot  
Geumeumoe-moe geumeuwa-wa  
Ngon ie mata ban ujeuen sret

Peulheueh meusyen ngon syeedara  
Bangta dua that meupot-pot  
Sira marit sira geumoe  
Bandua droe ureueng patot

Beudoh dalem jinoe neuwoe  
He dalem droe bak teumuda  
Di lon dalem keu deh lon woe  
Ubak Putroe Rakna Keumala

Beuphet kulet mangat asoe  
Dalem droe beumeubahgia  
Bangta Sawang teuma lheueh nyan  
Neuwoe rijang sidroe saja

Laju neujak Bangta indah  
Woe bak zeejah nyang jroh rupa  
Troph bak Putroe Din Syarifah  
Putroe indah aneuk raja

Putroe kalon ka woe lakoe  
Beudoh jinoe peumulia  
Ka jiseumbah teungku linto  
Dara baro ate suka

Hingga teuma haba nyang rab  
Sinan teutap Bangta muda

**Bangta Sawang sinan teutap**  
Ngon cut ubat nyang jroh rupa

Bandua droe meugaseh that  
Hana siatpi na dawa  
Bangta Sawang teutap sinan  
Bak putroe nyan Biwan Lama

Padum lawet teutap sinan  
Bangta yoh nyan geuboh raja  
Gantoe Raja Batukiah  
Bangta indah jinoe raja

Hukom ade tangan murah  
Dum kafilah ate suka  
Teutap Raja Bangta Sawang  
Bak nanggroe nyan Biwan Lama

Teuduek haba Bangta Sawang  
Lon karangan Rakna Bangta  
Tarek saoh peuhah layeue  
Angenpi kheue reumbang pasa

Rakna Bangta bungka laju  
Aneuk teungku raja raya  
Deungon bayeuen neuba sajan  
Bungka yoh nyan Rakna Bangta

Sikhan buleuen peulayaran  
Deuh daratan safan-safa  
Sampan jiplueng sangat laju  
Ka deuh neueu nanggroe raja

Tan gli geunta meusigeutu  
Bungka laju angen peuba  
Ngon peunumanpi na sajan  
Utoh neufam neungieng tanda

Nyang di sampan han peue pike  
Jiplueng sabe hana reuda  
Padumna trep meunan sabe  
Mangat ate Rakna Bangta

Hingga sampan jiplueng laju  
Leumah neueu meucuaca  
Leumah neueu ka rab nanggroe  
Teureupong nyoe neucok sigra

'Oh ban neueu le samlakoe  
Deuh nanggroe Rakna Keumala  
Nyankeu nanggroe Hindustan  
Keu nan sampan ka troh sigra

Bangta teungoh le u darat  
Piyoh siat di mieng kuala  
Mieng kuala nanggroe Hindustan  
Piyoh sinan sikutika

Bangta teungoh bak uroe nyan  
Tinggai sampan di kuala  
Lheueh nyan Bangta laju neuwoe  
U meuligoe bak Cut Rakna

'Oh sare troh gaki rinyeun  
Teuma neukheun meunoe haba  
Putik pisang klat jantong pisang nu  
Soe di leupu tanglong donya

Rakna Keumala jideungo su  
Ka woe teungku judo muda  
Hana macam ate seu  
Seuot laju mangat suara

Putik pisang klat jantong pisang roh  
Lon di rumoh po meukuta  
Neukek keu noe payong nanggroe  
Nyoe pat adoe judo gata

Bangta neuek u meuligoe  
Leumah putroe kalon rupa  
Putroe seumbah nibak teuot  
Bangta sambot com bak muka

Jicok ranup le putroe cut  
Bangta sambot pajoh sigra

Beudoh sinan tuan putroe  
Jijak pasoe idang raya

Peuduek sinan di nap lakoe  
Jikheun meunoe putroe muda  
Bek le lale tuanku droe  
Neusrah jaroe laju sigra

Rakna Bangta neukheun meunoe  
Peurab keu noe judo muda  
Putroe beudoh teuma rijang  
Makeuen sajan ngon judonya

'Oh lheueh makeuen pinah idang  
Putroe tatang le ceurana  
Pajoh ranup po samlakoe  
Teuma uroe malampi ka

Malam julapi ka sampoe  
Neueh putroe deungon Bangta  
Bangta neueh neubeuradu  
Lam keuleumbu tiree rawa

Keu deh keu noe ate rindu  
Lakoe teungku trep ka hana  
Hingga teuma he boh ate  
Hana peue le lon calitra

Han tom jarak meusipade  
Hana tom cre meusideupa  
Meunan sabe deelat ampon  
Troh bak meuthon han ek kira

Abeh buleuen meugantoe thon  
Han tom siseun masam muka  
Abeh thon jeh teuka thon nyoe  
Sajan putore Rakna Bangta

Teuma neujak raja nanggroe  
Bak Putroe Rakna Keumala  
'Oh troh keunan neukheun meunoe  
Raja nanggroe buka haba

**Wahe aneuk bungong giri**  
Tango abi bijeh mata  
Hajat ulon wahe Nyak Ti  
Kumari lon boh keu raja

**Putroe seuot teuma pantah**  
Ban nyang mudah bak ayahda  
Ban nyang reumbang nibak ayah  
Han lon bantah he du raja

**Meunyo meunan he sambinoe**  
Ho ka jinoe Rakna Bangta  
Seuot putroe bungong meulu  
Lam keuleumbu tiree rawa

**Mantong teungeut di tuanku**  
Neubeuradu goh lom jaga  
Meunan neukheun tuan putroe  
Raja nanggroe meuseuranta

**Yue krah rakyat dalam nanggroe**  
Keujruen meuntroe ngon panglima  
Uleebalang imum sagoe  
Dum sinaroe ngon peutua

**Hingga teuma haba nyang toe**  
Rakyat nanggroe meuhimpon ka  
Abeh jitren jeuoh ngon toe  
Geusyik sagoe ngon bentara

**Tok Labala ngon Tok Meuntroe**  
Bandua droe sajan raja  
Teuma marit uleebalang  
Angkat tangan di jeumala

**Ampon tuanku syahi alam**  
Ka troh laman dum sineuna  
Peue na hajat payong nanggroe  
Neukheun jinoe po meukuta

**Sabda raja teuma jinoe**  
Tango kamoe bandum gata

**Kareuna ulon umu akhe  
Miseue pade masak rata**

**Meutapreh jan teuka sadeuep  
Meuka troh khut takoh saja  
Meuka troh had ajai sampoe  
Mate jinoe geutueng nyawa**

**Geutanyoe dum miseue jantong  
Tapreh reunong keu nan teuka  
Meuka udep wajeb mate  
Baranggari tuha muda**

**Nyang lon tanyong bak uroe nyoe  
Soe mee gantoe keurajeuen hamba  
Jinoe takheun ube-be buet  
Soe patot taboh keu raja**

**Uleebalang teuma seuot  
Ban nyang patot bak sroepada  
Ban nyang hajat meukuta nanggroe  
Nibak kamoe hana dawa**

**Teuma seuot Datok Meuntroe  
Ampon kamoe po meukuta  
Nyang mee taboh keu geulantoe  
Judo Putroe Rakna Keumala**

**Meunan reumbang bak lon pike  
Dalam ate bak lon kira  
Meunan geukheun Datok Meuntroe  
Raja nanggroe ate suka**

**Napsu rajapi cit meunan  
Bak uroe nyan troh ban pinta  
Teuma marit Raja Sakdan  
Neuheu intan Rakna Keumala**

**Wahe nyak cut putroe indah  
Tango ayah bijeh mata  
Ho ka judo nyak meutuah  
Yue meulangkah keu noe sigra**

Ban raja yue putroe peugah  
Neutren pantah Rakna Bangta  
'Oh troh keu nan sampoe langkah  
Ka neuseumbah raja raya

Sideh sinoe meujok bungkoh  
Ranup pajoh sapat dua  
Rakna Bangta bak uroe nyan  
Neuduek sinan rab ngon raja

Teuma sabda Raja Sakdan  
Neupeugah ban ubak Bangta  
Wahe aneuk nyang samlakoe  
Gata jinoe badai hamba

Lon ka tuha bungong geutoe  
Lon boh gantoe jinoe gata  
Yoh na udep yoh goh mate  
He boh ate gata raja

Rakna Bangta seuot yoh nyan  
Nibak laman ban nyang suka  
Ban nyang napsu po junjongan  
Nibak laman hana dawa

Saleh ka neutem neupeusayang  
Lon hana wang ureueng hina  
Rakna Bangta mārit meunan  
Raja Sakdan ate suka

Yoh nyan Bangta geubri peukayan  
Ban lakuan adat raja  
Kulah kama nibak ulee  
Ban nyang dilee han meutuka

'Oh lheueh peungui dum peukayan  
Bak uroe nyan tabai raja  
Lheueh geutabai lom geudeelat  
Bandum rakyat ate suka

Beuet jaroe uleebalang  
Panglima prang dum sineuna

sireuta rakyat sikalian  
Deelat yoh nyan Rakna Bangta

Lheueh geudeelat Bangta Kumari  
Geukhanduri lakee do'a  
Sireuta geutet lom ngon beude  
He boh ate that meutaga  
Lom ngon geutet ngon meuriam  
Leungo alam bak nyum rasa  
Geusie keubeue han peue peugah  
Bri seudeukah han ek kira

Dumna rakyat wadi meuntroe  
Bansinaroe lakee do'a  
'Oh ka ase dum sileusoe  
Teuma geuwoe maseng tangga

Teutap Bangta keurajeuen nanggroe  
Ade han soe mat neuraca  
Hukom seunang hana bagoe  
Rakyat nanggroe ate suka

Bangta neuduek di meuligoe  
Deungon Putroe Rakna Keumala  
Lam istana hana tom cre  
Dawok sabé meusuka-suka

Meugaseh that hana bagoe  
Tuan putroe deungon Bangta  
Dendayang dum lam meuligoe  
Khadam Putroe Rakna Keumala

Sakdan Lila lam meuligoe  
Deungon Putroe Lela Indra  
Padum lawet teuma dudoe  
Bak siuroe Rakna Bangta

Teuka ureueng keu nan sidroe  
Bak samlakoe raja muda  
Datok Meuntroe ureueng meugah  
Keu nan langkah ubak raja

Geujak tanyong masaalah  
Geuyue peugah ubak Bangta  
Sabab geueu Bangta lisek  
Ceureudek hana saboh sa

'Oh troh keu nan Datok Meuntroe  
Geucom jaroe Rakna Bangta  
Ampon tuanku po junjongan  
Patek laman hana daya

Gop yue tanyong haba sikrak  
Nyang mustahak po meukuta  
Bangta seuot han peue salah  
Tanyong pantah uleh gata

Kadangpi jeuet ulon peugah  
Meuhana bah ulon saba  
Ampon tuanku meuribee katoe  
Ureueng nam droe keumeung bungka

Agam lhee droe inong lhee droe  
Lakoe binoe nam droe saja  
Ureueng agam raya napsu  
That ceumburu jih bantiga

Sang inong nyan keujih banlhee  
Meunan eleumeejih bantiga  
Jih nyan nam droe saho jijak  
Meurumpak saboh kuala

Meuteumeung jalo saboh sinan  
Lot ureueng nyan dua saja  
Adat jiek lakoe binoe  
Jalo nyoe hana soe peuba

Peugah bak lon ampon deelat  
Pakri pakat po meukuta  
Pakri daya deelat ampon  
Pagah bak lon nyang sijahtra

Pakri daya di ureueng nyan  
Jih han jeuet han leupah bungka

Peugah deelat bak uroe nyoe  
Pakri bagoe nyang sijahtra

Bangta seuot neukheun meunoe  
He Tok Meuntroe deungo hamba  
Phon jeumeurang inong dua droe  
Jitueng inong nyoe abeh tiga

Jiriwang sideh teuma sidroe  
**Sajan lakoe jiduek saja**  
Agam sideh jiek keu deh  
U meurandeh teuma dua

Tinggai sinan cit dua droe  
Lakoe binoe laen hana  
Jiek sinoe teuma keu deh  
U meurandeh agam dua

Tinggai sinan ureueng binoe  
Cit dua droe laen hana  
Inong jak tueng seun-seun sidroe  
He Tok Meuntroe deungo hamba  
Inong di phon inong akhe  
Ka meusampe tanyong gata  
Datok Meuntroe yoh nyan tahe  
Han le tuto seungap haba

Lom Tok Meuntroe neuteumanyong  
Ngo beukeunong poteu raja  
Saboh uruek han ek tadoe  
Dum geutanyoe tuha muda

Beungoh tadoe seupoh ka soh  
Maken mehmoh tadoe pula  
Mehmoh sabé po junjongan  
Ngon uruek nyan po meukuta

Cuba peugah he junjongan  
Pat uruek nyan he sroepada  
Bangta seuot teuma meunoe  
He Tok Meuntroe deungo hamba

Nyang na meunan lam donya nyoe  
Pruet geutanyoe laen hana  
Nyankeu geukheun batee nisan  
Baranggajan na soe pula

Saboh di ulee saboh di gaki  
Baranggari geuboh tanda  
Datok Meuntroe tahe siat  
Bit lisek that Rakna Bangta

Datok Meuntroe lom teumanyong  
Ngo beukeunong po meukuta  
Saboh cicem pileh bungong  
Ri nyang keunong jroh di mata

Lom meuteumeung laen bungong  
Jroh that bangon hana tara  
Nyanpi jicok teuma saboh  
Ka jiboh nyang awai mula

Nyanpi jiboh leumah laen  
Leubeh canden lom di mata  
Jiboh nyang nyan jicok laen  
Nyanpi canden hana tara

Meunan-meunan wahe doli  
Hana lanti siat reuda  
Cuba peugah nyan beulahe  
Ban nyang mise meunan makna

Rakna Bangta seuot laju  
Wahe Datu deungo hamba  
Nyankeu ureueng turof napsu  
Ban nyang laku narit gata

Jimeukawen ureueng lakoe  
Ureueng binoe nyang jroh rupa  
Leumah laen nyang sam binoe  
Inong nyo han le meuguna

Jikeubah nyan hana jisyen  
Di jih laen jijak mita

Nyoe lon peugah ureueng binoe  
Kadang lakoe leupah bungka

Leupah lakoe jak hareukat  
Timu Barat jak meuraba  
Inong sinoe hana gundah  
Jiyue pasah droejih lanja

Keu lakoe droe hana jisyen  
Jimeukawen ureueng kaya  
Nyanpi teuma hana jitueng  
Han ek bloe gleueng nyang teuputa

Nyankeu ureueng turot napsu  
Ban nyang laku tanyong gata  
Nyankue cicem pileh bungong  
Ngo beukeunong narit hamba

Laen peue lom na tatanyong  
Cuba takheun laju sigra  
Datok Meuntroe teuma seuot  
Na meubacut po meukuta

Lon boh mise bak binatang  
Ampon jeunulang peugah sigra  
Nan binatang saboh tikoh  
Dumpeue jitroh padepi na

Pade leukat pade jatoe  
Dum sinaroe pade aga  
Dumpeue cukop na di sinan  
Han sapeue tan po meukuta

Nyoe nyang ka na han jipajoh  
Laen sunggoh jijak mita  
Peuek u para ngon u sandeng  
Meurumpok kuceng ka jiseuba

Nyan tuanku haba mise  
Cuba pakri lahe makna  
Peue na laen nyang na meunan  
Kheun junjongan ubak hamba

Rakna Bangta seuot meunoe  
He Tok Meuntroe deungo le gata  
Nyankeu ureueng umpama binatang  
Jiseum bahyang di jih hana

Dawok laloe jihareukat  
Keu ibadat han jikira  
Nyang jikeubah han jipajoh  
Laen sunggoh jijak mita

Jih beukaya areuta makmu  
Jipajoh bu jeuet ngon sira  
Meuseudeukah han tom jibri  
Kriet that ate hana tara

Keu Po tallah han jiingat  
Keu Muhammad that jilupa  
Nyankeu ureueng umpama tikoh  
Kuceng pajoh han jikira

Nyanpi meunan han jipike  
Adeuep page han soe kira  
Nyan he Datok ka lon peugah  
Adat salah cuba dawa

Teuma seuot Datok Meuntroe  
Tuanku droe sabet beuna  
Nyakeu ureueng nyang that rugoe  
Akhe dudoe 'oh jan fana

Rakna Bangta marit meunoe  
He Tok Meuntroe tanyong lanja  
Teuma jawueb Datok Meuntroe  
Tuanku droe ka meumada

Rakna Bangta neukheun meunoe  
He Tok Meuntroe deungo hamba  
Nyoe lon tanyong keu nan saboh  
Tafam bejroh bek meutuka  
Masaalah saboh lon kheun  
Bak ureueng syeedaga raya

**Sidroe raja aneuk lhee droe  
Geuyue meubloe jih bantiga**

Aneuk tuha riyeue limong ploh  
Aneuk teugoh lhee ploh saja  
Aneuk tulet riyeue siploh  
Beugot utoh fam le gata

Banlhee kameng geuyue jak bloe  
Dua nanggroe bek meutuka  
Geuyue meubloe adoe aduen  
Beusabe yumjih bantiga

Deungon kamengpi beusadum  
Meunan neukheun uleh raja  
Cuba ingat he Tok Meuntroe  
Peugah jinoe uleh gata

Datok Meuntroe ka teupike  
Han ek sampe bak keunira  
Ureueng deungo na lhee ploh droe  
Bansinaroe hana haba

Han troh pikepi meusidroe  
Datok Meuntroe sama juga  
Teuma seuot Datk Datok Meuntroe  
Ampon kamoe po meukuta

Lon meutanggoh meulhee uroe  
Teuma dudoe ulon teuka  
'Oh troh tanggoh wahe adoe  
Datok Meuntroe jak bak raja

Han ek keumah bak geupike  
Mustahe narit meukuta  
Baranggasoe han jeuet peugah  
Bit beurakah bak lon kira

Rakna Bangta seuot pantah  
Tok Meutuah deungo hamba  
Jinoe bahle ulon peugah  
Fam beucidah Tok le gata

Aneuk raja jijak meubloe  
Cit banlhee droe sama juga  
'Oh troh jijak saboh nanggroe  
Kameng sinoe meuhai raya

Sabok kameng tujoh riyeue  
Sang yum keubeue meunan rupa  
Cit dumna yum kameng sinan  
Deungo laman Tok le gata

Maseng-maseng jijak sidroe  
Aduen adoe hana sama  
Aneuk tuha kameng tujoh  
Kureueng sa limong ploh ka seureupha

Tinggai riyeue di jih saboh  
Aneuk teungoh jinoe kira  
Jibloe di jih kameng peuet boh  
Peuet seun tujoh riyeue seureupha

Tinggai riyeue cit dua boh  
Tafam beujroh bek meutuka  
Aneuk tulet kameng saboh  
Riyeue tujoh ka seureupha

Tinggai riyeue di jih cit lhee  
Kameng teuntee saboh saja  
Teuma jijak nanggroe laen  
Sinan kameng murah raya

Saboh riyeue lhee boh kameng  
Sang yum meuneng deungon kadra  
Aneuk tuha peng siriyeue  
Lhee boh jihue kameng sigra

Nyoe pat lhee boh bunoe tujoh  
Ka jeuet siploh bak keunira  
Aneuk teungoh dua riyeue  
Nam boh jihue kameng sigra

Di sinan nam sideh peuet boh  
Ka na siploh 'oh takira

Aneuk tulet riyeue na lhee  
Kameng teuntee sikureueng saja

Bunoe saboh nyoe sikureueng  
'Oh tabileueng siploh juga  
Siploh sapo kameng jibloe  
Laju jiwoe aneuk raja

Nyan he Datok ka lon peugah  
Pat nyang salah kheun le gata  
Datok Meuntroe seuot bagah  
He deelat syah han meutuka

Rakna Bangta kheun lom meunoe  
He Tok Meuntroe deungo hamba  
Lon tanyong kleueng mate saboh  
Ngon ureueng poh mate dua

Nyang kleueng mate ka uroe nyoe  
Ureueng poh nyoe ka baroe sa  
Cuba peugah he Tok Meuntroe  
Takheun jinoe uleh gata

Teuma seuot Datok Meuntroe  
Tuanku droe han troh juga  
Lagi mate dudoe di kleueng  
Nyang di ureueng ka baroe sa

Pakri patot dudoe di kleueng  
Nyang di ureueng nyan bandua  
Hana patot tuanku droe  
Mustahe nyoe narit raja

Han lon pateh raja nanggroe  
Meunyo meunoe neumeuhaba  
Rakna Bangta seuot meunoe  
Deungo kamoe wahe bapa

Meulon tanyong bak ayah droe  
Teuntee kamoe jeuet boh makna  
Meunyo han jeuet nyan tapeugah  
Deungo beusah lon calitra

Han tatkri ureueng poh kleueng  
Tango lon kheun Tok bak gata  
Bukon dua mate ureueng  
Dua ngon kleueng sama-sama

Di kleueng saboh ureueng sidroe  
Ngo Tok Meuntroe uleh gata  
Cit siuroe dua mate  
Sinan bangke dua-dua

Bukon awai ureueng mate  
Bukon akhe he syeedara  
Hana awai hana akhe  
Saban mate gop nyan dua

Dua nyawong ka hana le  
Padum mate cuba kira  
Datok Meuntroe seuot pantah  
Ampon meuah po meukuta

Rakna Bangta marit meunoe  
Lon tanyong nyoe lom bak gata  
Meujeuet tapeugah ban lon.tanyong  
Kheun beukeunong wahe bapa

Datok Meuntroe seuot pantah  
He deelat syah sep dum nyang ka  
Laen uroe he khalifah  
Masalah lom tabuka

Abeh haba bandua droe  
Datok Meuntroe woe u tangga  
Tinggai Bangta nyang samlakoe  
Peutimang nanggroe mat neuraca

Rakna Bangta peutimang nanggroe  
Ade han soe hukom neuba  
Sikalian dumna hukom  
Sigala don han meuriba

Keu nan putoh baranggajan  
Ubak tuan Rakna Bangta

**Padum lawet teuma dudoe**  
**Deungo jinoe lon calitra**

**Bak siuroe wahe rakan**  
**Lam nanggroe nyan jimeudawa**  
**Ureueng po kameng jikheun pancuri**  
**Jimeung taki po areuta**

**Bak po kameng jikheun meunoe**  
**Bak soe tabloe nyan di gata**  
**Ureueng po kameng seuot meunoe**  
**Kameng nyoe ulon peulara**

**Phon ubit kon cit di sinoe**  
**Bukon lon bloe bak ureueng ba**  
**Ureueng dawa seuot meunoe**  
**Areuta kamoe kon di gata**

**Yoh nyan dawa cula-culoe**  
**Rab troh jaroe lam-lam mata**  
**Tunyok-tunyok keu deh keu noe**  
**Rab meupaloe nyan bandua**

**Ureueng laen teuma jak mat**  
**Geuba leugat ubak raja**  
**Hingga troh le wahe sahbat**  
**Ubak deelat Rakna Bangta**

**'Oh troh keu nan geuyue hukom**  
**Ban nyang maklum dilee nyang ka**  
**Bangta tanyong teuma meunoe**  
**Kameng nyoe soe po areuta**

**Nyang ureueng po seuot meunoe**  
**Kameng nyoe areuta hamba**  
**Phon manyak kon nibak kamoe**  
**Sampoe jinoe han meutuka**

**Banta tanyong teuma dudoe**  
**Ubak gop nyoe nyang jak dawa**  
**Jiseuot le teuma meunoe**  
**Areuta kamoe he meukuta**

Kameng ulon cit nyan saboh  
Teuma gaduh cit baroe sa  
Adat meuna meudua boh  
Bahle gaduh han lon kira

Meunan jikheun dum jipeugah  
Sang-sang bit sah jih po areuta  
Rakna Bangta teuma hukom  
Ban nyang maklum dalam dada

Cuba meuhei kamengteu nyoe  
Mangat meusoe po areuta  
Mangat meuri areuta droe  
Nyo kameng nyoe areuta gata

Jikalee nyo cit jiseuot  
Ube patot he syeedara  
Ureueng teumaki seuot meunoe  
Ampon kamoe po meukuta

Han tom lon hei kameng lon nyoe  
Troph an jinoe wahe raja  
Kameng lon nyoe han tom na nan  
Phon manyak kon lon peulara

Teiduek 'oh noe lem teumaki  
Bangta sudi bak po areuta  
Cuba meuhei kamengteu nyan  
Beukit nyo nyan areuta gata

Di ureueng po jihei yoh nyan  
Jimeuhie nan Geunta Suara  
Wahe ulon Geunta pari  
Kacuba ci meusuara

Kameng seuot ka jikheun mbek  
Jih teungoh hek han jikira  
Lem teumaki seuot leugat  
Ampon deelat po meukuta

Kameng meusu nyan galak droe  
Kon ngon geuheu wahe raja

Hana lon tem meunang gop nyoe  
Meunyo meunoe po meukuta

Bangta hukom teuma dudoe  
Tango kamoe gata dua  
Peue umpeuen nyang got jipajoh  
Takheun beutroh bek meudawa

Lem teumaki pike siat  
Peue nyang mangat kameng seuba  
Teuma jikheun pantah rijang  
On geulumpang galak raya

Di ureueng po seuot leugat  
Ampo deelat po meukuta  
Keu on rambong galakjih that  
Meunan adat dilee nyang ka

Banta marit teuma meunoe  
Jak cok keu noe laju sigra  
Jijak mita le on kayee  
Ban meuteumee ka jigisa

Lem teumaki peuwoe rijang  
On geulumpang nyang jroh raya  
Di ureueng po nyan on rambong  
Meunan untong dilee nyang ka

Bangta lakee tabri keu noe  
Lon bri jinoe nyoe bandua  
Bandua peue sigo lon bri  
Mangat meuri po areuta

Jijok laju bandua droe  
Neubri jinoe uleh Bangta  
'Oh ban neubri teungku ampon  
On rambong galakjih raya

On geulumpang han meujicom  
On rambong dilee jimita  
Lem teumaki sangat malee  
Di keue jamee meuploh laksa

Pulang kameng keu ureueng po  
Hana sigo le suara  
Ban nyang hukom Bangta Kumari  
Judo Siti Rakna Keumala

Teuduek 'oh noe saboh rawi  
Laen lagi lon calitra  
Padum lawet teuma dudoe  
Deungo jinoe he syeedara

Bak siuroe wahe rakan  
Lem beunaran jak bak raja  
Deungon peudeueng geuba sajan  
Peudeueng nyan pusaka bak ja

Peudeueng bayek hana lawan  
Lem beunaran ureueng kaya  
Peudeueng le that ureueng lakee  
Siploh ribee cit hareuga

Ban meurumpok ngon lem sulet  
Jikheun teupat di nap mata  
Pane peudeueng bak soe tabloe  
Peudeueng nyoe areuta hamba

Yoh nyan dawa salli aloe  
Bandua droe beungeh raya  
Ureueng laen teuka keu nan  
Geuba yoh nyan ubak raja

'Oh troh keu nan geudeelat le  
Han peue pike peugah haba  
Lem meudawa phon meungadu  
Ampon tuanku raja hamba

Peudeueng ulon gadoh dilee  
Ka meuteumee po meukuta  
Lagi peudeueng cit nyan saboh  
Peudeueng jroh le that hareuga

Adat meuna meudua boh  
Bahle gadoh han lon mita

Ka meuteumee bak pancuri  
Jitaki areuta hamba

Dalem sulet meunan rawi  
Seuot lagi po areuta  
Deelat ampon payong nanggroe  
Peudeueng nyoe areuta hamba

Phon dilee kon nibak kamoe  
Bak uroe nyoe teuka dawa  
Rakna Bangta teuma hukom  
Neutanyong phon asai mula

Na tadeungo he lem sulet  
Peue alamat peudeueng gata  
Adat tatinang padum na brat  
Pat alamat meuri tanda

Lem sulet ka tahe hireuen  
Teujanun han sapeue haba  
Keumeung peugah hana maklum  
Sababjih kon po areuta

Teuma seuot lem beunaran  
Ampon laman he sroepada  
Peudeueng lon nyoe na alamat  
Na dua pat lon boh tanda

Adat tauet beujroh puteh  
Kure aleh lhee sibanja  
Adat tatinang wahe deelat  
Sigunca brat he meukuta

Meunan geukheun lem beunaran  
'Oh geutimang keubit cit na  
Teuma geuet ngon jroh puteh  
Kure aleh leumah nyata

Meusigeutu hana ubah  
Ban peuneugah tan meutuka  
Pulang peudeueng lem beunaran  
Ban hukoman nibak Bangta

Bangta hukom ube-be buet  
Hana bacutpi meuru ba  
Teidueuk 'oh noe wahe adoe  
Ureueng nanggroe nyang meudawa

Mangat ate ureueng nanggroe  
Ade han soe poteu raja  
Ujeuen di gle kayem jitren  
Ureueng gampong le that kaya

Ngon boh kayee kong bak tangke  
Sigala be nanggroe raja  
Raseuki mudah jeuet ngon pade  
Ujeuen sabe kayem teuka

Nanggroe makmu hana sakri  
Sabong judipi han tom na  
Tan le reubot deungon jugi  
Tan pancuri nanggroe Bangta

Nyang meucandu ngon meumadat  
Neyue ikat uleh Bangta  
Jroh that ade hukom deelat  
Neuyue sasat peue nyang ada

Ureueng neuyue peubuet ibadat  
Hukom kreueh that hana tara  
Jroh that hukom raja deelat  
Timu Barat seunang raya

Lagi alem Bangta Kumari  
Akan Rabbi that takeuwa  
Hukom ade hana sakri  
Bangta Kumari nyo eelia

Padum lawet teuma akhe  
Ngo boh ate lon calitra  
Ureueng nanggroe peurdawaan  
Lon peugah ban he syeedara

Tayeuken teumaga jimeuseunoh  
Jimeupoh-poh sabe dara

Nyang ureueng po jikheun pancuri  
Jitaki ureueng po areuta

Nyang po areuta na taturi  
Ma Si Nyak Ti asai mula  
Ma Si Nyak Ra nyang teumaki  
Ma Si Nyak Ti beungeh raya

Di ureueng po jikheun meunoe  
Tayeuen nyoe areuta hamba  
Du Si Darapi nyang peuwoe  
Geujak bloe u Singapura

Limong ringget dilee geubloe  
Geupeuwoe geujok bak hamba  
Ma Si Nyak Ra jikheun meunoe  
Tayeuen nyoe lon po areuta

Yoh nyan dawa hana padoe  
Bandua droe meuseurapa  
Narit gajah keu deh keu noe  
Hana sunyoe siat reuda

Ureueng lingka peurab keu nan  
Ba inong nyan ubak raja  
'Oh troh keu nan geuyue hukom  
Deungon tayeuen sajan geuba

Na tadeungo deelat payong  
Dua inong ka meudawa  
Teuma raja neukheun meunoe  
U meuligoe keu deh taba

Jak ba laju u meuligoe  
Bak Putroe Rakna Keumala  
Bah jihukom ureueng binoe  
Lon eu ujoe putroe muda

Neumeung kalon putroe cantek  
Dumna lisek Rakna Keumala  
Teuma jiba bandua droe  
Ubak putroe judo Bangta

**Ma Si Nyak Ra phon meungadu**  
Po cut teungku deungo hamba  
Ulon po cut gadoh tayeuen  
Na sibuleuen bak lon kira

Teuma jinoe ka meuteumeu<sup>ng</sup>  
Jinoe hukom po cut raja  
Insya Allah putroe seuot  
Ube patot wahe cutda

Teuma putroe laju sudi  
Bak ma Siti neupareksa  
Na tadeungo ma Si Nyak Ti  
Tayeuen pane asai mula

**Ma Si Nyak Ti seuot meunoe**  
Tayeuen geubloe le du si Dara  
Phon dilee kon nibak lon nyoe  
Troh an jinoe tan meutuka

Teuma marit putroe mugleueng  
Neutanyong bak ma Si Nyak Ra  
Padum are asoe tayeuen  
Cuba takheun lon ngo nyata

Adat tasukat dum na asoe  
Takheun iinoe uleh gata  
Ma Si Nyak Ra ka jjiem droe  
Hana sapeue le suara

Hana sapeue teubiet tuto  
Ka teupako hana haba  
Tanyongpi han jaweuebpi tan  
Tahe mandang mantong saja

Teuma seuot ma Si Nyak Ti  
Wahe doli deungo hamba  
Adat ngon kai gantoe are  
Han soe tukri peugah hingga

Nam are breueh asoe meuhad  
Ampon deelat po cut raja

Ka meuhingga asoe tayeuen  
Sukat sadum timang sama

Hana leubeh hana kureueng  
Ban nyang teukheun keubit ri na  
Neuyue sukat asoe tayeuen  
Ban nyang jikheun han meutuka

Keu ma Siti pulang tayeuen  
Tahe hireuen ma Si Nyak Ra  
That bit lisek hana peue kheun  
Cut buleuen Rakna Keumala

'Oh takalon tuan putroe  
Patot lakoe Rakna Bangta  
Nyang meudawa ureueng binoe  
Hukom putroe indah rupa

Hukom guci ngon peunuman  
Cut budiman padubawa  
Putroe hukom miseue bunoe  
Padum asoe neupareksa

Di po Tayan gadoh guci  
Di po Syari gadoh ija  
Di Si Nyak Syam gadoh payong  
Si Nyak Sabon gadoh ceureupa

Bandum ureueng nyang geumadod  
Bak putroe jroh keu nan geuba  
Got nyang dawa ureueng binoe  
Bak putroe putoh peukara

'Oh meuteumeung si pancuri  
Bak Putroe Ti laju geuba  
'Oh troh keu nan geuhukom le  
Jroh that ade hana tara

Hukom ade sidek sasat  
Bandum rakyat ate suka  
Seun-seun sidroe putoh leugat  
Ceureudek that Rakna Keumala

Bandum ureueng neupeusaban  
Bak hukoman hana bida  
Hana miyup hana manyang  
Neutimang bagoe neuraca

Jeuep-jeuep uroe duek meusapat  
Hana siatpi na reuda  
Bandum ureueng galakjih that  
Hukom teupat Rakna Keumala

Got that uko deungon sipat  
Neulihat peuet panca indra  
Ceureudek that si nyak putroe  
Sa ngon lakoe Rakna Bangta

Ureueng inong hukom putroe  
Ureueng lakoe hukom raja  
Meunan sabé geunap uroe  
Bandua droe sama juga

Hingga meugah jeuep-jeuep nanggroe  
Cut putroe indah that rupa  
Abeh meugah nanggroe aseng  
Puteh licen putroe muda

Hingga meugah troh nanggroe Kleng  
Sampoe po lem u Ierupa  
Jeuep-jeuep nanggroe meugah abeh  
Sampoe keu deh u Malaya

Troh meugah u nanggroe Mureh  
Cut puteh Rakna Keumala  
Si nyak putroe bijak areh  
Meugah keu deh nanggroe Cina

Nanggroe Jawa nanggroe Inggreh  
Nanggroe Pareh meugah raya  
Rakna Keumala bungong puteh  
That peureuseh indah rupa

Jeuep-jeuep nanggroe abeh meugah  
Cut indah Rakna Keumala

Teiduek 'oh noe saboh kisah  
Len ulah lon calitra

Di lampoh tapula birah  
Pula lipah bineh pasi  
Amma bakdu he meutuah  
Lon kisah Bangta Kumari

Padum lawet teutap dahsyah  
Deungon zeejah Putroe Siti  
Rakna Keumala putroe indah  
Judo nyang sah Bangta Kumari

Padum lawet akhe masa  
Rakna Bangta ka teukeudi  
Bangta neueh lam istana  
Ngon Cut Rakna nyang juhari

Bak malam nyan leumah lumpoe  
Samlakoe Bangta Kumari  
Malam nyan malam Jumeu'at  
Alamat saboh Tuhan bri

Neulumpoe ie ka u Tunong  
Ngop ngon gampong ie dum ka pe  
Abeh hanyot ngon meuligoe  
Nyankeu lumpoe raja doli

Ban teukeujot bak meulumpoe  
Neiduek neumoe Bangta Kumari  
Teuma jaga tuan putroe  
Pakon neumoe watee sunyi

Adat salah ulonteu nyoe  
Neukoh takue wahe doli  
Rakna Bangta seuot meunoe  
Kon lon teumoe keu hai Nyak Ti

Hana salah gata putroe  
Ulon teumoe leumah mimpi  
Peue tuanku nyang neulumpoe  
Kadang putroe jeuet boh takbi

Lon lumpoe ie ka u tunong  
'Oh tampong pucak meuligi  
Abeh hanyot ngon meuligoe  
Nyankeu lumpoe wahe Nyak Ti

Meunyoe meunan tuanku droe  
Jiprang nanggroe wahe doli  
Talo gampong talo nanggroe  
Ulon sidroe jijak cari

Pakri jinoe deelat payong  
Siri gampong tapeureugi  
Siri nanggroe nyang mee taplueng  
Cuba neukheun wahe doli

Meunan narit putroe meugleueng  
Seuot meuteung Bangta ahli  
Silama jeuet lon mat peudeueng  
Han tom lon plueng wahe Nyak Ti

Silama jeuet lon mat geudubang  
Rayek lam prang Bangta Kumari  
Deungon tulong sidroe Tuhan  
Ulon lawan kaphe 'asi

Silama jeuet lon mat peurise  
Hana lale prang lon cari  
Tulong Tuhan Rabbon Kade  
Bandum kaphe kulhak gaki

Meunan mantong meumot jaroe  
Kuseudoek bek jeuet jihei mi  
Meunyo jiek jipeugajah  
Taeu mirah ie di pasi

Meunyoe jiek jisang-abrang  
Taeu kucang kaphe 'asi  
He adek cut hana wayang  
Taeu cut bang Bangta Kumari

Meuna tuah pusa jaroe  
Baranggasoe han kuturi

'Oh ek mate geureuda pindoe  
Nibak nanggroe bungong darami

Tok Labala teuga han soe  
Lon boh taloe jaroe gaki  
Han lon takot baranggasoe  
Kaphe pindoe musoh nabi

Teuma seuot tuan putroe  
Ampon kamoe wahe doli  
Dalam donya ureueng kaphe  
Dudoee page Tuhan beunci

Meunan neukheun tuan putroe  
Seungap 'oh noe siat lanti  
Bangta neuiem deungon putroe  
Hingga sampoe pagi hari

Beungoh uroe datang faja  
Meuseuranta Bangta Kumari  
Neuyue tet le beude nubat  
Teuka rakyat dum jiili

Uleebalang rakyat nanggroe  
Dum sinaroe troh bak doli  
Geusyik waki wadi meuntroe  
Angkat jaroe bak Kumari

Deelat ampon payong nanggroe  
Keu peue kamoe neuyue ili  
Rakna Bangta seuot meunoe  
Tango kamoe baranggari

Geutanyoe jiprang le kaphe  
Pakri pike cuba rawi  
Uleebalang seuot meunoe  
Ampon kamoe wahe doli

Meuneumeuprang deungon kaphe  
Udep mate ulon rali  
Meusitapak han kamoe cre  
Bahle mate wahe doli

Meutum beude meuble kilat  
Timu Barat su meutaga  
Meunan jikheun uleh rakyat  
Seuot leugat Bangta muda

Meunyo meunan wahe sahbat  
Tulong siat lon le gata  
Peugot kuta jinoe leugat  
Bek le lambat he syeedara

Tajak peugot kuta pasi  
Ato beude deungon lila  
Taikat le ngon pupalang  
Suda pacang glong beurata

Pacang junga beujroh tajam  
Bak meuriam lutong meukra  
Deungon lila sinan sajan  
Wahe tuan Tok Labala

Lom neupeuek paya itek  
Boh meubalek dalam bahtra  
Beuneupeulhok deungon parek  
Bek troh jiek jigrop Cina

Meunan sabda raja deelat  
Beudoh rakyat yoh nyan sigra  
Uleebalang meuntroe meugat  
Dum meupakat jak keurija

Ube neuyue ka jipeubuet  
Hana bacut na meuriba  
Dumna rakyat rayek ngon cut  
Jipeubuet buet sunggoh raya

Nyang kueh parek nyang teumambak  
Dum meusak-sak jikeurija  
Rakyat rame hana peue kheun  
Maseng bulueng peubuet sigra

Padum lawet peubuet sunggoh  
Kuta kukoh hana tara

Parekpi lhok hana macam  
Ngon meuriam lheueng sideupa

Meuriam di atueh madat  
Jitakat u laot raya  
'Oh ban cukop wahe adoe  
Laju jiwoe ubak Bangta

Deelat ampon ka seuleusoe  
Dum sinaroe abeh leungka  
Ban nyang titah tuanku droe  
Seuot meunoe Rakna Bangta

Bangta peugah bak Tok Meuntroe  
Bandua droe Toh Labala  
Na tadeungo bapak meuntroe  
Lon uroé nyoe kujak tapa

Lon jak tapa tujoh buleuen  
Nyoe ulon kheun ubak gata  
Silama goh lon keumbali  
Kuta pasi tayue jaga

Kuta pasi bek tapeusoh  
Silama goh ulon gisa  
Meunan neukheun Bangta indah  
Neupeugah bak meuntroe dua

Meuntroe seuot insya Allah  
Ban nyang titah po meukuta  
Bangta neukek u meuligoe  
Datok Meuntroe woe u tangga

Neupeugah le ubak putroe  
He sambinoe lon jak tapa  
Tujoh buleuen lama sinoe  
He sambinoe idin gata

Nibak para lam meuligoe  
Po samlakoe sinan tapa  
Nibak bilek para meuligoe  
Seupot han soe he syeedara

Han taturi malam uroe  
Seupot tuloe glap-gulita  
Teutap sinan po samlakoe  
Di meuligoe tampong para

Puteh-puteh gapeueh panjoe  
Angen tampoe sret u pasi  
Teutap tapa po samlakoe  
Kisah meuwoe laen lagi

Ulon kisah Raja Mureh  
Deungo beugleh wahe nyak ti  
Meugah putroe di nanggroe jeh  
Bungong puteh that juhari

Raja Cina sosah raya  
Jingo rupa jroh han sakri  
Nyang jeuet meuthee ubak raja  
Ngo syeedara ulon rawi

Sidroe ureueng keu nan teuka  
Jieu rupa Putroe Siti  
Jih jak peugah ubak raja  
He meukuta deungo kami

Nyoe na saboh mutu manikam  
Syahi alam jroh han sakri  
Deungon rupa hana macam  
Cahya hilam sang meuk hari

Nibak nanggroe nyan Hindustan  
Lon eu meunanan wahe doli  
Jroh that rupa hana lawan  
Sang buleuen trang peuet blah hari

Soe nyang kalon ate rindu  
Bungong meulu that juhari  
Patot judo di tuanku  
Asoe leupu alam syahi

Abeh lon jak Barat Timu  
Han tom lon eu nyang meunanan hi

Kulet puteh ban keululu  
Meucahya hu malam hari

Sangat indah putroe linteng  
Hana bandeng baranggari  
Baranggasoe jikeureuleng  
Cut linteng cidah han sakri

Marit utoh rupa cidah  
He deelat syah that juhari  
Ban jideungo dum peuneugah  
Pangsan reubah raja 'asi

Teungeut laju sinan pangsan  
Kaphe jahnam musoh nabi  
'Oh ban puleh nibak pangsan  
Bri salenan uleh doli

Ureueng peugah salen sigra  
Laju kaya le that jibri  
Raja Cina bak masa nyan  
Teungeut yoh nyan kaphe 'asi

Sabab ate that teugian  
Iblih syetan jipadoli  
Salang goh lom deuh jipandang  
Ate girang hana sakri

Bukon paleh aneuk jalang  
Ate bimbang malam hari  
Rindu ate hana tara  
Bungong jeumpa lam seurahi

Yoh nyan kaphe teungeut indra  
Rahsia leumah di sini  
Jilumpoe buleuen purnama  
Trok bak raju u meuligi

'Oh trok keu nan ka jiwa-wa  
Bak jisangka nyo Si Nyak Ti  
Raja Cina syetan tipee  
Hana jithee buet jen pari

Nyankeu sabab nyang jeuet ratee  
Pungo seudee jih di neugri  
Jisangka nyo bungong jeumpa  
Ngon suara miseue bangsa

Bit meutuah lon han tara  
Putroe muda troh keu mari  
Hana payah lon usaha  
Treh meutia dalam jari

Soe ngon tajak intan culot  
He putroe got nyang meubudi  
Bek payah le lon jak seutot  
Toh siri rot tapeureugi

Padum droe ngon he meuh meuntah  
Cuba dengan ubak kami  
Di lon ate sangat dahsyah  
He cut indah Putroe Siti

Pakri tathee ulon bayek  
He adek keumala neugri  
Soe nyang peugah bungong rubek  
Nyang that lisek peugah cakri

Pakri tathee ulon got that  
Pirak lipat jak bak kami  
Ngon meuligoepi tatupat  
Meutuah that bungong giri.

Meunan jikheun lam rahsia  
Ate gila raja'asi  
Ban teukeujot yoh nyan jaga  
Ka meuraba deungon jari

Wahe nyak cut bungong rihan  
He cut intan bek som diri  
Beudoh adek keu noe sajan  
Bungong peukan nyang juhari.

Ka jiraba keu noe keu deh  
Raja paleh reuloh gusi

**Jisangka bintang peureuseh  
Raja Mureh jipoh diri**

Ka jikheh droe bak jimita  
Sang ka gilajih han sakri  
Ho ka tajak bungong kundo  
Bungong ceuko mayen kami

Keu noe taduek dara baro  
E hai judo Nyak Putroe Ti  
Sang gila ate that rindu  
Meuna taeu ateteu gli

Bantai gapeueh ka jiraba  
Bak jisangka Putroe Siti  
Mirah idong kaphe asee  
Bak jicom bee tantai ini

Jicom sabe hana teudoh  
Bantai gapeueh beukah sampe  
Ka meurui-rui gapeueh puteh  
Ija paleh brok han sakri

'Oh ban jithee gapeueh puteh  
Raja Mureh beungeh lagi  
Jicok peudeueng jicang abeh  
Bantai teueh ka jitadi

Beungehjih that Raja Cina  
Jicang teuma bantai ini  
Jinoe kucang kah beuhanco  
Nak teupeurso nyan u bumi

Abeh bandum ka meuhambo  
Cina tahe duek sendiri  
Teuhah babah teuduek tahe  
He teungku e weueh that ate

Baro jithee lam rahsia  
Jipeudaya syetan taki  
Uroe beungoh ka rab faja  
Jihei sigra bujang tandi

Na tadeungo tandi bujang  
Beudoh rijang tapeureugi  
Kajak beutroh jeuep-jeuep simpang  
Yue tren rijang dum sipai

Kayue jitren dum sibarang  
Tungang-tungang bangta Catı  
Bangsa Inggrehpi yue datang  
Dum sibarang biek manjusi

Dum beubeh bansineuna  
Cina-cina ujung pasi  
Bek le tinggai meusidroe na  
Bansimua kayue ili

Ngon Beulanda mata puteh  
Raja Murah beuhe tungang  
Kayue jitren dum beuabe  
Kayue gasek keu cut abang

Raja Bilayat ngon Beulati  
Nyang beurani mat geudu bang  
Laen bandum beukaturi  
Juho Bali nyang le sinan

Juho Lama beukatiti  
U Beulati 'oh kariwang  
Ngon u Banan kapeurengi  
Bek trep lawi keu noe datang

Raja Bugeh Raja Piko  
Beumeusaho keu noe rijang  
Raja Hindupi kapangge  
Bauriang le wahe abang

Raja Paripi kayue jak  
Raja Palak nyang guransang  
Kumeung jak tueng bungong meurak  
Beutroh jijak uleebalang

Dan lagi lom kapeugah kri  
Laen neugri kumeung jak prang

**Lon jak tueng Cut Putroe Siti  
Kapeugah kri wahe bujang**

Bujang deungo haba meunan  
Bak masa nyan jijak rijang  
Jikrah rakyat laju yoh nyan  
Gong ngon canang rot bineh blang

Ban raja kheun ka jipeugah  
Jitren pantah siat datang  
Rakyat jitren taeu bobah  
Ureueng meugah hana macam

Abeh jitren Raja Inggreh  
Ngon Peuranceh that guransang  
Rakyat le that meuleulapeh  
Puteh-puteh mirah hitam

Laju jitren dumna rakyat  
Timu Barat laju datang  
Tunong Baroh jeuoh ngon rab  
Jitren le that hana reunggang

'Oh sare troh dum meusapat  
Ka jideelat le sulton  
Jitanyong le deungon pakat  
Pajan troh had peubeudoh prang

Peugah laju wahe deelat  
Kumeung ikat nyang meulawan  
Raja Cina seuot pantah  
Ngo lon peugah he cut abang

Lon meung jak tueng bungong mirah  
Ate dahsyah uroe malam  
Nibak nanggroe nyan Hindustan  
Jroh hana ban wahe adoe

Nyankeu putroe nyang analan  
Cut budiman that sambinoe  
Beule gaseh dumna tuan  
Pakri jalan tapeugah proe

Jiseuot le uleebalang  
Ampon laman payong nanggroe  
Ban nyang hajat syahi alam  
Kamoe julang dum sinaroe

Meunan jikheun Raja Inggreh  
Ate puleh mangat asoe  
Wahe nujum taeu surat  
Raya hajat ulon sidroe

Teuma nujum jilop kitab  
Jikalon bab teuma jinoe  
Teuma jikheun ube teupat  
Ubak deelat raja pindoe

Teutapi troh ban nyang hajat  
Payah that bak taprang nanggroe  
Raya tuah Bangta Kumari  
Judo Siti that seureuloe

Limong ureueng nyang geuturi  
That beurani judo putroe  
Banlimong droe that pahlawan  
Ngo junjongan lon bileueng soe

Sidroe geukheun Silasiman  
Nagasilan nama adoe  
Nyang keutiga Bangta Sawang  
Nyankeu sibang judo putroe

Lagi utoh that pahlawan  
Beuhe tunggang teuga han soe  
Teuma keupeuet Bangta Silah  
Deungo beusah tuanku droe

Nyanpi utoh beuhe leupah  
Rupa indah hana bagoe  
Nyankeu parui Bangta Kumari  
Judo Siti Lason Putroe

Beuhe tunggang hana sakri  
Wahe doli tanglong nanggroe

He tuanku ka neuturi  
Neukeutahwi uroe dudoe

Nyankeu lakoe Putroe Lason  
Bungong sukon lon peugah proe  
Ban raja ngo nujum peugah  
Yoh nyan pantah seuot meunoe

Meunyo meunan pakon gundah  
Rava payah laba dudoe  
Raja Cina kheun bak rakyat  
Jak lhom leugat kapai beusoe

Nak tabungka jinoe leugat  
Tarapat bahtra sinaroe  
Lheueh peurintah nibak deelat  
Peutren leugat sigra jinoe

Ase kapai dum ka leungkap  
That bit cakap taeu bagoe  
Padum bidok deungon gurap  
Peujap-jap nyang that seureuloe

Padum banteng ngon beuncalang  
Kuangkang nyang lapeh beusoe  
Laen nibak nyan dum sibarang  
Deungon tongkang indah han soe

Peudieng beude ngon seunapang  
Lam kuangkang ka jipasoe  
Ngon meuriam han peue peugah  
Le that syekah raja pindoe

Beudejih le han teupeugah  
Keumurah meutatah beusoe  
'Oh ban cukop sileungkapan  
Bungka yoh nyan aneuk bisoe

Teuma jitet beude nubat  
Jibeurangkat raja pindoe  
Nyan alamat raja beurangkat  
Meunan adat dilee puroe

Sigo sapo peulheueh meuriam  
Rasa ka lham gampong nanggroe  
Reumbang buleuen keunong pasa  
Saoh bahtra jilet jinoe

Jibet saoh jiboh layeue  
Angenpi kheue hana bagoe  
Phon-phon jicre nanggroe Mureh  
Ate puleh raja pindoe

Kapai jiplueng jroh meubareh  
Meulapeh taloe meutaloe  
Uroe malam jimeulayeue  
Angenpi kheue jipot keudroe

Kapai jiplueng sangat tajam  
Angen hantam hana padoe  
Lapan buleuen peulayaran  
Ka troh tuan ujong nanggroe

Leumah gampong putroe intan  
Meureuntang kuta sinaroe  
Nyankeu nanggroe Hindustan  
Ka troh keu nan raja pindoe

Jimeung jak tueng cut analan  
Aneuk Sakdan nyang sambinoe  
'Oh troh keu nan kaphe biyoh  
Jimeupiyoh dum sinaroe

Yoh nyan beude laju jicoh  
Geudeungo troh le Tok Meuntroe  
Sigo sapo jitet beude  
Teukeujot le raja nanggroe

Poteu raja ka neukheun le  
Kuta pasi tajak pasoe  
Kadang ka troh Raja Cina  
He peurdana Datok Meuntroe

Jak eu laju bek le lama  
'Oh ka nyata teuma tawoe

Datok Meuntroe deungo meunan  
Ili yoh nyan ngon rakyat droe

Geungieng kapai dalam laot  
Tihang seupot hana bagoe  
Bandum keu nan ka troh ili  
Kuta pasi ka geupasoe

'Oh ban geungieng ka teumakot  
Leungo atot geumpa asoe  
Nyang ka keu noe leubeh ribee  
Meuree-ree laen han padoe

Le that kapai raja asee  
Han ek sampee lon hareutoe  
Kapai jidong di kuala  
Meubanjan taeu meuriti

Raja Cina le that tantra  
Meuploh laksa dum sipai  
Teuma raja jimeupakat  
Pakri mangat surat tabri

Bah tapeugot saboh surat  
Taintat keu deh u pasi  
Meunoe haba ngo lon peugah  
That bit indah hana sakri

Wahe raja nyang meutuah  
Nyang that indah deungon bakti  
Nyoe he adek Rakna Bangta  
Wahe raja nyang juhari

Lon peuek saboh peunawa  
Nibak hamba datang ini  
Lon peugah ube atoran  
He rakan Bangta Kumari

Lon meunapsu bungong peukan  
Peukayan nyang that juhari  
Meutatakot talo nanggroe  
Intat putroe akan kami

**Galak lon that bungong uroe**  
**Leumah lumpoe yoh di neugri**  
**Meuhan tabri si nyak putroe**  
**Ingar keudroe he.Kumari**

**Hanco kuta deungan mideuen**  
**Si nyak buleuen keu lon tabri**  
**Reuloh nanggroe deungan kuta**  
**Kutueng lanja Putroe Siti**

**Kutueng Putroe Rakna Keumala**  
**Nanggroe teuma lon keumbali**  
**Pisang kucah monteu kudoe**  
**Wadi meuntondum kugasi**

**Gata sidroe kupoh mate**  
**Kuboh bangke nyan u pasi**  
**Meuhan tabri cut putroe jroh**  
**Ureueng kupoh bandum sare**

**Ureueng agam bandum kupoh**  
**Inong nyang jroh kupeukeiji**  
**Kutueng bandum ureueng binoe**  
**Kupeubloe meusikai pade**

**Nyan he Bangta lon peuingat**  
**Toh nyang mangat cuba pike**  
**Meuhan tabri si nyak putroe**  
**Ban kukheun nyoe han ubak le**

**Meunan haba dalam surat**  
**Sang boh langsat layee tangke**  
**Teuma jijok nibak bujang**  
**Jiba rijang hana lanti**

**Jiteungoh le bandua droe**  
**Jipeutoe ubak Kumari**  
**Jijok surat bak Tok Meuntroe**  
**Jibet jaroe jroh han sakri**

**Deelat ampon meukuta nanggroe**  
**Dua kamoe suroh doli**

Teuma seuot Datok Meuntroe  
Toh ba keu noe lon eu pakri

Datok Meuntroe neubeuet surat  
Abeh neulihat bandum isi  
Teuma neukheun ubak Cina  
Singoh gata woe keumbali

Singoh kawoe kah bandua  
Laman ada teungoh pike  
Dang lon peugot surat sinoe  
Nak tapeuwoe he sipai

Tapeuwoe keu Raja Cina  
Bak kamoe na surat meubri  
Datok Meuntroe neuwoe sigra  
Ubak raja neupeureugi

Ubak deelat Sakdan Lila  
Tok Meuntroe ba surat ini  
Lom geupeugah haba surat  
Tanyong pakat jinoe pakri

Dum geupeugah ubak raja  
Surat teuka nyan di pasi  
Abeh geukheun dum sinaroe  
Geutanyong proe jinoe pakri

Teuma raja seuot meunoe  
He Tok Meuntroe deungo kami  
Bek antara tabri putroe  
Meunan jinoe bek jituri

Meunanggroe bek jieu rupa  
Raja Cina kaphe 'asi  
Got tabalah jinoe surat  
Tameupakat ini hari

Haba surat ngo lon peugah  
Ngon bismillah phon tamula  
Nyang ujung nyan wahe sahbat  
Ini surat Raja Cina

Wahe ureueng raja kaphe  
Jak keumbali woe u tangga  
Pakri kubri tuan putroe  
Jroh sambinoe hana tara

Jikhem mantong yum sikatoe  
Kilat gigoe yum sibara  
Rupa cidah kulet puteh  
Urat beuteh deuh u lua

Hana kubri jakleh kawoe  
Asee ragoe kajak mita  
Wahe raja nyang seureuloe  
He aduen droe Raja Cina

Adat di gop pane geuwoe  
Meutan putroe malee raya  
Teuma di kah pakon malee  
Muka asee biek meurua

Dum ruman kah jak tueng putroe  
Kusangka soe pane raja  
Bek antara kubri putroe  
Meunanggroe bek kaeu rupa

Silama deuh kueu nanggroe  
Kucang jinoe bansineuna  
Pat meugah kah bak makeu putroe  
Bandua droe dukeu raja

Meunyo bak kee aneuk bisoe  
Kuseudoe bek jan kahei ma  
Meunan haba dalam surat  
Jiintat keu Raja Cina

Dua ureueng peuwoe surat  
Ngon siat ka troh lam bahtra  
Ubak raja jijok leugat  
Nyoe surat geubri le raja

Ban jideungo haba surat  
Beungehjih that Raja Cina

Teubiet reuoh yo meutat-tat  
Nyum jilumpat dalam kuta

Teuma jikheun ubak guree  
Pakri lagee na kutika  
Guree seuot pantah rijang  
Got that reumbang po meukuta

Raja Cina peubeudoh prang  
Alam hitam jeuep-jeuep peukara  
Jitet laju ngon meuriam  
Jitunam ban siseun lingka

Jitet laju hana teudoh  
Grum sireutoh grum silaksa  
Meusu beude tango 'am-'um  
Keutam keutum keunong kuta

Jitet laju jipeugrum-grum  
Nyang meutum han le sigo na  
Su meuriam hana teudoh  
Ma teungku beh that meutaga

Jitumpoh lom lila gaboh  
Cina utoh hana tara  
Sang-sang reuloh kuta runtoh  
Beude jicoh dalam bahtra

Nyang di daratpi tan teudoh  
Seun sireutoh hana reuda  
Datok Meuntroe beude geucoh  
Kapai tumboh seun-seun dua

Ureueng nanggroe dum abeh troh  
Beude geucoh keunong bahtra  
Nyang di laotpi tan lale  
Miseue geuple ie lam tima

Di daratpi hana piyoh  
Maken sunggoh nibak nyang ka  
Nibak nyang ka that nyoe seuuem  
Meugum-gum taeu han reuda

Teuma geutet Iku Lutong  
Hanco kurong' kapai Cina  
Lom ka geutet Dagang Rampong  
Kapai keunong beukah dua

Hana reuda kapai keunong  
Tango kingkong ureueng Cina  
Teuma geutet Lada Sicupak  
Aneuk meupantak keunong bahtra

Nyang di darat that meusigak  
Jitambak bak kapai Cina  
Sinoe meutum keu deh meubhak  
Taeu pipak kapai raya

Kapai Cina le that rusak  
Keunong timbak Tok peurkasa  
Nyang di laotpi jilantak  
Taeu pipak pageue kuta

Raja Cina maken galak  
Deumpek surak hana reuda  
'Oh jitimbak ka meuhambo  
Teupeuro kuta kuala

Raja Cina maken seuu  
Jiek laju han ban peubla  
Han jikira nyang ka mate  
Raja kaphe that guranta

Jiek laju jipeugam-gam  
Lheueh meuriam Tok Labala  
Sinoe meutum lheueh meuriam  
Keu deh meutam keunong bahtra

Na siribee kapai han le  
Kreueh that ate hana tara  
Laot ceukoe darah ile  
Le that mate ureueng Cina

Eungkot lam ie mangat ate  
Pajoh bangke hana reuda

Mangat ate yee ngon paroe  
Jitalak droe sang keurija

Datok Meuntroe timbak leugat  
Neutakat bak kapai Cina  
Kaphe pindoe le that rakyat  
Maken le that teuka bahtra

Nyang di darat timbak sunggoh  
Hana teudoh meusu lila  
Kapai karam meuploh reuron  
Dum geusampoh keunong lila

Maken jiek laju sunggoh  
Raja biyoh le that tantra  
Pakri jinoé cuba peugah  
Pakri ilah taprang kuta

Lon keumeung woe raya sosah  
Sabab leupah tuto hamba  
Bahle mate nibak malee  
Kareuna kee leupah haba

Maleeku that meutan putroe  
Han lon jeuet woe le u Cina  
Wahe guree pakri laku  
Tacuba eu na kutika

Cuba taeu dalam surat  
Pakri adat taprang kuta  
Guree seuot ampon deelat  
Singoh meuhad na kutika

Teiduek 'oh noe wahe adoe  
Seupot uroe laju sinja  
Duek meupiyoh bak malam nyan  
Sikalian ureueng Cina

Tanyong pakat ubak rakan  
Pakri ban prang lom tamula  
Lon meung hajat putroe intan  
Ulon tuan sangat hawa

Meuhan meuteumee si nyak putroe  
Han le lon woe nanggroe Cina  
Sabab dilee ka lon lumpoe  
Yoh di nanggroe he adekda

Jinoe nyankeu pakri lon woe  
Meuputroe goh lon eu rupa  
Adat mate ulonteu nyoe  
Lam bumoe han seunang hambé

Cit teuingat geunap uroe  
Keu putroe nyang bayek rupa  
Adat meuna meusimalam  
Putroe intan ka lon rasa

Meunan jikheun raja pindoe  
Bak sinaroe rakyat nyang na  
Beungoh uroe datang siang  
Jatoh kalam nibak raja

Beudoh laju wahe bujang  
Uroe nyoe prang leubeh raya  
Ban jideungo haba meunan  
Jiek yoh nyan dalam bahtra

Kapai bandum ka meusapat  
Jikarat u gaki kuta  
Kaek laju bek katakot  
Nyang mawot bek le kakira

Ureueng lakoe kapoh mate  
Cut Putroe Ti keu noe kaba  
Nyang di rakyat bahle buet kah  
Putroe indah bah buet hambar

Han kutakot meunyo putroe  
U meuligoe kujeuet hila  
Meunan jikheun raja kaphe  
Jiek sare balatantra

Jiek laju kaphe asee  
Le that sukee si ceulaka

Nyang pahlawan dong di ulee  
Hana lagee hibat rupa

Datok Meuntroe tet meuriam  
Maken tajam jiek lanja  
Nyang mate ka sinan simpan  
Laen teelan jiek sigra

Ban sare toe deungon darat  
Jilumpat seun-seun silaksa  
Dalam laot dum jilumpat  
Jikarat u gaki kuta

Ngon pahlawan nyang hibat-hibat  
Beusoe tungkat ube-be pha  
Jigrop bandum le u darat  
'Oh jilumpat tinggai bahtra

Ban geukalon le Tok Meuntroe  
Beungeh tuloe hu ngon mata  
Neumat peudeueng le u jaroe  
Lumpat jinoe dalam tantra

Tok Labalapi beungeh that  
Neulumpat u lua kuta  
Bandua ngon Datok Meuntroe  
Neugrop jinoe dalam tantra

Neusuet peudeueng ka neulikak  
Neupeusak lam kawan Cina  
Dua Datok sangat rancak  
Bak neumeutak utoh raya

Laen rakyat dum sinaroe  
Ho Tok Meuntroe tanyong sigra  
Meunan bandum jeuep-jeuep babah  
Ho ka leupah gop nyan dua

Pakri tadong dum geutanyoe  
Kuta nanggroe ka troh Cina  
Jimeung cok po cut geutanyoe  
Kaphe pindoe biek ceulaka

Kuta pasi yoh nyan ka soh  
Hana saboh tinggai nyang na  
Dumna rakyat abeh jiwoe  
Jipeutoe bak Sakdan Lila

Raja tanyong pakon tawoe  
Dum sinaroe seuot sigra  
Ampon deelat deungo kamoe  
Datok Meuntroe han meuho ka

Ampon deelat payong nangroe  
Kaphe ka doe di kuala  
Nyang awai plueng Datok Meuntroe  
Teuma dudoe Tok Labala

Nyankeu sabab meuplueng kamoe  
Han le sidroe nyang kuasa  
Teiduek haba ureueng nyang woe  
Datok Meuntroe lon calitra

Tok Labala ngon Tok Meuntroe  
Aduen adoe gop nyan dua  
Makna datok na tatusoe  
Adat sinoe po bentara

Neumeutak tham hana padoe  
Bandua droe that peurkasa  
Ureueng Cina jiek leugat  
Jilumpat nyang gasa-gasa

Datok Meuntroe sang meukarat  
Neueu rakyat sidroe hana  
Nyang na tinggai dua gop nyoe  
Aduen adoe laen hana

Rakyat laen abeh jiwoe  
Datok Meuntroe meunyum lia  
Lia ate hana sakri  
Ureueng han le na seulala

Teuma timoh dalam ate  
Pakri pike tabicara

Jiteumeung drop jipeutaloe  
Cit dua droe laen hana

Ureueng Cina jiek leugat  
Jilumpat nyang teuga-teuga  
Datok Meuntroe nyum teumakot  
Geusurot seun-seun sideupa

Neusurot bukon keumeung plueng  
Ujong peudeueng ateueh Cina  
Trok bak kuta bineh nanggroe  
Teuma jiwoe si ceulaka

Kuta nanggroe bandum peunoh  
Rakyat damoh meuploh laksa  
Nyankeu kuta Raja Sakdan  
Yoh masa prang deungan Bangta

Kuta pasi dum sinaroe  
Ka jipasoe uleh Cina  
Le that rakyat raja pindoe  
Geunap uroe teuka bahtra

Raja Cina meuhei guree  
Kalon dilee na kutika  
Teuma seuot uleh guree  
Uroe nyang lhee wahe raja

Bek kheun meunan wahe guree  
Sabab bu di kee trep ka hana  
Bek he guree neumeutanggoh  
Pijuet tuboh kamoe raja

Meuna gaseh nyan keu kamoe  
Bak uroe nyoe taprang kuta  
Rindu ate lon han bagoe  
Keu putroe nyang ilok rupa

'Oh lon ingat yoh lam lumpoe  
Hana bagoe galak raya  
Yoh nyan guree ka jjiem droe  
Hana sapeue le suara

Raja Cina peubeudoh prang  
Jikheun rijang bak panglima  
He pahlawan peue lom kae  
Ka grop keu deh nyan u lya

Ban jideungo haba meunan  
Jigrop yoh nyan seun silaksa  
Jihei sare ngonjisurak  
Jipeusak u gaki kuta

Ka neuteubiet Datok Meuntroe  
Bandua droe Tok Labala  
Deungan rakyat meuploh katoe  
Neuke jinoe atueh Cina

Ngon peurise keutupong beusoe  
Di jaroe peudeueng ngon cokma  
Ban meuteumeung dua pihak  
Phon geumeutak mula-mula

Ka geunari sang diwangkat  
Kuasa that datok bandua  
Ateueh Cina geuk leugat  
Neulumpat meugisa-gisa

Laen nibak nyan dumna rakyat  
Ka jikarat bandum rata  
Bak uroe nyan prang meuhayak  
Mate rusak han ek kira

Le that mate dua pihak  
Tangkurak sang bruek lam raga  
Ngon busu bleuet han teupeugah  
Keumurah han ek takira

Rakyat mate that barollah  
Sidroe Allah thee sibeuna  
Rot Islam meunyum kuyu  
Geuwoe laju dalam kuta

Troh lam kuta geutop pinto  
Bek jilalo ureueng Cina

Rakyat Cina jiek leugat  
Jikarat u gaki kuta

Dum pahlawan nyang hibat-hibat  
Ngon tungkat beusoe meulila  
Rakyat Cina jiek leugat  
Jilumpat u dalam kuta

Kheundak Tuhan Po Nyang Ghani  
Ka beureunti si ceulaka  
Ngon grak Tuhan ka teukeudi  
Bangta Kumari ka troh tapa

Tujoh buleuen dilee janji  
Po tallah bri troh ban pinta  
Ban teukeujot Bangta Kumari  
Neudeungo le sangat kubra

Teuma neutren neupeureugi  
Bak Cutti Rakna Keumala  
Rakna Bangta teuma sudi  
Peue he Nyak Ti kiam subra

Putroe seuot ampon doli  
Ka troh kaphe ureueng Cina  
Ban neudeungo haba meunan  
Neutren rijang Rakna Bangta

Bangta lumpat laju u leuen  
Deungon peudeueng sajan neuba  
Leupah deurah neuplueng leugat  
Ngon siat ka troh bak Cina

Ureueng Cina jiek leugat  
Jimeung lumpat dalam kuta  
Ban neukalon jimeung lumpat  
Neucang leugat seun-seun dua

Ureueng Cina dum meulipat  
Tajampi that Rakan Bangta  
Taeu neugrop le neulumpat  
Miseue kilat tajam raya

Datok Meuntroe mangat ate  
Yue peuhan le pinto kuta  
Teubiet laju bansinaroe  
Mangat asoe ka na raja

Mangat ate hana bagoe  
Datok Meuntroe Tok Labala  
Neumeutak le han peue pike  
Udep mate han neukira

Tok Labala ngon Tok Meuntroe  
Neuseudoe kaphe Beulanda  
'Oh ban neutak aneuk bisoe  
Teupipoe mate meuкеuba

Rakna Bangta nyang pantah that  
Neulumpat u teungoh laksa  
U Timu sigo meulumpat  
U Barat siseun neugisa

Neucang kaphe han teukhimat  
Ho neupeunap ka seureupha  
Ureueng Cina sang meukarat  
Neucang leugat han ban peubla

Neucang laju han peue pike  
Ka mate nyang gasa-gasa  
Ureueng Cina meunyum kuyu  
Jiwoe laju dalam kuta

Rakna Bangtapi ka neuwoe  
Dum sinaroe tuha muda  
Rot deh rot noe ka meuwoe-woe  
Ureueng nanggroe ureueng Cina

Hingga malam deungan uroe  
Ubak putroe neuwoe Bangta  
Bak malam nyan baro neueh  
Ngon cut puteh nyang jroh rupa

Beungoh uroe puteh Timu  
Neungo 'a-'u ureueng Cina

Jipeh geundrang deungon tabo  
Sare a—o neungo subra

Tango jipeh ngon geudrang prang  
That guransang nibak nyang ka  
Rakna Bangta teubiet rijang  
Deungon rakan dum sineuna

Geupleh tambo yup napiri  
Keucapi ngon gambang wangsa  
Yup beureugu ngon hareudam  
Tarek alam rupa-rupa

Yup seurune ngon napiri  
Keucapi hareudammama  
Le that lagee hana sakri  
Ureueng nari dalam tantra

Jiek laju taeu meuprak  
Ka meurumpak kawan Cina  
'Oh meuteumeung dua pihak  
Jimeutop tak han ban peubla

Padum mate keunong kapak  
Padum rusak keunong cokma  
Han ek pike mate rusak  
Darah ulak dum u lua

Datok Meuntroe peulheueh leumbeng  
Ka meupateng lam pruet Cina  
'Oh keunong reubah meupunggeng  
Buet leumbeng mata meulila

Nyang mate han ek tapeugah  
Nyang patah han ek takira  
Rakyat laen le that reubah  
Nyoe lon peugah Rakna Bangta

Neusuet laju peudeueng leuntek  
Neureutek lam kawan Cina  
Seun-seun dua ka meubalek  
Bungong rubek that guranta

Le that mate dum teugageueng  
Keunong peudeueng Rakna Bangta  
Ka teubiet pruet dum meugule  
Nyang mate tujoh ploh laksa

Meusyeut neugrop meutam neutak  
Bit that rancak Bangta muda  
'Oh ban keunong nibak talak  
Ka teukeupak hilang nyawa

Rakyat laenpi tan teudoh  
Bandum sunggoh meuprang lanja  
Rot noe rot deh tango kiroh  
Ma teungku beh that meutaga

Datok Meuntroe han peue pike  
Neucang kaphe kawom Cina  
Tok Labala meusyeut neugrop  
Meuleubob neutak Beulanda

Keunong takue ulee ka sret  
Laju mawot sinan fana  
Cina balah tadeungo bub  
Meuleuub jipoh ngon cokma

Uroe nyan prang that klam-kabot  
Uroe seupot han jikira  
Ureueng Cina meunyum kuyu  
Trox le bantu dalam kuta

Yoh nyan jiek nyang pahlawan  
Mando Silan that peurkasa  
Nyang adoe nyan Mando Deungi  
Nyanpai ahli lam prang raya

Cit pahlawan bak barangri  
Ngon beurani hana nyang sa  
Nibak jaroe jimat tungkat  
Beusoe bulat na ube pha

Nyankeu cokma di jih alat  
Panyang meuhad siploh deupa

Jiek laju seuu galak  
Ka meurumpak Tok Labala

Tok Labala teungoh meutak  
Jikheun sikrak meunoe haba  
Meunoe jikheun Mando silan  
He pahlawan nyang that teuga

He Tok Meuntroe keu noe siat  
Nyoel tungkat tacuba rasa  
Bek baroe kon guransang that  
Tacang rakyat han takira

Jinoe ngon kee cuba peurab  
Bek bak rakyat beuhe gata  
Kaci peurab laju keu noe  
Ngon tungkat nyoe hilang nyawa

Tok Labala seuot pantah  
Adat ngon kah han kutaba  
Han kutakot baranggasoe  
Kah uroe nyoe kucang saja

Teugo raya kasangka droe  
Bak gigoe kupeh ngon nuga  
Hana payah keunong peudeueng  
Meukah ureueng bangsa Cina

Mada kutrom deungon gaki  
Biek kaphe seumbah beurala  
Tok Labala neukheun meunan  
Mando Silan beungeh raya

Datok Meuntroepi ka keu nan  
Teudong yoh nyan sapat dua  
Mando Silan jibet tungkat  
Jipoh leugat ureueng tuha

Ban meulayang jibet tungkat  
Neulumpat ban kilat faja  
'Oh sret tungkat atueh bumoe  
Rub lam anoe na sideupa

Datok Meuntroe tajo leugat  
Neucok tungkat ka neuhil  
Mando Silan peulheueh tungkat  
Jibri leugat ngon jisaja

Jiyue bet bak Datok Meuntroe  
Tagrak jinoe uleh gata  
Meuek tabet tungkat kamoe  
Gata sidroe kuthee teuga

Meunyo teuga he Tok Meuntroe  
Ek tabet nyoe tungkat hamba  
Datok Meuntroe geubet tungkat  
Abeh kuat ngon kuasa

'Oh ban neubet keumeung tatang  
Meuilang reubah meugisa  
Ban jingieng han ek neutatang  
Jicok pulang ka jihila

Mando Silan jikheun meunoe  
Kusangka soe le that haba  
Meutungkat kee han ek tabet  
Tajeuet seuot tuto ham ba

Jinoe gata kupoh mate  
Le that syawe bak meuhaba  
Mando Silan jibet tungkat  
Jipoh leugat ureueng dua

Jipoh keu deh geugrop keu noe  
Datok Meuntroe Tok Labala  
Meukarat that bandua droe  
Cina pindoe poh han reuda

Neukeumeung plueng takot malee  
Hana lagee sosah raya  
Bangta kalon Datok Meuntroe  
Jiseudoe jipoh ngon cokma

Ban neukalon sang meukarat  
Neulumpat pantah ban guda

'Oh troh keu nan neukheun meunoe  
He Tok Meuntroe surot gata

Rakna Bangta neubet peudeueng  
Meuleupeung neutak bak muka  
Mando Silan meunoe jikheun  
He nyak buleuen soe nan gata

Kueu rupa that samlakoe  
Bek ngon kamoe tameuseunda  
Bangta seuot peue na salah  
Adat ngon kah peue na suka

Ka katanyong ngo kupeugah  
Mangat sah katusoe nama  
Ngat katuri nama kamoe  
Cina pindoe singoh lusa

Nyokeu judo Putroe Siti  
Bangta Kumari geuhei nama  
Anek Raja Tajul Baki  
Na katuri he beulaga

Ban jideungo meunan macam  
Mando Silan buka baba  
Meunyo meunan he samlakoe  
Jak cok putroe keu noe taba

Yoh goh mate gata adoe  
Bek ngon kamoe tameudawa  
Nyan he adek lon peuingat  
Toh nyang mangat nibak gata

Suka mate suka udep  
Takheun beusep nibak hamba  
Sabab gata adek payong  
Sayang that lon mantong muda

Soe got mate ngon tan putroe  
Takheun adoe lon ngo nyata  
Nyang got he nyak beudoh tawoe  
Tacok putroe keu noe taba

Keu putroe nyan bek le tasyen  
Mita laen nyan di gata  
Nyang putroe nyoe taniet tan le  
Ka mate taniet baroe sa

Jak cok laju bungong keumee  
Yoh goh paddee keunong cokma  
Bangta seuot meunoe teuntee  
Judo asee jeumba gata

Judo ulon bek meuteuoh  
Kujeuet proh beubeukah muka  
Bak beurujuek takheun campli  
Bak keudidi takheun suda

Han teumakot Bangta Kumari  
Hana meugli bulee mata  
Poteu Allah tulong kamoe  
Meukah sidroe kulheuep muka

Dum ruman kah jak cok putroe  
Kusangka soe pane raja  
Ban jideungo tuto seungkoe  
Beungeh han soe siceulaka

Jibeuet le cokma beusoe  
Jipoh jinoe Rakna Bangta  
Jipoh keu deh neugrop keu noe  
Samlakoe pantah hana sa

Rakna Bangta neubet peudeueng  
Neutak meupeung keunong muka  
Meusigeutu han jipajoh  
Peudeueng guroh bibeue mata

Jiteubiet meuk hu seumeuloh  
Han jipajoh si ceulaka  
Mando Silan beungehjih that  
Deungan tungkat jipoh Bangta

Hana keunong po samlakoe  
Rub lam anoe tungkat raya

Rakna Bangta teugom tungkat  
Jibri leugat ngon jisaja

Bak jisangka han ek neubet  
Han jitakot keu Cut Bangta  
Rakna Bangta tungkat neubet  
Neupoh meuhuet si ceulaka

Hana keunong pantah jigrop  
U likot pantah ban guda  
Mando Silan teulahjih that  
Jibri tungkat ngon jisaja

Jinoe di jih han le alat  
Neupoh leugat han ban peubla  
Jithee teuga po samlakoe  
Tungkat beusoer sang geulawa

Mando Silan meunyum kuyu  
Tungkat meusu bak-bak muka  
Neupoh keu noe jigrop keu deh  
Kaphe paleh pantah raya

Ujong tungkat sret u bumoe  
Rub lam anoe na sideupa  
Mando Silan tajo jinoe  
Tungkat beusoe ka jihila

Meutarek-tarek keu deh keu noe  
Meusogumoe meuhue hila  
Rakyat laen tahe keudroe  
Jikalon nyoe ureueng dua

Meuhue keu deh meuhue keu noe  
Bandua droe sangat teuga  
Mando Silan hila tungkat  
Payahjih that hana tara

Teubiet reuoh dum meutrap-trap  
Jikarat laju jihila  
Rakna Bangta marit leugat  
Bek bak tungkat beuhe gata

Peurab keu noe tameureupah  
Bek tagagah tungkat raya  
Mando Silan seuot pantah  
Han peue salah meungon gata

Cit baroe kon bron that badan  
Hana lawan sabé padra  
Bak meureupah galakjih that  
Jitiék tungkat han ho jiba

Jigrop lambong keutep jaroe  
Mangat asoe hana tara  
Bakjisangka teuga that droe  
Kaphe pindoe that guranta

Rakna Bangta marit rijang  
Bek guransang he ceulaka  
Peurab laju tameureupah  
Bek beurakah meujuara

Mando Silan teuma peurab  
Jikeumeung mat Rakna Bangta  
Neumeutak tham keu deh keu noe  
Bandua droe pantah raya

Neutham keu noe jigrop keu deh  
Kaphe paleh sangat caca  
Rakna Bangta beungehneu that  
Neulumpat pantah ban guda

Neutajo miseue bubiri  
Bak gaki ka neudrop sigra  
Neuget lambong ka neusumpom  
Ka neutrom di muka-muka

Nyoe karasa rimueng teugom  
Jinoe peue lom he ceulaka  
Mando Silan jikheun yoh nyan  
Bek ngon laman tameuseunda

Bangta giduek Mando Silan  
Ka troh keu nan Tok Labala

**Neukoh takue le neureupang  
Mando Silan mate fana**

'Oh ban mate Mando Silan  
That sukaan Rakna Bangta  
Dumna Islam mangat ate  
'Oh mate pahlawan Cina

**Urēueng Cina kuyu ate  
Ka jiwoe le dalam kuta  
Rakna Bangtapi ka neuwoe  
Ubak Putroe Rakna Keumala**

Tok Labala Datok Meuntroe  
Bandua droe woe lam kuta  
Deungon tungkat gop nyan peuwoe  
Tungkat beusoe ureueng Cina

Teuduek haba Datok Meuntroe  
Bandua droe Tok Labala  
Rakna Bangta teuduek 'oh noe  
Lon kisah nyoe ureueng Cina

Raja Cina that meupot-pot  
Jiceumarot hana reuda  
Pakri laku ulon sidroe  
Hana putroe lon eu rupa

Han ek talo jinoe pakri  
Judo Siti sangat teuga  
'Oh ek jipoh Mando Silan  
Nyang pahlawan beuhe raya

Pakri jinoe rot tapadan  
Beutalo nyan Rakna Bangta  
Lon keumeung woe meuhad malee  
Pakri lagee ngon bicara

Le that inong nyang ka balee  
Jicarot kee jiseurapa  
Jinoe nyang got han kuwoe le  
Udep matepi kurela

Ho ka gata tandi bujang  
Jakleh riwang di kah dua  
Kajak seutot adoe kamoe  
Beutroh keu noe laju teuka

Adoeku nyan le soe takot  
Raja Pupot geuhai nama  
Nyang jeuet geukheun Raja Pupot  
Miseue ribot nafah raya

Yoh masajih baro jeuet jak  
Raja Palak geuboh nama  
'Oh rayekjih le soe takot  
Raja Pupot geuheu teuma

Jakleh tatueng yue jak keu noe  
Lam buleuen nyoe beutroh teuka  
Yue ba kapai meuploh ribee  
Pahlawan mee meupeuet laksa

Kapeugah han le kuwoe kee  
Sabab malee putroe hana  
Meuna gasehjih keu kamoe  
Jak tueng putroe keu syeedara

Meunan kakheun jakleh kawoe  
Ban kukheun nyoe bek meutuka  
Meunyo hana si nyak putroe  
Han kuwoe barangjan masa

Jak woe bagah bandua droe  
Amanah nyoe bek meutuka  
Bujang deungo haba meunan  
Jiwoe yoh nyan le bandua

Jiek sampan dayong leugat  
Jipeuteupat laot raya  
Sampan jiplueng tajampi that  
Angen got that keunong pasa

Han padum trep jibeurangkat  
Ka troh meuhad nanggroe Cina

'Oh troh keu deh peugah rijang  
Ban nyang kalam nibak raja

Awai akhe ka jipeugah  
Ban nyang titah Raja Cina  
Raja Pupot ngo peuneugah  
Muka juah jiek bisa

Bak masa nyan rakyat jikrah  
Dum kafilah jiyue teuka  
Teutap 'oh noe saboh kisah  
Ulon peugah Rakna Bangta

Rakna Bangta nyang meutuah  
Bak cut indah Rakna Keumala  
Neueu Cina ka jjiem droe  
Ka lhee uroe tan keulue

Hana jiprang ka lhee uroe  
Jjiem droe han sapeue haba  
Nyang ka dilee baranggajan  
Jijak meuprang gura-gura

Teuma jinoe seunggap diam  
Pakon meunan peue kareuna  
Rakna Bangta pike yoh nyan  
Neukheundak prang Raja Cina

Neucok kitab peuhah rijang  
Ka neupandang jeuep-jeuep angka  
Leumah neueu dalam bustan  
Le that rakan Raja Cina

Bujang tandi ka jiyue woe  
Jak tueng adoe nyang peurkasa  
Meunan leumah dalam kitab  
Neukalon ban jeuep-jeuep angka

Rakna Bangta ka teupike  
Bah lon pangge Simansila  
Meunan leumah dalam ate  
Ka neuhei le bayeuen rimba

**Wahe ulon bayeuen indah**  
Ngo kupeugah ulon raja  
Beudoh jinoe kameulangkah  
Kajak peugah bak adekda

**Bak Cuta Lason kajak peugah**  
Bangta Silah nyan bandua  
Kapeugah lon dalam sosah  
Jiprang sudah uleh Cina

**Teuma kawoe di Duson Yaman**  
Kajak keu nan u Biwan Lama  
Peugah ubak Silasiman  
Bandua ngon Silanaga

**Lom kapeugah bak cuta abang**  
Bangta Sawang nyang seutia  
Kakheun ulon jinoe beutrang  
Lon dalam prang meugriet raya

**Ban jideungo sabda doli**  
Ka jipo le pantah sigra  
Seutia that binatang gle  
Meusampe neubloe le Bangta

**Bayeuen jipo tan teudoh le**  
Teulangke bak raja muda  
Neuyue peugah beumeusampe  
Binatang gle that seutia

**Beudoh laju jiteureubang**  
Siwah datang ampeueng sigra  
Sulet bayeuen han jiteumee  
Meuteuntee jak peugah haba

**Bayeuen jipo hana teudoh**  
Hana piyoh jipo lanja  
Na lhee uroe jipo sunggoh  
Hingga troh ubak jihala

**Troh bak nanggroe Duson Yaman**  
Bak nanggroe nyan Lason muda

**Putroe Lason dalam Teupeuen  
Teungoh teunun meusrudiwangga**

Teungoh jipok mata kacang  
Ija pinggang aneuk raja  
Bangta Silahpi na sinan  
Judo intan Lason muda

Ka troh bayeuen keu nan datang  
Suroh cut bang Rakna Bangta  
Bayeuen jidong nibak tingkap  
Jihadap bak Lason muda

Putroe Lason kalon bayeuen  
Ka teujanun sikutika  
Putroe tanyong ubak bayeuen  
Wahe ulon nyang seutia

Ka troh kawoe wahe bayeuen  
Peue kameung kheun ubak hamba  
Teuma seuot cicem bayeuen  
Po cut buleuen deungo hamba

Raja Cina jiprang nanggroe  
Jitueng Putroe Rakna Keumala  
Raya that prang hana bagoe  
Dalemteu nyoe meugriet raya

Beudoh po cut jinoe rijang  
Tulong cut bang lam prang Cina  
Ban neudeungo dum sibarang  
Putroe seudang ro ie mata

Sret ie mata hana teudoh  
Ma teungku beh sabe bala  
Bangta Silahpi sayang that  
Ro meudrap-drap ngon ie mata

Neukrah rakyat dalam nanggroe  
Jeuep-jeuep sagoe ngon bentara  
'Oh ban ase dum sinaroe  
Peudieng jinoe alat bungka

Kapai le that hana bagoe  
Kapai beusoe han ek kira  
Nyakeu kapai wahe sahbat  
Yoh jiikat Rakna Bangta

Peudieng bandum peukakah prang  
Dum sibarang alat ngaza  
Ladom kapai geupeudieng breueh  
Alat pajoh han ek kira

Padum-padum kapai beusoe  
Deungo jinoe he syeedara  
Banta Silah lam kapai nyan  
Duek sinart ureueng meunama

Ureueng inongpi le sinan  
Jak eu intan dalam banya  
Bandum ureueng bungka jinoe  
Sajan Putroe Lason muda

Padum rakyat meuploh ribee  
Pahlawan mee meuploh laksa  
Jeuep-jeuep kapai peunoh asoe  
Wadi meuntroe ngon panglima

Laen rakyat dum sinaroe  
Bungka jinoe laju sigra  
Padum lawet peulayaran  
Uroe malam hana seuda

Bangta Silah bahkeu dumnan  
Lon karangan bayeuen rimba  
Lheueh jipeugah di Duson Yaman  
Jijak keu nan u Biwan Lama

Ji peugah bak Bangta Sawang  
Di dalam prang Rakna Bangta  
Lom jikheun bak Silasiman  
Bandua nyan Silanaga

Ban jideungo dum haba nyan  
Sosah han ban jih bandua

Bangta Sawangpi sosah that  
Neukrah rakyat ngon peutua

Uleebalang tanyong pakat  
Ampoñ deelat po meukuta  
Bangta Sawang seuot meunoe  
Ulonteu nyoe kheundak bungka

Lon jak bantu Bangta Kumari  
Adek kami lam prang raya  
Nibak gata jinoe pakri  
Bantuan tabri meuna suka

Teuma seuot uleebalang  
Patot sajan kamoe neuba  
Meunyo meunan wahe teelan  
Jinoe rijang le tabungka

Neuek laju lam kapai prang  
Sikalian cut ngon raya  
'Oh ban neuek Bangta Sawang  
Jiek sajan Simansila

Bandua droe jiek keu nan  
Silasiman Silanaga  
Rakyat laen meuploh katoe  
Keujruen meuntroe ngon bentara

'Oh ban ase dum sinaroe  
Saoh jinoe geubet sigra  
Bungka kapai Bangta Silah  
Putroe indah Lason muda

'Oh troh keu nan bandua droe  
Meumat jaroe ngon syeedara  
Keu deh keu noe bri horeumat  
Geuingat keu Rakna Bangta

Lheueh mat jaroe meujok bungkoh  
Ranup pajoh le bandua  
Teungoh-teungoh pajoh ranup  
Ingar bacut sabe bala

Sabe bala hana teudoh  
Alah hai beh meunan kada  
Bangta Sawang tanyong meunoe  
Pajan adoe mee tabungka

Bangta Silah jaweueb meunoe  
Bah seupot nyoe he teumuda  
Ban geudeungo haba meunan  
Geulet yoh nyan saoh bahtra

Geubet saoh buka layeue  
Angenpi kheue bagi dua  
Bungka laju Bangta Silah  
Ngon cut indah Lason muda

Bangta Sawang Din Syarifah  
Putroe indah Biwan Lama  
Silanaga Silasiman  
Bandua nyan pahlawan kha

Laen rakyat sikalian  
Rame han ban laju bungka  
Padum lawet peulayaran  
Uroe malam hana reuda

Kapai jiplueng sangat curam  
Angen reumbang keunong pasa  
Leumah nanggroe nyan Hindustan  
Bak nanggoe nyan Rakna Keumala

Cicem bayeuen yoh nyan peugah  
Bangta Silah deungo haba  
Kuala nyan han jeuet peutoe  
Kaphe ka doe dalam kuta

Kuta pasi yoh saboh roe  
Peunoh asoe ureueng Cina  
Ban geudeungo bayeuen hareutoe  
Teungoh jinoe laen kuala

Troh u darat dum sinaroe  
Imum meuntroe rakyat dumna

**Sikhan uroe sunggoh geujak  
Ka troh ubak Rakna Bangta**

'Oh troh keu nan geupeujamee  
Ban nyang lagee reusam donya  
Geusie lumo geusie keubue  
Ka troh parui ngon syeedara

Meunan sabé geunap uroe  
Han peue adoe le lon rika  
Hana lon boh panyang rampoe  
Sabab nanggroe lam prang raya

Bukon sayang putik rambot  
Tupe leugot hana reuda  
Meuwoe kisah Raja Pupot  
Ngo adoe cut lon calitra

Raja Pupot Raja Palak  
Nan yoh manyak dilee mula  
Jih nyan sidroe dua boh nan  
He teungku nyan nafah raya

Nafah teubiet that meu'u—'u  
Miseue laku angen teuka  
Miseue pupot ureueng pande  
Meunan sabé nafah raya

Meujan teubiet miseue reudok  
Su that rayek miseue geunta  
Deungon badan that seureuloe  
Taeu gigoe hana ngon sa

Ube baci gigoejih nyan  
Taeu badan ban krong raya  
Raja Pupot jikrah rakyat  
Jipeusapat dum peutua

Cukop ase dum sinaroe  
Bungka jinoe kapai bahtra  
Taeu kapai dalam laot  
Tihang seupot sang bak nangla

Jipeulayeue uroe malam  
Peujam daratan safan-safa  
Muallem utoh hana ban  
Cok peunuman jieu rupa

Hanakeu deuh ho laen tan  
Nyan Hindustan meucuaca  
Nyankeu nanggroe pirak hupam  
Ayah tuan Sakdan Lila

Leumah nanggroe ka meujarom  
Keu nan jitren kapai bahtra  
Nyankeu nanggroe Hindustan  
Syahi alam raja raya

Leumah kuta bineh pasi  
Meuriti babah kuala  
Raja Pupot jilhom saoh  
Jipiyoh di mieng kuala

Jiteungoh teuma u darat  
Jimeusapat dalam kuta  
Raja Cina mangat ate  
Bak jipike troh ban pinta

Hingga uroepi ka seupot  
Panyot jitet dalam kuta  
Ka troh keu nan Raja Pupot  
Len le panyot tan kareuna

Ladom jikheun pakon seupot  
Panyot katot he ceulaka  
Sabab nafah Raja Pupot  
Nyang jeuet panyot ka len sigra

Got that raya aneuk paleh  
Ngon boh beuteh han troh tawa  
Adat tangieng nibak talak  
Cuta tabak raya that muka

Reuhung idong sang lot keubeue  
Siluweue lhee kayee ija

Teuma sideh lam siluweue  
Adat tageue na ube pha

Nyan peungaba Raja Pupot  
Len panyot nafah keulua  
Meuroh tangieng nibak janggot  
Teukeujot tasangka waba

Jeuetkeu dumnan ulon seobot  
Raja Pupot bit that raya  
Ureueng Cina sosah pike  
Panyot kande jitet rata

Uroe beungoh datang siang  
Peubeudoh prang ureueng Cina  
Nyang awai prang deungan beude  
Gram-grum sabé hana reuda

Nyang rot Bangtapi neutaleh  
Maken leubeh nibak nyang ka  
Yoh nyan beungeh kaphe paleh  
Jibareh taeu han reuda

Meusu beude sang beureuteh  
Jibareh lampang ceureupa  
Nyang rot Bangta ka neuiem droe  
Datok Meuntroe Tok Labala

Geupeubeude payah mantong  
Hana keunong jih lam kuta  
Kuta Bangta seungap beude  
Kuta kaphe meusu lanja

Jiek laju dum sinaroe  
Jipeutoe bak gaki kuta  
Ka neubeudoh Datok Meuntroe  
Bandua droe Tok Labala

Neucang kaphe hana padoe  
Neuseudoe keunong bak muka  
Teuma jigrop Silasiman  
Bandua ngon Silanaga

Jingieng kaphe han tom meunan  
Bak uroe nyan rab seureupha  
Nyang mate sinan teupipoe  
Laen jiwoe plueng lam kuta

Meunan sabé jeuep-jeuep uroe  
Kaphe pindoe sosah raya  
Meuprang beungoh Datok Meuntroe  
'Oh cot uroe Tok Labala

Geucang kaphe hana padoe  
Geuseudoe han jan jihei ma  
Geunap uroe talo kaphe  
Le that mate ureueng Cina

Raja Cina jiceumarot  
Raja Pupot hana jaga  
Raja Pupot aneuk paleh  
Dawok kaeh geunap masa

Nyan sa rakan ka rab abeh  
Sabe di jih teungeut indra  
Wahe adek peue lom taeh  
Rakyat abeh han takira

Yoh nyan jaga Raja Pupot  
Mukajih krot hana tara  
'Oh ban jaga kaphe bajeueng  
Bu Jimakeuen na sigunca

Saboh keubeue teuma eungkot  
Raja Pupot 'oh meumada  
Raja Cina marit meunoe  
Pajan adoe taprang kuta

Ka jiseuot laju meunoe  
Uroe nyoe wahe kakanda  
Raja Pupot marit yoh nyan  
Bak pahlawan jiyue ngaza

Ho ka kah pahlawan limong  
Jak tamong u dalam kuta

**Rakna Bangta kapoh mate  
Putroe Siti keu noe kaba**

Lheueh jikheun nyan raja pindoe  
Jieh keudroe teungeut indra  
Pahlawan limong lon hareutoe  
Deungo jinoe lon kheun nama

Sidroe geukheun Tok Pang Lumpoe  
Geuheui sidroe Pahlawan Kha  
Nyang keulhee droe Cek Labiram  
Peuet geupeunan Tok Kibara

Nyang keulimong na taturi  
Nan geurasi Mando Tila  
Banlimong droe that beurani  
Ureueng Cati kawom Cina

Deungon kuat hana sakri  
Sang piti kaphe ceulaka  
Banlimong droe jimat tungkat  
Beusoe bulat biek meulila

Jigrop pantah na ban kilat  
Jilumpat pantah ban guda  
Ngonjisurak meutaga that  
Jiek leugat han ban peubla

Yoh nyan beungeh Datok Meuntroe  
Bandua droe Tok Labala  
Rakna Bangta beungeh han ban  
Bangta Sawangpi sireuta

Jitajo le Silasiman  
Jimat yoh nyan Rakna Bangta  
Bek tuanku neujak keudroe  
Bah le kamoe jinoe ngaza

Di ulon goh lom kumeuprang  
Piyoh junjongan dilee gata  
Yoh nyan Bangta ka neuriwang  
Bangta Sawang jinoe ngaza

Nyang keudua Datok Meuntroe  
Banlhee droe ngon Tok Labala  
Teuma keupeuet Silasiman  
Nyang limong nyan Silanaga

Banlimong droe jak u padang  
Jak lawan prang deungon Cina  
Deungon rakyat meuploh katoe  
Teubiet jinoe dum u lua

Rakyat Cina jiek laju  
Meu'u-'u ban bade raya  
'Oh meurumpok dua pihak  
Jimeutop tak han ban peubla

Putoh takue sret tangkurak  
Teukeupak ka hilang nyawa  
Nyang pantah that Datok Meuntroe  
Bandua droe Tok Labala

Geucang kaphe hana padoe  
Geuseudoe han jan jihei ma  
Pahlawan limong goh lom meupat  
Sajan rakyat meuploh laksa

Rakyat laen han ek peugah  
Nyoe lon kisah Pahlawan Kha  
Pahlawan ek laju keu nan  
Meuteumeung ngon Simansila

Silanagapi ka keu nan  
Bandua nyan sisyeedara  
Pahlawan limong ka troh keu nan  
Silasiman buka haba

Ho kameung jak kah limong droe  
Jak tueng putroe indah ḥ'pa  
Banlimong droe seuot b ḥ  
Sibeuna sah ban kheun gata

Meunyo meunan jak woe pantah  
Putroe indah bek meuhawa

Han kubri keu muka asee  
Po Cut kee nyang ilok rupa

Jakleh kacok judo asee  
Kaphe seudee pungo gila  
Dum ruman kah kajak keu noe  
Iek putroe han kaeu rupa

Hana kubri tuan putroe  
Jakleh kawoe he beulaga  
Pahlawan jiseuot pantah  
Dum ruman kah jeuet meudawa

Nyang ka kuprang jeuep-jeuep nanggroe  
Sikhan uroepi han padra  
Nyang got jak cok laju putroe  
Bek meupaloe atueh gata

Teuma seuot Silasiman  
Bek narit nyan deungon hamba  
Dum ruman kah jak tueng putroe  
Kulheuep gigoe nibak jungka

Di kah limong di kee sidroe  
Nyang got jak woe bek le haba  
Nyang got jak woe bek le tuto  
Bak kueumpu beukah muka

Pahlawan limong seuot pantah  
Bek beurakah he syeedara  
Soe nan geuhe<sup>n</sup> kah dua droe  
Kreueh that gigoe bak meudawa

Kupoh mate kah uroe nyoe  
Nak kutusoe tinggal nama  
Lalu seuot Silasiman  
Lon geuboh nan Simansila

Nyang sidroe treuk na katuri  
Nan geurasi Silanaga  
Nyang rot uneun Datok Meuntroe  
Bandua droe Tok Labala

Cuba peurab keu noe beutoe  
Kulheuep gigoe tinggai jungka  
Ban jideungo tuto jeungkat  
Beungehjih that hu ngon mata

Banlimong droe beungehjih that  
Jibet tungkat pantah sigra  
Yoh nyan jipoh Silasiman  
Bandua nyan Silanaga

Silasiman cit dua droe  
Aduen adoe syeedara  
Tok Labala Datok Meuntroe  
Hana jeuet toe le bandua

Pahlawan limong pantah jaroe  
Tungkat beusoe bandum rata  
Yoh nyan jipoh Silasiman  
Banlimong nyan that guranta

Jipoh keu deh jigrop keu noe  
Bandua droe pantah raya  
Silasiman jikheun meunoe  
Bek ngon kamoe kameuseunda

Silanaga tajo leugat  
Jicok tungkat ka jihila  
Ka jiteumee dua tungkat  
Jijok leugat keu syeedara

'Oh troh tungkat dalam jaroe  
Jikheun meunoe Silanaga  
He pahlawan banlimong droe  
Cuba theun nyoe uleh gata

Silanaga jibet tungkat  
Jipoh leugat han ban peubla  
'Oh ban keunong bak tangkurak  
Teubiet utak le teupanca

Yoh nyan reubah le teukeupak  
Nyawong jijak mate fana

Nyang ka mate na taturi  
Nan geurasi mando Tila

Pahlawan peuet meusogumoe  
Cit lhee droe nyang mantong cokma  
Silasiman jibet tungkat  
Jipoh kuat Tok Kibara

'Oh ban keunong nibak baho  
Ka hanco tanggoe u dada  
Laju mate abeh umu  
Ka teudu pahlawan dua

Yoh nyan beungeh Tok Pang Lumpoe  
Bandua droe Pahlawan Kha  
Cek Labiram beungeh tuloe  
Jipeutoe bak Silanaga

Jimat laju kajisumpom  
Ka meugom siseun bandua  
Jimeureupah jimeutrom-trom  
Sabe geuhon ureueng dua

Jimeureupah leungo bumoe  
Bandua droe sabe teuga  
Pahlawan Kha Tok Pang Lumpoe  
Bandua droe meujuara

Cuba kapoh Cek Labiram  
Kuthee agam kah bandua  
Keu deh keu noe sabe gagah  
Hana tiwah sabe padra

Bandua droe hana reubah  
Jimeureupah han ban peubla  
Jimeugrop-grop keu deh keu noe  
Meusogumoe meuhue hila

Jibeudoh dhoi jipo anoe  
Sang sijak nyoe ujeuen teuka  
Bandua droe sabe gagah  
Bandua blah sabe teuga

Sikhan uroe jimeureupah  
Ka reubah sinan bandua  
Ka meugule keu deh keu noe  
Kong that jaroe jimeuwa-wa

Yoh nyan tajo Datok Meuntroe  
Geouple anoe dalam mata  
Geuboh anoe dalam reugam  
Tok Labiram buta mata

Han jeuet le bleut mata reukam  
Cek Labiram sosah raya  
Beudoh laju Nagasilan  
Tungkat yoh nyan ka jihila

Cek Labiram lale keudroe  
Sampoh anoe dalam mata  
Silanaga beungeh han soe  
Tungkat beusoe jibet sigra

Jipoh atueuh Cek Labiram  
Keunong reumbang teuntang muka  
Beukah ulee hanco tuleueng  
Ka teugageueng hilang nyawa

Cek Labiram kakeu mate  
Biek kaphe teukabo raya  
Di mideuen sinan meugule  
Ka meusampe tulong raja

Nyang na tinggai Tok Pang Lumpoe  
Bandua droe Pahlawan Kha  
Jimeutak tham hana padoe  
Deungon gop nyoe Silanaga

Silasimanpi ka keu nan  
Jitak yoh nyan han ban peubla  
Keu deh keu noe meusogumoe  
Seupot uroe teuka sinja

Seupot uroe jitoh ujeuen  
Jimeuplueng-plueng bandum rata

Silasimanpi ka jiwoe  
Bandua droe Silanaga

Abeh bandum geumeuwoe-woe  
Ka sampoe u dalam kuta  
Ban sare troh keu.deh geuwoe  
Tanyong meunoe uleh raja

Toh me keu noe putroe intan  
He pahlawan nyang that teuga  
Teuma seuot Tok Pang Lumpoe  
Ampoem kamoe po meukuta

Han ek talo kuta nanggroe  
Limong droe pahlawan raya  
Meuhan mate nyan limong droe  
Tuan putroe bek meuhawa

Han ek tatueng keu geutanyoe  
Limong droe ureueng peurkasa  
Kamoe teuga banlimong droe  
Ek jiseudoe nibak muka

Adat laen han peue peugah  
Jieumpah han jan meusua  
Gadoh pike deungon ilah  
Gadoh cidah ngon bicara

Kamoe limong lhee ka mate  
Gadoh pike po meukuta  
Nyang that teuga judo putroe  
Banlimong droe hana ngon sa

Ban jideungo dum peuneugah  
Sangat sosah Raja Cina  
Pakri jinoe he meutuah  
Ulon nyoe sah malee raya

Meunyo hana putroe indah  
Ulon nyoe bah mate fana  
Han kugisa le u nanggroe  
Bahle sinoe hilang nyawa

Raja Pupot seuot meunoe  
He dalem droe na bicara  
Jinoe laen taboh lagee  
Ngon eleumee tapeufana

Tayue boh eleumee hekeumat  
Tayue sangkat ureueng lam kuta  
Meunan jikheun raja laknat  
Ka jipeurab bak gurenyea

Wahe teungku guree kamoe  
Peurintah nyoe hukom gata  
Meutan tulong gata sidroe  
Ulonteu nyoe malee raya

Ureueng limong taboh hekeumat  
Bah tasangkatz dalam kuta  
Guree deungo haba deelat  
Jiduek leugat dalam tapa

Ka jiduek le dalam khaluet  
Ka jitueng buet eleumee mintra  
Teutap sihe dalam khaluet  
Ulon seubot Bangta muda

Rakna Bangta tatkala nyan  
Neupeugah ban ubak tantra  
Ho ka gata Silasiman  
Bandua ngon Silanaga

Ho ka gata Datok Meuntroe  
Bandua droe Tok Labala  
Ho ka gata Bangta Silah  
Beudoh pantah he adekda

Jinoe taprang kuta pasi  
Tapoh mate Raja Cina  
Ban geudeungo narit meunan  
Teubiet yoh nyan dum u lua

Deungon rakyat meuploh katoe  
Teubiet dudoe Rakna Bangta

Bangta Silahpi na sajan  
Bangta Sawangpi sireuta

Tok Labala Datok Meuntroe  
Bandua droe sinanpi na  
Silanaga Silasiman  
Bak uroe nyan prang that raya

Rot deh jiek rot noe geujak  
Ka meurumpak dua tantra  
Ban meuteumeung dua pihak  
Jimeutop tak han ban peubla

Rakyat mate that meubalak  
Nyang le pipak ureueng Cina  
'Oh ban jitop ka meupacak  
Ka teukeupak le teurhanta

Han ek pike mate ngon rusak  
Darah ulak hana reuda  
Silasiman sangat rancak  
Ka jilikak Silanaga

Tok Labala ngon Tok Meuntroe  
Bandua droe pantah raya  
Neucang kaphe hana padoe  
Neuseudoe han jan jihei ma

Bangta Sawang ban keudidi  
Bangta Kumari ban cempala  
Neucang kaphe dum neutadi  
Allah Rabbi thee sibeuna

Pahlawan Kha Tok Pang Lumpoe  
Bandua droe keu nan sama  
Jibet tungkat cokma beusoe  
Jimeung kiloe Rakna Bangta

Bangta Silah pantah han soe  
Tungkat beusoe sret u donya  
Rakna Bangta neukheun rijang  
Bek meuayang deungon hamba

Han sep lhee droe nyang ka hilang  
Peusak tungang lom di gata  
Rakna Bangta neugrak peudeueng  
Neutak meupeung Pahlawan Kha

Jiteubiet meuk mata peudeueng  
'Oh meuleupeung ka meugisa  
Neutak keu noe jigrop keu deh  
Kaphe paleh pantah raya

Rakyat laenpi sunggoh that  
Prang jikarat hana tara  
Padum na trep meuprang sabé  
Ureueng kaphe tiwah ngaza

Teuma uroepi ka seupot  
Rakyat kalot woe lam kuta  
Rakna Bangta Bangta Sawang  
Ka neuriwang dalam kuta

Ka meusapat dum sinaroe  
Ngon rakyat droe meuploh laksa  
Teuduek 'oh nan siblah rambat  
Lon riwayat guree Cina

Guree sihe ulon seubot  
Dalam khaluet amai mintra  
Tujoh uroe dalam khaluet  
Troph meukeusud ban jipinta

Kakeu ase ban meukeusud  
Ka troh khaluet si ceulaka  
Rakna Bangta bak malam nyan  
Deungon rakan meubicara

Teungoh pakat keu pasai prang  
Keumeung guncang kuta kuala  
Kuta pasi singoh taprang  
Bangta seudang meunan cita

Neupeugah bak Bangta Sawang  
Singoh cut bang taprang kuta

Mangat talo kaphe suang  
Taguncang kuta kuala

Tutoepi lheueh meunan kalam  
Reubah pangsan teungeut indra  
Bangta Sawangpi ka meunan  
Lom 'oh lheueh nyan Silanaga

Bangta Silah Silasiman  
Reubah pangsan yoh nyan sigra  
Kakeu pangsan banlimong droe  
Teupipoe sinan teurhanta

Sayang taeu sang ka mate  
Buet sihe raja ceulaka  
Badan neutoto tuboh layee  
Idong keumee sang ka fana

Geulunyueng klo hana le su  
Sayang taeu aneuk raja  
Mukaneu krot taeu pucat  
Ampon deelat marit hana

Mata tahe taeu mandang  
Lidah ceukang tan suara  
Rakna Keumala ban jipandang  
Bungong peukan sosah raya

Yoh nyan putroe ka jibae  
Ie mata ro sang ka fana  
Basah ija ie mata ro  
Ingat judo ka binasa

Teuntee jicok lon le kaphe  
Gata han le po meukuta  
Wahe teungku jantong ate  
Keunong sihe limong gata

Meuhad jipoh lon le kaphe  
Gata han le po meukuta  
Jinoe pakri he buleuèn trang  
Soe lom meuprang 'oh tan gata

Ureueng limong han le tuto  
Rakyat tahe kalon rupa  
Bandum rakyat ie mata ro  
Putroe bae hana reuda

Cok geupinah banlimong droe  
Bak sagoe teumpat seunia  
Top ngon ija meuleulapeh  
Buet cut puteh nyang jroh rupa

Ka jibae hana sakri  
Putroe Ti Rakna Keumala  
'Oh tadeungo putroe bae  
Meusye-sye bangon biula

Soe nyang deungo bandum tahe  
Putroe bae lagee doda  
Ya Allah Wahidon Kaha  
Maha Kaya Poku Rabbi

Neupeulheueh lon dalam bahya  
Ya Rabbana Po di kami  
Ya Ilahi pakri lon daya  
Meuhad jiba lon le kaphe

Kaphe paleh le bicara  
Judo hamba jiboh sihe  
Alah he boh gapu naga  
Boh ara hanyot u pasi

'Oh jimoe Rakna Keumala  
Suara na miseue bangsi  
Alah he on gaca muda  
Got rupa taboh bak jaroe

Ulonteu nyoe ka troh masa  
Jiteumee ba singoh uroe  
E hai po Cut Lason muda  
Toh bicara wahe adoe

Putroe Lason jimoe ruğha  
He teumuda po cut kamoe

E hai po cut Biwan Lama  
He teumuda pakri jinoe

Din Syarifah jimoe rugha  
Ka troh masa wahe adoe  
Ile limpah ro ie mata  
Sang ka gila putroe lhee droe

Alah hai subang meucintra  
Gadoh mata intan pudoe  
Wahe teungku po meukuta  
Kamoe jiba jeuoh nanggroe

Bukon sayang gleueng suasa  
Ka troh masa taduek keudroe  
Soe lom idang po meukuta  
Tinggai gata jiba kamoe

Bukon sayang kapai bahtra  
Angen hana riyeuk tampoe  
Wahe dalem poteu raja  
Keunong banya hana padoe

Din Syarifah buka haba  
Tapoh bila singoh uroe  
Wahe Putroe Lason muda  
He Cut Rakna bek le tamoe

Takeubah subang meucintra  
Tangui ija ureueng lakoe  
Putroe Lason seuot pantah  
Han peue salah bak uroe nyoe

He teumuda han peue salah  
Beudoh pantah tajak jinoe  
Meunan pakat Din Syarifah  
That meutuah cut sambinoe

Beungoh uroe laju jaga  
Ka cuaca taeu uroe  
Jingui alat miseue Bangta  
Putroe muda jipeugot droe

Cut Putroe Ti le bicara  
Jingui ija ureueng lakoe  
Ngui kupiah nyang meutampok  
Jigeutang ok banlhee putroe

Di ateueh nyan ka tangkulok  
Lom jisok siluweue meureumboe  
'Oh jisok siluweue sutra  
Sang bentara taeu bagoe

Miseue agam putroe muda  
Taeu rupa that seureuloe  
Abeh jingui dum peukayan  
That analan banlhee putroe

Miseue raja 'oh tapandang  
Peukayan leungkap bak asoe  
Maseng-maseng jingui peudeueng  
Cut meugleueng na miseue uroe

Jimat alat leumbeng peudeueng  
Maseng jitueng areuta lakoe  
Areuta lakoe maseng jeumba  
Tan meutuka wahe adoe

Cukop bandum alat rata  
Taeu rupa that seureuloe  
Jiteubiet le dum u lua  
Taeu rupa sang kon binoe

'Oh takalon sang kon dara  
That peurkasa taeu bagoe  
Dendayang tujohpi sireuta  
Nyanpi rupa ureueng lakoe

Jimat alat bandum rata  
Peudeueng ganja keutupong beusoe  
Bansiploh droe teubiet lanja  
Teuduek haba siat 'oh noe

Puteh-puteh bungong riwat  
Nyang puteh that bungong giri

Haba putroe teuduek siat  
Lon riwayat Cina Janggi

Guree sihe marit meunoe  
Bak raja droe jipeugah kri  
Ampon deelat deungo kamoe  
Ureueng limong droe ka beureunti

Ban limong droe ka lam sangkat  
Wahe deelat raja doli  
Raja Cina deungo meunan  
That sukaan kaphe 'asi

Teuma raja marit yoh nyan  
Meunyo meunan bek le lawi  
Ho pahlawan bandua droe  
Beudoh jinoe tapeureugi

Raja Pupot aneuk paleh  
Dawok jieh hana khali  
Tajak jinoe laju keu deh  
Tueng cut puteh nyang juhari

Ureueng limong ka hana le  
Buet sihe sudah beureunti  
Sang mate aneuk bisoe  
Raja nanggroe Bangta Kumari

Keunong mintra ka hana le  
Ka mate sama sikali  
Yoh nyan jiek raja kaphe  
Deungon sihe nyang bakeuti

Padum rakyat meuploh katoe  
Ka jijak droe raja 'asi  
Ngonjisurak hana padoe  
Raja pindoe ngon sipai

Yoh nyan teubiet Datok Meuntroe  
Bandua droe neujak nari  
Deungon rakyat dum sinaroe  
Neuek jinoe got meuriti

Nyang neutakot cit dua droe  
Tok Pang Lumpoe nyang beurani  
Meunyang laen dum sinaroe  
Neuseudoe han jan jihei mi

'Oh ban neuek Datok Meuntroe  
Jiek putroe nyang juhari  
Dayang tujoh putroe na lhee  
Got that lagee ek meuriti

Bansiploh droe jiek teuntee  
Jak prang sitree kaphe 'asi  
Putroe lhee droe ka jilinggang  
Jipandang le Cina Cati

'Oh jikalon'jroh samlakoe  
Banalhee droe jiek beureuhi  
Raja Cina ban jilihhat  
Jikheun sulet sihe ini

Hana keunong nyan hekeumat  
Bit sulet that sihe 'asi  
Jikheun ka lheueh nyanjisangkat  
Mantong nyoe pat Bangta Kumari

Tok Labala ngon Tok Meuntroe  
Neupeurab toe neujak nari  
Jingieng mantong banlimong droe  
Hana sidroe keunong rante

Raja Cina saket ate  
Sulet sihe hana sakri  
Jisuet peudeueng jicang sihe  
Kakeu mate hilang budi

Sihe tapa ka hana le  
Ka mate jicang seundiri  
Meuntroe kalon mate sihe  
Mangat ate hana sakri

Meunan napsu dalam ate  
Jak poh sihe bila doli

Hana payah tuan putroe  
Jipoh keudroe Cina 'asi

Putroe lhee droe jiceumeucang  
Jilinggang lagee keudidi  
Din Syarifah got jikeupong  
Di Cut Lasonpi han sakri

Di Cut Rakanapi jilikak  
Lagee meurak ngon cem nuri  
Deungon judo rab-rab saban  
Cut intan ngon Bangta Kumari

Sang bak bumoe han jap langkah  
Cut indah bungong darami  
Meusyeut neugrop neubet langkah  
Neucang pantah Cina 'asi

Tuan Putroe Diñ Syarifah  
Nyanpi pantah hana sakri  
Neucang kaphe han peue peugah  
Le that reubah biek majusi

Di Cut Lason han peue pike  
Neucang kaphe Cina 'asi  
Rakyat Cina le that mate  
Darah ile ateueh bumi

Yoh nyan beungeh Tok Pang Lumpoe  
Bandua droe that beurani  
Teuma neuek tuan putroe  
Neutak jinoe Cina 'asi

Pahlawan tanyong soe nan gata  
Peugah sigra ubak kami  
Lom jitanyong namateu soe  
He nyak pindoe soe geurasi

Han neuseuot tuan putroe  
Bek jitusoe bak neusangka  
Jitanyong laju hana padoe  
Jikheun tuloe tan suara

Nyanpi neuiem hana seuot  
Putik rambot le bicara  
Meunan pakat banlhee po cut  
Han neujawueub sikrak haba

Nyang na taeu jigrop syat-syeut  
Leubab-leubub neucang lanja  
'Oh lheueh neutak tadeungo bub  
Neugrop meusyeut na ban guda

Jimeung balah deungon tungkat  
Neugrop leugat limong deupa  
Putroe Lason miseue kilat  
Na sang pacat Rakna Keumala

Din Syarifahpi tajam that  
Neulumpat pantah ban guda  
Lhee droe putroe beurani that  
Putik langsat that peurkasa

'Oh jipoh han keunong asoe  
Cut putroe utoh peundika  
Jipoh keu deh neugrop keu noe  
Sambinoe pantah lagoina

Pahlawan Kha Tok Pang Lumpoe  
Bandua droe sosah raya  
Dawok jitak leupang-leupeung  
Keunong bak rueng keunong muka

Bitpi neutak kaphe asee  
Sion bulee hana luka  
Hana luroh sion bulee  
Kreueh sang batee jeuep anggeeta

Jigrak tungkat jipoh balah  
Jigrop pantah limong deupa  
Raja Cinapi di sinan  
Neutak meutam teuntang dada

Meusigeutu han jipajoh  
Peudeueng luroh cumeh mata

Yoh nyan beungeh tuan putroe  
Banolhee droe ka beungeh raya

Han lüt pahlawan neucang rakyat  
Nyoe makan that nibak nyang ka  
Rakyat laen han ek peugah  
Nyoe lon kisah putroe muda

Nyang jeuet teuga tuan putroe  
Ubak lakoe geutueng do'a  
Do'a peungumoi ismu alam  
Utoh neufam putroe muda

Maseng-maseng si nyak putroe  
Bak lakoe droe geutueng do'a  
Teuma di Bangta eleumee nyan  
Bak Beurahman Biwan Lama

Poteu Allah nyang na tuban  
Ulon tuan han kuasa  
Lahe baten deuh bak Tuhan  
Nibak insan hana daya

Putroe meucang teuma lon peugah  
Poteu Allah thee sibeuna  
Han luet pahlawan dua droe  
Neukiloe rakyat meulaksa

Teuma jipruk le pahlawan  
Dalam kawan rakyat dumna  
Bak jipruk tuan putroe  
Keunong rakan droe ureueng Cina

Pahlawan kheun teuma leugat  
Bek ngon rakyat beuhe gata  
Han neupateh neucang laju  
Cina Cincu jimeuhei ma

Ureueng Cina le that jiplueng  
Neutak di rueng seun-seun dua  
Nyang na tinggai Tok Pang Lumpoe  
Bandua droe pahlawan kha

Raja Cinapi rab sinan  
Neujak keu nan putroe muda  
Rakna Keumala ka neukarat  
Meuhadap ngon Raja Cina

Neutak keu noe jigrop keu deh  
Kaphe paleh pantah raya  
Ka neutak lom keunong bak rueng  
Patah peudeueng meukhan dua

Nyandum keubai kaphe bajeueng  
'Oh ek peudeueng patah dua  
Yoh nyan sosah tuan putroe  
Sambinoe alet ie mata

Rakna Keumala neukheun meunoe  
Neupeujok droe bak Rabbana  
Silap bacut dara baro  
Jimeututo tan seungaja

Wahe adek Putroe Lason  
Peudeueng di lon ka binasa  
Lon woe siat wahe buleuen  
Laen peudeueng lon jak mita

Tuan putroe neuwoe laju  
Jideungo su uleh Cina  
Meunan neukheun bungong meulu  
Jituri su uleh raja

Ka teupike raja pindoe  
Nyankeu Putroe Rakna Keumala  
Jideungo su ureueng binoe  
Mameh han soe ngon suara

Ureueng laen dum sinaroe  
Lale keudroe meucang lanja  
Raja Cina seutot putroe  
U meuligoe le jihala

Ka teupike raja pindoe  
Ureueng limong droe keunong mintra

**Meukon meunan pane meunoe**  
**Pakon putroe teubiet u lua**

Jih nyang meucang deungon putroe  
Imum nanggroe laen hana  
Ureueng limong bit hana le  
Keunong sihe eleumee mintra

Yoh nyan teulah raja kaphe  
Jicang sihe tan kareuna  
Raja Cina seutot putroe  
Hana bagoe ate suka

Di cut putroe hana neuthee  
Peuhah ulee leumah muka  
Badan cidah keuieng linteng  
Hana bandeng ngon tapeusa

Watee jijak jroh meukeusyot  
Sang panyot tanglong meugisa  
Ulee baho got meukeunyot  
Gigoe blet-blot ban suasa

Jitiek aleh rot geunireng  
Meupuseng ban gaseng Jawa  
Raja Cina ate gigeng  
Gigoe teuheng leumah jungka

'Oh jikalon hana bandeng  
Cut lintang Rakna Keumala  
Le that kueu putroe laen  
Ngon cut linteng hana ek sa

Raja Cina that beureuhi  
Taeu dali sang ka gila  
Teuka ladat ngon beureuhi  
Jieu Cutti Rakna Keumala

Raja Cina sang ka seudee  
Bungong keumee jieu rupa  
Jiseutot le kaphe asee  
U juree leugat jihala

Troh u pinto bak meuligoe  
Si nyak putroe sosah raya  
Tuan putroe ate gundah  
Bak Allah ka meunan kada

Bak babah rot Cina ka troh  
Aneuk biyoh that ceulaka  
Putroe jiek u meuligoe  
U jaroe peudeueng jihila

Neukheundak jak riwang bak prang  
Deuh neupandang Raja Cina  
Troh bak rinyeun kaphe suang  
Cut putroe cang teuntang muka

Yoh nyan jikheun raja sitree  
Bungong keumee bek meuseunda  
Teuma neutak keunong ulee  
Meukeutee sang batee lada

Nyandum gila rajà asee  
Sion bulee han binasa  
Lom putroe tak keunong bak pruet  
Meuleubub tango suara

Meusigeutu han jitem lut  
Miseue kukuet keubeue tuha  
Lom ka jikheun meunoe lagee  
Tagaro kee putroe muda

Hana gatai peue tagaro  
Bek hai judo tameuseunda  
Raja Cina laju tajo  
Bungong kundo jimeung raba

Rab troh jimat puteh hijo  
Raja hantu ganah raya  
U meuligoe putroe lalo  
Jitop pinto pantah sigra

Raja Cina meulhei a-o  
Tren he judo keu noe kuba

Han jeuet tajak dara baro  
Ateueh baho lon boh gata

Lheueh tasapa tatop pinto  
Pakon judo han tom nyang ka  
Di gop nyang na 'oh woe linto  
Dara baro peumulia

Di gop laen judo badan  
Ija sikhan tameudua  
'Oh woe judo galak han ban  
Ka na intan ngon meuseunda

Di gata nyak 'oh woe kamoe  
Peubeungeh droe pucat muka  
Kuboh gampong tinggai nanggroe  
Gata adoe kujak mita

Putroe seuot boh beude me  
Rimueng pangkee buya hila  
Bah hai putroe hana trep le  
Lon srah gaki siklep mata

Ho cit lon ek bungong keumee  
Kon u juree woe bak gata  
Peubuet keu noe kaphe asee  
Bek rab ngon kee rimueng seuba

Bek meugriet that he boh ate  
Tamakeuen le nyak di gata  
Di putroe jicarot sabe  
Raja kaphe jimeuseunda

Peubuet keu noe gajah culek  
Buya tarek badeuk seuba  
Han peue salah teungoh lon ek  
Boh itek bah le keu gata

Raja Cina ka jilalo  
Troph bak pinto jiyue buka  
Han tabuka tuan putroe  
Bah kutop droe hilang nyawa

Katren keu deh kaphe asee  
Bek rab ngon kee najih raya  
Bek kheun meunan bungong keumee  
Kuriwang kee nanggroe Cina

Bek narit nyan po sambinoe  
Nyoel kutop droe peue tasangka  
Meuka maie ulon siaroe  
Toh lakoe laen di gata

Sigala raja lam donya nyoe  
Jroh that kamoe Raja Cina  
Kulet puteh miseue gadeng  
Keuieng linteng peuet ureueng wa

Bulee geutiek jeuet ikat binteh  
Bulee jeh jeuet taren guda  
Bulee panyang meuleulapeh  
Atra jeh sabe deungon pha

Raja Cina tango kre-kro  
Jikhempri nyo jimoepi na  
Raja Cina marit laju  
Ka'a-ka'u ngon suara

Ngon jimeusu kakeng-kakong  
Cina sompong juah raya  
Raja Cina marit leugat  
Pakon trep that putroe muda

Han tabuka dara baro  
Kuproh pinto beukah dua  
Yoh nyan putroe ka teupike  
Dalam ate sosah raya

Kaphe paleh raja laknat  
Jiteumee mat jeuet binasa  
Keu peue guna 'oh ka jimat  
Raja laknat ganah raya

Allah Tuhan Po Nyang Ghani  
Lon nyoe neubri bek binasa

Bek neubri roh lon ya Rabbi  
Deungon kaphe Raja Cina

Meuka jimat deungon tangan  
Sirasa nyan lon meudina  
Dumnan deesya tuboh kamoe  
Pakri jinoe ya Rabbana

Ubak Tuhan neungadu droe  
Sira neumoe ngon ie mata  
Tren eleuham dalam ate  
Ka teupike putroe muda

Leumah pike bungong keumee  
Bah lon lakee peutoe kaca  
Meunan pike putroe rancak  
Jikheun le bak Raja Cina

Pakon raja peubeungeh droe  
Ulonteu nyoe judo gata  
Raja Cina seuot meunoe  
Bah he putroe tanglong donya

Meunyo meunan dara baro  
Buka pinto po jroh rupa  
Bek meugriet that tuahku e  
Nyang pinto saja lon buka

Cit ka trep that he tuanku  
Deuek kon keu bu wahe raja  
Grah kon keu ie deuek kon keu bu  
Fam tuanku uleh gata

Nyang na sabab ulon sosah  
Kaoi ayah dilee masa  
Ngon sabab nyan lon that sosah  
Takot han glah lon binasa

Meunyo ek troh kaoi ayah  
Ulon peuhah pinto sigra  
Peuebu kaoi putroe indah  
Takheun pantah judo muda

Kaoi ayah masa dilee  
Neuyue lakee peutoe kaca  
Peutoe kaca keu jeunamee  
Meunan dilee neumeunada

Peutoe tuanku bek raya that  
'Oh lot sapat lon ngon gata  
Beujeuet tadong jampang-jampang  
'Oh nan manyang peutoe kaca

Meuhana nyan deelat ampon  
Mate ulon waba puta  
Peutoe tuanku gunci u dalam  
Meunan macam kaoi nada

Meunyo meunan he putroe jroh  
Dua ploh boh ek lon peuna  
Raja Cina yue jak rakan  
Jak cok rijang peutoe kaca

Teuma jijak Cina Cincu  
Jiwoe laju dalam kuta  
Ureueng Islam dum sinaroe  
Laloe keudroe prang han reuda

Cina Cincu jime peutoe  
Hana sidroe kalon rupa  
Troph bak raja jipeujaroe  
Jihei putroe Raja Cina

Teuma seuot tuan putroe  
Kaoi kamoe ka meutuka  
Kaoi ayah yoh saboh roe  
Dilee kamoe dudoe gata

Patot awai dara baro  
Lon preh linto po meukuta  
Aneuk gunci ubak kamoe  
Raja bek toe bandum rata

Jitiek gunci teuma sinan  
Surot yoh nyan Raja Cina

Teuma neutren tuan putroe  
Sikin di jaroe tajam mata

'Oh lheueh neulop tuan putroe  
Gunci jinoe peutoe kaca  
Raja Cina tanyóng yoh nyan  
Pakon meunan putroe muda

Buka laju cut budiman  
Lon lop keu nan sajan gata  
Putroe seuot that meuteuntee  
Bek rab ngon kee rimueng seuba

Han kupakon geukoh ulee  
Kah sitree kaphe ceulaka  
Pakon meunan cut sambinoe  
Peungeut kamoe raja raya

Han tabuka cut sambinoe  
Kuproh jinoe peutoe kaca  
Lheueh nyan kucock gata putroe  
Eu buet kamoe nak tarasa

Meunyo kaproh peutoeku nyoe  
Mate kamoe hilang nyawa  
Putroe neuboh sikin bak reukueng  
Yoh nyan jiplueng Raja Cina

Bek he putroe hana kuproh  
Areuta gaduh gata hana  
Beukit han jeuet lon eh sapat  
Jeuet lon lihat beupueh mata

Keu peue guna meuka mate  
Han meusampe lon tueng gata  
Bek he po cut takoh lihe  
Han kuproh le peutoe kaca

Raja Cina yue cok peutoe  
Jiyue peuwoe dalam bahtra  
Teuma jiba cut putroe got  
Jisalah rot Raja Cina

Hana jiba rot dalam prang  
Raja suang le bicara  
Troh lam kapai tuan putroe  
Marit meunoe Raja Cina

Wahe bujang tango kamoe  
Tajak jinoe dalam kuta  
Tapeugah bak Raja Pupot  
Euntreuk seupot lon kubungka

Ureueng meuprang dum tayue woe  
Ka na putroe tapeuhaba  
Bujang deungo haba meunan  
Jijak yoh nyan pantah sigra

Ka jipeugah Raja Pupot  
Woe u laot dalam bahtra  
Teuma jijak u dalam prang  
Jikheun rijang bak panglima

Gata bandum raja yue woe  
Jeh ho putroe dalam bahtra  
Ban jideungo nyan hareutoe  
Yoh nyan jiwoe bandum rata

Pahlawan Kha Tok Pang Lumpoe  
Abeh jiwoe dum sineuna  
Mangat ate dum sinaroe  
Ka na putroe nyang jimita

Taeu jiwoe jimeuplueng-plueng  
Kaphe bajeueng ate suka  
Le that mate teungoh jiplueng.  
Keunong peudeueng Tok Labala

Ngon Tok Meuntroe adoe aduen  
Neucang pang-peung han neukira  
Nyang putroe cang han ek peugah  
Ile darah ban ie raya

Sang jeuet sungoe bak geupeugah  
Poteu Allah thee sibeuna

**Troh u laot keu deh jiwoe  
Tok Pang Lumpoe Pahlawan Kha**

**Tok Labalapi ka geuwoe  
Ngon rakan droe meuploh laks  
Troh lam kuta dum sinaroe  
Datok Meuntroe ngon panglima**

**Putroe Lason Din Syarifah  
Neuwoe pantah u istana  
'Oh sare troh u meuligoe  
Tan le Putroe Rakna Keumala**

**Yoh nyan jimo Putroe Lason  
He po cut lon ho ka jiba  
Bitkeu jiwoe kaphe asee  
Hana lon thee gata jiba**

**He teumuda nyang sambinoe  
Ho troh kamoe 'oh tan gata  
Putroe Lason sangat sosah  
Din Syarifahpi that ruga**

**Kaphe paleh haram jadah  
Le that ilah po ceulaka  
Putroe dua jimo bae  
Dendayang le jimo rugha**

**Putroe Lason Din Syarifah  
Ile limpah ngon ie mata  
Lom ngon jikheun panton syae  
Le Putroe Ti Lason muda**

**Ayoh kumbang makan ie madu  
Kumbang beurteumu deungon cicemnya  
Bukon sayang tinggai keuleumbu  
Teumpat beuradu apa gunanya**

**Meunan syae Putroe Lason  
Meukeut meutren meuadoe a  
Lom meupanton Din Syarifah  
Putroe cidah Biwan Lama**

Peuraka ngon peutek tampu  
Geuboh bu pajoh ngon lakoe  
Cempeudak kayee meujen  
Kayee laen umpung beuragoe

Gata adek sangat lon syen  
Ngon siat len keumala nanggroe  
Na sikeujap dum panyot len  
Gata yoh phon jipeulaloe

Meunan panton Din Syarifah  
Putroe indah Biwan Lama  
Teuduek 'oh nan saboh kisah  
Laen ulah jinoe teuma

Nyang mangat bee bungong rihan  
Nyang mangat nan bungong jeumpa  
Amma bakdu he nyak sanan  
Lon kisah nyan Raja Cina

Raja Cina jiwoe ka troh  
Beude jicoh hana reuda  
Laot darat su geumuroh  
Sang ka runtoh alam donya

Ka jiteungoh dum u darat  
Meusapat bak Raja Cina  
Raja Cina kheun bak rakyat  
Jiyue karat peugot kuta

Kadang-kadang uroe dudoe  
Jiprang nanggroe uleh Bangta  
Peugot kuta beuseuleusoe  
Bek le laloë bandum gata

Ureueng Cina deungo meunan  
Bak masa nyan peugot sigra  
Ka jipeugot kuta nanggroe  
Bak meuligoe Raja Cina

Jitueng tiree aneuk bisoe  
Bak nanggroe Rakna Keumala

Meunan di jih teuma jinoe  
Kuta nanggroe kuta kuala

Lua dalam hana jeuoh  
Sinan piyoh aneuk lila  
Pageue kuta sangat kukoh  
Beusoe jiboh pacang suda

Parekpi lhok wahe sahbat  
Cukop leungkap dum peukara  
Sinan jitroh Putroe Siti  
Nyang juhari Rakna Keumala

Keubah sinan sapat ngon droe  
Cut putroe nyang ilok rupa  
Sinan ase dum sinaroe  
Suda beusoe pacang junga

Kata dalang eumpunya rawi  
Tadeungo he adoe raja  
Raja Cina rindu ate  
Jicom sabe peutoe kaca

Luka idong teubiet darah  
Lom meutamah teuot luka  
Dawok jilise lingka peutoe  
Jicom putroe keunong kaca

Raja Cina luka teuot  
Bruek beusot na saboh raga  
Meunan sabe raja paleh  
Dawok jieh lingka kaca

Teuduek 'oh noe saboh lapeh  
Lon kisah jeh Rakna Bangta  
Rakna Bangta lam meuligoe  
Banlimong droe keunoeng mintra

Leupah nibak tujoh uroe  
Banlimong droe puleh sigra  
'Oh ban puleh nibak pangsan  
Sipeurti ban baro jaga

Hana tuto banlimong droe  
Teuma neuwoe u istana  
Ban sare troh u meuligoe  
Beudoh Putroe Lason muda

Jiboh idang top ngon sange  
Putroe jime ngon ceurana  
'Oh lheueh makeuen banlimong droe  
Marit putroe ubak Bangta

Deelañ ampon deungo kamoe  
Po cut putroe ka u Cina  
Ban neudeungo haba meunan  
Reubah pangsan Rakna Bangta

'Oh ban puleh nibak pangsan  
Han meuban-ban ro ie mata  
Teuma neukheun bak Cut Lason  
He adek lon tango hamba

Pakri jicok tuan putroe  
Ureueng nanggroe prang han reuda  
Tok Labala ngon Tok Meuntroe  
Neuseudoe kaphe beulaga

Jicok putroe hana soe thee  
Keunong tipee Raja Cina  
Putroe peugah dum sibarang  
Neujak meuprang deungon Cina

Rakna Bangta deungo meunan  
Neukrah yoh nyan dum peutua  
'Oh meusapat bandum keu nan  
Marit yoh nyan Rakna Bangta

Na tadeungo uleebalang  
Dum sibarang geusyik panglima  
Ulon jinoe kujak meuprang  
Kumeung guncang nanggroe Cina

Nibak gata pakri reumbang  
Takheun rijang ri nyang suka

Teuma seuot uleebalang  
Patot sajan kamoe neuba

Meunan narit uleebalang  
Dum sibarang rakyat nyang na  
Meunyo meunan jak meuase  
Kayee di gle tajak mita

Beudoh jinoe takoh kayee  
Kapai dilee tabicara  
Yoh nyan rakyat dum sibarang  
Jijak teubang kayee raya

Me beuliyong baci galang  
Utoh tokang mehmoh raya  
Kayee jikoh goh layee on  
Ka jisuson papeuen bahtra

Peugot bidok ngon kuangkang  
Beuncalang meuribee laksa  
Padum lawet peugot sabe  
Hingga ase bandum leungka

Bangta Sawang na kapai droe  
Deungon lakoe Lason muda  
Peudieng alat teuma jinoe  
Geuk ngon droe bandum rata

Troh u laot bandum sare  
Geusurak le that meutaga  
Troph u laot dum sinaroe  
Datok Meuntroe deungon Bangta

Haba Bangta teuduek siat  
Lon riwayat Sakdan Lila  
Uroe teuka Silasiman  
Bandua ngon Silanaga

Sakdan Lila neukheun meunoe  
He aneuk droe tango hamba  
Pakri meuteumee Putroe Siti  
Ho peureugi bandum gata

Pakri jibri si nyak putroe  
Aneuk kamoe ka u Cina  
Rakna Bangta sangat keubai  
Pakri ban hai tacalitra

Kon lon dapat meunan pike  
Raja kaphe aneuk ceulaka  
Rakna Bangta sangat lisek  
Bungong rubek ka gop hila

Raja Sakdan tanyong meunan  
Seuot yoh nyan Silanaga  
Ampon tuanku po junjongan  
Patek laman keunong mintra

Kamoe limong keunong taki  
He doli meukuta donya  
Keunong sihe kamoe limong  
Teukeunong bak Raja Cina

Rakna Bangta keunong hekeumat  
Gadoh ingat sang ka fana  
Tujoh uroe kamoe pangsan  
Syahi alam meuthee hana

Dudoe teuma lheueh nyan puleh  
Lon peugah jeh teuma jaga  
'Oh ban puleh syahi alam  
Neuwoe rijang dalam kuta

'Oh sare troh u meuligoe  
Ubak adoe Lason muda  
Putroe Lason teuma peugah  
Masaalah neucalitra

'Oh neudeungo han le putroe  
Pangsan dudoe Rakna Bangta  
Silanaga meunan jikheun  
Ka teuanun poteu raja

Han le haba sapeue neukheun  
Tahe hireuen ureueng tuha

Teuduek 'oh nan siat dilee  
Lon peuteuntee kapai bungka

'Oh lheueh ase dum sinaroe  
Bungka jinoe laju sigra  
Geubet saoh buka layeue  
Angenpi kheue reumbang pasa

Kapai jiplueng dalam laot  
Tihang seupot sang bak nangla  
Beuncalang plueng jroh meuanggok  
Nyang bidok jiplueng meugisa

Nyang banteng jiplueng bagah that  
Di gurap jiplueng meutaga  
Di sumbok pantah jilari  
Bhot api sang kilat faja

Dumna rakyat ate beureuhi  
Keucapi Meusu han reuda  
Nukara suleng ngon bangsi  
Meu'i-i meusu biula

Mangat ate bandum rakyat  
Beurangkat sajan ngon raja  
Neubeuet Quruan su mangat that  
Mohon rahmat bak rabbana

Dalam kapai bandum sinan  
Bak Tuhan geulakee do'a  
Sabab geujak nanggroe jeuoh  
Geusuroh nibak ulama

Padum lawet peulayaran  
Uroe malam hana reuda  
Hingga troh le sikalian  
Bak masa nyan troh u Cina

Kapai ka troh bineh nanggroe  
Rab tanggoe u mieng kuala  
Rakna Bangta mat teureupong  
Neuloh gampong kalon rupa

Leumah kuta bineh pasi  
Jroh meuriti hana nyang sa  
Pageue kuta beusoe bulat  
Pacang le that dum di lúa

Rakna Bangta raja deelat  
Neumeupakat ngon syeedara  
Dum geutanyoe piyoh siat  
Bek takarat mieng kuala

Kuta pasi le that rakyat  
Pakri pakat taprang kuta  
Kapai Bangta teutap sinan  
Lon karangan ureueng Cina

Ban jikalon kapai ka doe  
Jiplueng sidroe ubak raja  
Troph bak raja jaroe jibet  
Ban nyang patot peugah haba

Kapai le that dalam laot  
Tongkang ngon bhot han ek kira  
Sang tuanku kapai musoh  
Lon ngieng jeuoh leumah rupa

Judo putroe kadang ka troh  
Tuanku beh keu noe teuka  
Ban jideungo meunan lagee  
Raja asee sosah raya

Pakri padan pakri lagee  
Katroh bak kee mawot seuba  
Teuma seuot sidroe bujang  
Pakon bokbang po meukuta

Ngon keuramat tuhan lati  
Teuntee geubri ban nyang pinta  
Ubak patong jimeulakee  
Kaphe seudee pungo gila

Meunyo meunan kaeu lagee  
Jak peuteuntee kaeu rupa

**Bek kabri rab keu noe dilee**  
Kaboh euntee di kuala

Ban jideungo narit doli  
Ka jilari le jigisa  
Troph lam kutu jipeureugi  
Jipeugah le bak panglima

Ho ka gata keujruen meuntroe  
Peukeumah droe laju sigra  
Ureueng musoh keu noe ka toe  
Beude jinoe mat beurata

Di blang raya ureueng meugoe  
Di blang nanggroe ureueng seumula  
Ureueng Cina peukeumah droe  
Lon kisah nyoe ureueng teuka

'Oh ban sare beungoh uroe  
Beudoh jinoe Tok Labala  
Ho ka gata Datok Meuntroe  
Cuba jinoe phon tamula

Cok le tunam mat u jaroe  
Ka geupasoe le ngon lila  
'Oh ban geulhiet lila gaboh  
Boh beureutoh dalam kuta

Nyang di daratpi tan teudoh  
Seun sireutoh seun silaksa  
Ureueng Cina tango kiroh  
Beude jicoh ka hu kuta

Nyang lam kapai pi cit meunan  
Bak uroe nyan prang that raya  
Seupot uroe seungap beude  
Prang hana le uroe sinja

Dua pihak ka meupiyoh  
Singoh beungoh lom jak ngaza  
Padum uroe prang meutunang  
Mantong timang sabe padra

Hana saho talo meunang  
Prang meutunang deungon Cina  
Jitet beude jareueng-jareueng  
Sang jiampeueng jamee teuka

Linto baro sang geuampeueng  
Le that ureueng linto geuba  
Dalam kapaipi cit meunan  
Lon karangan Bangta muda

Rakna Bangta peunap kitab  
Neukalon bab peupoh angka  
Abeh neueu kutika prang  
Neupeureumbang ulee naga

Teuma leumah dalam bustan  
Bak uroe nyan na kutika  
Dalam jeuem nyoe bek tameuprang  
Kutimang mantong meuriba

Raja Palak di geunireng  
Jikeureuleng atueuh gata  
Singoh beungoh watee suboh  
Kutika jroh silagoina

Raja Palak jroh that timang  
Jroh that seunang han peue mara  
Teuma neukheun bak cut abang  
Piyoh rijang he kakanda

Bangta Sawang deungo meunang  
Surot yoh nyan bandum rata  
Seungap beude dum sinaroe  
Han deuh nanggroe jidong bahtra

Ureueng Cina mangat ate  
Kapai han le jieu rupa  
Dalam kapai dum sinaroe  
Peukeumah droe dum lasyeuka

Hingga malam le ngon uroe  
Bansinaroe geumeujaga

Nakeu watee teungoh malam  
Geukek tajam kapai bahtra

Rab kuala dum sinaroe  
Saoh jinoe geulhom sigra  
Kukuek manok saboh-saboh  
Ka neubeudoh Rakna Bangta

Neuyue teungoh dum u darat  
Jilumpat bandum peutua  
Silasiman laju lumpat  
Dua meuhad Silanaga

Banduajih ka u darat  
Ate mangat hana tara  
Datok Meuntoepi grop rijang  
Di likot nyan Tok Lebalia

Bangta Silah Bangta Sawang  
Neugrop tajam le bandua  
Teuma neugrop Raja Sakdan  
Sireuta ngon Rakna Bangta

Ka u darat sikalian  
Rakyat sajan meuploh laksa  
Nyang na tinggai ureueng binoe  
Bansinaroe dalam bahtra

Ka u darat dum sinaroe  
Nibak jaroel alat rata  
Cukop alat cokma beusoe  
Seuligoe peudeueng ngon ganja

Yoh nyan geukek dum sinaroe  
Geupeutoe bak gaki kuta  
Ureueng Cina teungeut keudroe  
Bansinaroe goh lom jaga

Rakna Bangta tanyong padan  
Pakri macam taprang kuta  
Teuma seuot Silasiman  
Bandua ngon Silanaga

Na neudeungo ampon deelat  
Ulon lumpat dalam kuta  
Rakna Bangta neutham leugat  
Bek talumpat he adekda

Bahle sinan tahei sare  
Tatet beude bah di luar  
Meunan haba Bangta Kumari  
Geusurak le su meutaga

Surak deumpek nyum sang reule  
Geutet beude han ek kira  
Bak masa nyan he boh ate  
Matahari goh lom nyata

Nakeu baro puteh Timu  
Ureueng 'a-'u luar kuta  
Ureueng Cina abeh karu  
Ladom teungku baro jaga

Jiplueng keu deh jiplueng keu noe  
Meusogumoe dalam kuta  
Teukeujot that aneuk bisoe  
Surak tanggoe beude lila

Na siteungoh mate keudroe  
Keunong cakcoe nyang le fana  
Pinto kuta ka jipeuhah  
Jiplueng pantah ubak raja

Padum luka capiek patah  
Meuhah-meuhah jiplueng sigra  
Le that mate nyang teungoh plueng  
Keunong peudeueng Tok Labala

Nyang na tinggai na padum droe  
Laju jiwoe dalam kuta  
Yoh nyan pintopi ka jitop  
Rakyat kalot sinan subra

Nyang goh talo kuta nanggroe  
Bak meuligoe Raja Cina

Rakyat nyang plueng keu nan jiwoe  
Le that paloe dum binasa

Nyang ka talo kuta pasi  
Bangta Kumari ka po jeumba  
Geutet beude ngon meuriam  
Ureueng sinan ka jibungka

Suroh Bangta teuma bak ngon  
Neuyue tanom bangke Cina  
Abeh bandum ka geutanom  
'Oh lheueh nyan lom suroh raja

Neuyue jak tueng Din Syarifah  
Ngon cut indah Lason muda  
Peurumoh imum uleebalang  
Peurumoh bujang ngon bentara

Biek cut-kacut han ek bileueng  
Bandum meugleueng rata-rata  
Ka troh keu nan dum sinaroe  
Marit meunoe Rakna Bangta

Na tadeungo Datok Meuntroe  
Pakri jinoe taprang kuta  
Bah tapeugot saboh surat  
Taintat keu Raja Cina

Takheun putroe tayue pulang  
Yoh goh taprang hanco kuta  
Datok Meuntroe meunan kalam  
Surat yoh nyan peugot sigra

Lheueh geupeugot ngo lon peugah  
Bukon cidah narit Bangta  
Inilah surat nibak kamoe  
Di dalam nyoe jroh that haba

Whe ureueng raja kaphe  
Pulang Siti judo hamba  
Han kapulang tuan putroe  
Ingar keudroe he ceulaka

**Kuprang kuta gata kupoh  
Kureuloh meuligoe gata  
Yoh goh talo kuprang nanggroe  
Intat putroe 'oh kuala**

**Deungon gata tamong Islam  
Beuroh makam Nabi kita  
Tapujoe Nabi Muhammad  
Syafaat saidil anbia**

**Meukon meunan han seulamat  
Kaphe laknat asoe nuraka  
Meunan haba dalam surat  
Geuyue intat le keu Cina**

**Raja Cina kalon surat  
Jicok leugat jiyue baca  
Ubak nujum yue beuet surat  
Di nap rakyat rame raya**

**Raja Cina marit leugat  
Pakri pakat he peutua  
Cut putroe jilakee pulang  
Yue ba rijang u kuala**

**Teuma seuot Tok Pang Lumpoe  
Deungo kamoe po meukuta  
Meuna udep Tok Pang Lumpoe  
Bak uroe nyoe meuri raja**

**Bahle ulon lawan meuprang  
Bek neupulang putroe muda  
Mangat ate lon han macam  
Cek Labiram lon tueng bila**

**Lon poh mate Silasiman  
Bandua nyan Silanaga  
Jinoe balah laju surat  
Jak intat keu Rakna Bangta**

**Jipeugot le teuma surat  
Haba mangat jicalitra**

Ini surat nibak 'kamoe  
Deungo jinoe mula-mula

Haba nyang phon sang bu leukat  
Bukon 'ajab hana tara  
Di ujung nyan ngo lon peugah  
Miseue kuah geuboh tuba

Wahe adek Bangta Kumari  
Judo Siti Rakna Keumala  
Nanggroe lon nyoe bek le taprang  
Jeuet lon pulang putroe muda

Singoh beungoh jeuet lon pulang  
That lon sayang gata teuka  
Bitpi meunan he adoe jroh  
Bek tateuoh putroe muda

Bek antara kubri pulang  
Taingat nan bek di gata  
Dum ruman kah jak tueng putroe  
Kusangka soe pane raja

Teugo talo kuta pasi  
Prang tataki uleh gata  
Nyang u nanggroe cuba taek  
Kuthee tarek gata teuga

Nyang putroe nyoe bek meuayang  
Han kupulang le keu gata  
Nyang di sinoe han kupulang  
Lom di sinan' kujeuet hila

Nyang putroe nyan han kukeubah  
Jinoe kah-kah sapeue fana  
Jinoe kucok Din Syarifah  
Ngon cut indah Lason muda

Gata bandum geumaseh that  
Tajak intat ube nyang na  
Keu kamoe nyoe sayangteu that  
Tajak intat lom bandua

Yue jak laju kaman keu noe  
Nyoe pat kamoe dalam kuta  
Gata bandum kupoh mate  
Kuboh bangke atueh sula

Bit nyo gata akai budueng  
Tapeugot lueng umong paya  
Hansep saboh nyang ka kutueng  
Lom cut meugleueng keu noe taba

Bit nyo gata hana malee  
Lom deungon kee tameuseunda  
Singoh beungoh baro tathee  
Kutueng keu kee lom bandua

Din Syarifah ngon Cut Lason  
Kuhimpun keu noe lam kuta  
Meukon meunan ban nyang kukheun  
Bit nyo geusuen kamoe Cina

Na cit daleh ka troh keu noe  
U nanggroepi kujak mita  
Meunan haba dalam surat  
Jiintat keu Rakna Bangta

Nyang ba surat Bangta salen  
Neubri kayen ija sutra  
Teuma Bangta neubeuet surat  
Di nap rakyat meuploh laksa

Soe nyang deungo haba surat  
Beungehjih that hana tara  
Rakna Bangta tanyong leugat  
Pakri pakat taprang kuta

Teuma seuot Datok Meuntroe  
Singoh uroe taprang raja  
Keumah pakat dum sinaroe  
Datok Meuntroe deungon Bangta

Hingga malam le ngon uroe  
Geueh keudroe dum sineuna

Beurujuek di cong bak maken  
Peureuleng jidong cong panjoe

Amma bakdu he teungku lem  
Leubeh masen nibak baroe  
Nibak nyang ka ulon peugah  
Gura leupah prang uroe nyoe

Leubeh hibat that meuriah  
Sabe meugah jimeuumpoe  
Beungoh uroe teuka siang  
Peubeudoh prang Tok Pang Lumpoe

Jipeh tambo deungon geundrang  
Ting-tong canang kiam bunyoe  
Ngonjisurak kiam subra  
Nyum sang geunta langet bumoe

Jih dua droe nyang keupala  
Pahlawan Kha Tok Pang Lumpoe  
Surak deumpek that meutaga  
Rakyat that bha meuploh katoe

Nyum sang reuloh donya pipak  
Sang meugrak-grak langet bumoe  
Bangta deungo Cina surak  
Neukheun ubak Datok Meuntroe

Na tadeungo Tok Labala  
Ureueng Cina keu noe ka toe  
Ban neudeungo meunan haba  
Geundrang raya le neukiloe

Teuma marit Sakdan Lila  
Jak udeh ta dum geutanyoe  
Teuma seuot Silanaga  
Bek meukuta neujak keudroe

Bahle kamoe dilee nyang na  
Tok Labala Datok Meuntroe  
Poteu raja dudoe meuprang  
Meuka hilang umu kamoe

Meuna mantong umu laman  
Bek junjongan dilee jak droe  
Meunan narit Nagasilan  
Seungap yoh nyan raja nanggroe

Ureueng Cina got that lagee  
Meuree-ree jiek ban unoé  
Tajampi that sang tulo po  
Rakyat meujo aneuk bisoe

Ka rab hampe pageue kuta  
Pahlawan Kha Tok Pang Lumpoe  
Yoh nyan beungeh Silasiman  
Teubiet yoh nyan bandua droe

Tok Labala di likot nyan  
Bandua ngon Datok Meuntroe  
Ban meurumpok meujuara  
He Silanaga peurab keu noe

Buet jaroe lon nak karasa  
Kutueng nyawa kah uroe nyoe  
Teugo baroe that guransang  
Rakyat kacang hana padoe

Bak uroe nyoe gadoh garang  
Peurab rijang hak kuseudoe  
Teuma seuot Silanaga  
Pane muka meuhei kamoe

Muka asee meuhei hamba  
'Oh kutampa teuloh gigoe  
Ulonteu nyoe han peue gaya  
Han kutaba baranggasoe

Bek ngon kamoe peukreueh jungka  
Kuhila beuteuleuep jaroe  
Bek kreueh babah beukaingat  
'Oh kumat meuhad meupaloe

Kupoh mate kah bandua  
Teuma raja kupoh dudoe

Ban jideungo meunan haba  
Beungeh raya Tok Pang Lumpoe

Silasiman jipoh leugat  
Deungon tungkat nibak jaroe  
'Oh ban jipoh pruh jilumpat  
Ngon pantah that hana bagoe

Silasiman balah rijang  
Peudeueng panyang mat di jaroe  
'Oh ban jitak sang meuruweueng  
Meuk peudeueng teubiet meugumoe

Got keubai that kaphe asee  
Sion bulee hana paloe  
Tok Labala saboh lagee  
Neucang sitree Cina pindoe

Sigo saho reubah peudeueng  
Kateugageueng dum teupipoe  
Rakyat mate han ek bileueng  
Kisah lon kheun Tok Pang Lumpoe

Teuma jipoh Silasiman  
Ngon tungkat nyan nibak jaroe  
Adat keunong han peue pike  
Meuhad mate ajai sampie

Silasiman peudeueng jigrak  
Jikeumeung tak Tok Pang Lumpoe  
Han ek keunong kaphe paleh  
Jigrop keu deh jigrop keu noe

Ureueng peuet droe,jimeutangkeh  
Dua rot deh dua rot noe  
Rakyat laen han ek peugah  
Ulon kisah ureueng peuet droe

Hana rusak bandua blah  
Sabe gagah wahe adoe  
Jimeupoh-poh hana reunggang  
Sabe timang keu deh keu noe

**Tok Labala Silasiman**  
Bandua nyan Datok Meuntroe  
Tok Labala nyoe lon peugah  
Teuga leupah bandua droe

Got that jipreh jimeung reupah  
Watee reubah meung boh anoë  
Meunan napsu Tok Labala  
Meunan cita bandua droe

Ureueng peuet droe tango kiam  
Jimeutak tham keu deh keu noe  
Hana teudoh meujuara  
Miseue puta hana padoe

Teuma marit Pahlawan Kha  
Bek meuseunda wahe adoe  
Sabab dilee ka tarasa  
Layeue masa lon tueng putroe

Teugo goh lom karasa jra  
Kah Silanaga han thee keudroe  
Teuma seuot Silanaga  
Bit goh lom jra ulonteu nyoe

Nyokeu ulon beukaturi  
Biek gogasi bandua droe  
Ruman gata ureueng Cati  
Kulhak gaki deungon jaroe

Rot deh meunan rot noe meunan  
Jimat yoh nyan deungon cakcoe  
Jimeutak tham hana teudoh  
Teubiet reuoh dalam uroe

Phon beungoh kon tan jipiyoh  
Hingga ka troh leuho uroe  
Nyoe lon peugah Rakna Bangta  
Sakdan Lila ayah putroe

Bangta Silah Bangta Sawang  
Neupeukek prang teuma jinoe

Sayang neueu Silanaga  
Hana reuda meusogumoe

Han ek tiwah Pahlawan Kha  
Bandua ngon Tok Pang Lumpoe  
Silanagapi goh lom bu  
Sayang neueu bandua droe

Rakna Bangta neukek laju  
Ngon tuanku ayah putroe  
Bangta Silah neukek rijang  
Bangta Sawang ka banpeuet droe

'Oh sare troh keu nan lam prang  
Meutunang ngon Tok Pang Lumpoe  
Pahlawan Kha marit yoh nyan  
Bek sidumnan kajak keu noe

Sireutoh treuk keu noe kaba  
Han kutaba baranggasoe  
Rakna Bangta seuot pantah  
Bek beurakah aneuk bisoe

Meuna tulong nibak Allah  
Ban napsu kah han ek sampie  
Bangta Silahpi ka keu nan  
Bangta Sawangpi ka sampie

Teuma marit Raja Cina  
Meujuara hana padoe  
Sinan jidong pinto kuta  
Ubak Bangta jikheun meunoe

Soe saleh nyan lon eu jroh-jroh  
Cuba kapoh Tok Pang Lumpoe  
Pahlawan Kha meuek kapoh  
Ulon saboh namiet kah nyoe

Bangta seuot insya Allah  
Poteu Allah tulong kamoe  
Rakna Bangta neugrak peudeueng  
Neutak meupeung Tok Pang Lumpoe

Han sigeutu na jipajoh  
Peudeueng luroh miseue anoe  
Rakna Bangta peh-peh peudeueng  
Kaphe bajeueng keubai tuloe

Ban jikalon han le alat  
Jigrak tungkat Tok Pang Lumpoe  
Watee jipoh Bangta lumpat  
Ujong liwat sret lam anoe

Pahlawan sang-sang meukarat  
Gop rame that jih dua droe  
Ureueng limong nyang pantah that  
Deungo sahbat lon peugah soe

Silasiman Silanaga  
Rakna Bangta pantah han soe  
Bangta Sawang Bangta Silah  
Nyanpi pantah bandua droe

Banlimong nyan miseue kilat  
Neulumpat bak Tok Pang Lumpoe  
Ka neureubot tungkat raya  
Pahlawan Kha tahe keudroe

Bangta Sawang tajo leugat  
Neucok tungkat Tok Pang Lumpoe  
Bandua droe tan le alat  
Neupoh leugat hana padoe

Neupoh keu noe jigrop keu deh  
Kaphe paleh tajam han soe  
Teuma tajo Silasiman  
Jidrop yoh nyan Tok Pang Lumpoe

'Oh ban jidrop ngo lon peugah  
Jimeureupah hana bagoe  
Jimeucron-cron han peue peugah  
Sabe gagah bandua droe

Jibeudoh dhoi u antara  
Troh nam deupa jipo anoe

Jimeureupah sabe teuga  
Simansila Tok Pang Lumpoe

Leungo bumoe miseue geumpa  
Sangat teuga bandua droe  
Teuma tajo Bangta Silah  
Neupoh bagah nibak jaroe  
  
Lom neutajo Bangta Sawang  
Neumat rijang aneuk bisoe  
Tok Pang Lumpoe yoh nyan reubah  
Bangta Silah mat bak jaroe

Mat bak gaki Bangta Sawang  
Silasiman mat ulee nyoe  
Tok Pang Lumpoe ka teugageueng  
Seulinteueng na miseue ramoe

Datok Meuntroe geuheu rijang  
Troh le datang keu nan sampoe  
Geukoh takue aneuk jalang  
Maté di blang nyawong sampoe

Ka teudu lagee beurandang  
Aneuk jalang sinan sidroe  
Nyoe lon peugah Silanaga  
Pahlawan Kha jidrop jinoe

Jimeureupah han ban peubla  
Meuhue hila keu deh keu noe  
Jimeucron-cron jimeuwa-wa  
Sabe teuga bandua droe

Jipo anoe u antara  
Meuhue hila meusogumoe  
Teuma tajo Rakna Bangta  
Pahlawan Kha neumat jinoe

Di jih sidroe gop nyan dua  
Geumat bak pha siblah sapo  
Teuma geupriek le geuhila  
Beukah dua umu sampoe

Kakeu mate Pahlawan Kha  
Bandua ngon Tok Pang Lumpoe  
Rakyat Cina kalon rupa  
Pahlawan Kha Tok Pang Lumpoe

Kakeu mate nyan bandua  
Jiplueng sigra dum sinaroe  
Abeh jiplueng rakyat Cina  
Ubak raja laju jiwoe

'Oh ban leupah pinto kuta  
Rakyat Cina kiam tuloe  
Jijak peugah ubak raja  
Bandum rata beuet jaroe

Jikheun han le Pahlawan Kha  
Bandua ngon Tok Pang Lumpoe  
Siñan di blang he tuanku  
Lon eu teudu bandua droe

Meuplueng kamoe keu noe laju  
Bak tuanku jak peugah proe  
Raja Cina yoh nyan tahe  
Han le tuto teukap gigoe

Pahlawan dua nyan ka mate  
Sosah ate hana bagoe  
Nyoe lon peugah Rakna Bangta  
Silanaga Datok Meuntroe

Ban neukalon han le Cina  
Neuwoe lanja bansinaroe  
Ka meusapat dalam kuta  
Tuha muda abeh geuwoe

Nyoe lon peugah Raja Cina  
Pucat muka ka rab jimoe  
Sabab han le Pahlawan Kha  
Sosah raya aneuk bisoe

Nyan pahlawan nyang that teuga  
Bandua ka umu sampoe

Raja Pupot jihei sigra  
He adekda tango kamoe

Nyoel lon peugah ubak gata  
Lona adekda umu sampoe  
Raja Pupot seuot sigra  
Bek le duka tuanku droe

Meunyo mantong ulon tuan  
Bek cut abang peusosah droe  
Di lon dalem goh kumeuprang  
Neueu kucang bandum jinoe

Pat na raja miseue ulon  
Dalem payong raja kamoe  
Tok Labala ulon simpan  
Bandua nyan ngon Tok Meuntroe

Silanagapi kuhantam  
Silasimanpi kuseudoe  
Bangta Silah Bangta Sawang  
Nyanpi kucang bandua droe

Rakna Bangta kupoh mate  
Hana pike nibak kamoe  
Jinoe kupoh mate banlhee  
Kutueng keu kee si nyak putroe

Di lon saboh teuma neubri  
Baranggari he dalem droe  
Got Cut Lason keu lon neubri  
Syarifah Ti jeuet keu kamoe

Din Syarifah neubri keu lon  
Teungku ampon bah keu adoe  
Laen nibak nyan hana lon tueng  
Cut meugleueng nyang bayek budoe

Raja Pupot meunan jikheun  
Seuot aduen Cina geutoe  
Ri nyang galak tacok saboh  
Nyang leubeh jroh wahe adoe

Raja Cina jikheun meunan  
Seungap yoh nyan bandua droe  
Teuduek 'oh nan siblah rambat  
Lon rawayat Rakna Bangta

Haba nyoe lon peurab leugat  
Bek panyang that lon calitra  
Lheueh mate pahlawan dilee  
Woe meuree-ree dalam kuta

Mangat ate mate sitree  
Nyang kreueh ulee nyan bandua  
Rakna bangta teuquek dilee  
Lon peuteuntee Raja Cina

Raja Cina jimeututo  
Tadeungo e adoe raja  
Wahe adek nyang bangsawan  
Siri padan tapoh Bangta

Padum na trep ka tameuprang  
Mantong timang sabe padra  
That beurani lakoe putroe  
Geutanyoe jimeuniet hana

Ngon pahlawan hana bagoe  
Banlimong droe beuhe teuga  
Han ek mate lom meusidroe  
Pakri jinoe ilah daya

Ho rot ilah wahe adoe  
Pakri jinoe niyang sijahtara  
Gata adoe sangat lisek  
Geuthhee tarek jeuep-jeuep donya

Cit jitakot silagoe ek  
Gata adek lam jipuja  
Le eleumee deungon sakti  
Jeuet barangkri tapeurupa

Rimba uteuen jeuet keu jalan  
Gunong hitam jeuet keu banda

Wahe adek Raja Pupot  
Le soe takot akan gata

Bek le adek sangkot-pawot  
Ingar keu cut abang tuha  
Teuma marit Raja Pupot  
Bek teumakot dalem raja

Bek teumakot he tuanku  
Singoh neueu kupoh Bangta  
Banlimong droe jih kubalu  
Kutueng judo lom bandua

Bah lon ujoe Bangta Kumari  
Lakoe Siti Rakna Keumala  
Singoh beungoh pagi hari  
Wahe doli prang kupuga

Meunan jikheun raja paleh  
Teuma jieh teungeut indra  
Raja Cina ate puleh  
Jingo peudeh tuto adekda

Bak jipike sampoe hajat  
Tuto mangat bak adekda  
Teuduek 'oh noe dilee siat  
Lon riwayat Rakna Bangta

Dalam kuta dum meupiyoh  
Teuntee singoh prang that raya  
Neupeugah le ubak adoe  
Sibarang proe dum syeedara

Nyoe lon peugah ube patot  
Raja Pupot singoh ngaza  
Beuingat that wahe rakan  
Raya that prang nibak nyang ka

Abeh haba Bangta seudang  
Uroe siang ka cuaca  
'Oh ban beungoh pagi hari  
Kumari neubuka haba

Wahe dalem Bangta Sawang  
He cut abang lon nyang tuha  
Jinoe dalem tajak meuprang  
Bek lintang uroë ka jula

Teuma seuot Bangta Sawang  
Ban nyang reumbang nibak gata  
Meunan narit Bangta Sawang  
Lon peuriwang Raja Cina

Raja Pupot teudong keudroe  
Nibak sagoe kuta raja  
Teungoh jibeuet dum hëkeumat  
Kaphe laknat le bicara

Jipruh keu deh jipruh keu noe  
Teuka jinoe saboh rupa  
Jeuet le apui na miseue gle  
Jilingka le kuta Bangta

Hupi raya that meupayong  
Manyang lambong u antara  
Kuta Bangta sang ka tutong  
Tuhan tulong han binasa

Rakyat bandum ka teumakot  
Bak teuot jipeugot geumpa  
Le hekeumat Raja Pupot  
Jikeumeung tet kuta Bangta

Rakna Bangta sang meunyum gli  
Ubak Rabbi mohon pinta  
Neutulong lon he ya Rabbi  
Nibak sihe Raja Cina

Neupuleh le nyan hekeumat  
Apui leubat gadoh rupa  
Bangta ingat akan guree  
Masa dilee mula-mula

Deungon tulong Rabbon 'Ibad  
Ujeuen leugat tren u donya

Teuka reudok sang boh jam bee  
Meuree-ree ujeuen tan reuda

Ujeuen jitren sabe-sabe  
Apui len le bandum rata  
Gunong apui abeh reule  
Apui matehan le nyala

Yoh nyan beungeh Cina sihe  
Bak jipike han meuguna  
Teuma laen lom jikasad  
Kaphe jeungkat le bicara

Jeuet le teuma han jan siat  
Rupa hibat ban geureuda  
Ka jipo le jisujud-sujud  
Meuhuet-huet ban bade raya

Ateueh kuta he teungku cut  
Jiteueng sayeuep reului donya  
Bandum ureueng jimeung pajoh  
Yoh nyan kiroh he teumuda

Bandum ureueng subra riyoh  
Jieu ka troh nyan geureuda  
Le eleumee raja biyoh  
Napsujih troh bak jisangka

Rakna Bangtapi that utoh  
Ka neuse troh saboh do'a  
Tuhan tulong bungong ipoh  
Keu nan ka troh saboh rupa

Sang binatang wahe nyak ti  
Rupa sang ri cicem rimba  
Ban beuragoe bak rupa ri  
Jinari atueh geureuda

Teuma jilop lam geulunyueng  
Geureuda bajeueng pungo gila  
Jicoh utak deungan tuleueng  
Ka kingkeueng inong geureuda

Geureuda ka jipoh-poh droe  
Cula-caloe dalam hawa  
Saketjih that hana bagoe  
Jisumpom droe u laot raya

Ban sare sret ka meusampe  
jiteugom le eungkot tapa  
Eungkot tapapi jirabe  
Aneuk sihe ma geureuda

Bandum eungkot keu nan meujrom  
Jingom-ngom le pawoh raya  
Aneuk eungkotpi meutamon  
Lagee sidom bak geureuda

Geureuda nyan kakeu mate  
Jiteubiet le beuragoe rimba  
Tulong Tuhan ka meusampe  
Mangat ate rakyat Bangta

Geusurak le dum sinaroe  
Kaphe pindoe juah raya  
Sabab napsu tan seuleusoe  
Lom jipakoe laen rupa

Lakee bantu ubak patong  
Lakee tulong bak beurala  
jiduek jidong nyan jijunjong  
Mohon untong hana reuda

‘Oh teuingat nibak ate  
Ka jise le saboh rupa  
Jiingat jipike-pike  
Kadeungo he raja naga

Yoh nyan jikheun kaphe pindoe  
He ulon droe kapoh Bangta  
Kapoh mate aneuk bisoe  
Bansinaroe kapeufana

Ban jideungo narit meunan  
Naga yoh nyan beudoh sigra

Jijak laju teuma yoh nyan  
Beungehjih ban gajah meunta

Badan raya na miseue gle  
Rab ka hampe kuta Bangta  
Yoh nyan Bangta ka teupike  
Dalam ate kira-mira

Nyokeu sakti raja sitree  
Laeen lagee jipeurupa  
Meunan bangon nyum meuteuntee  
Kaphe asee le bicara

Rakna Bangta neumeuinseuen  
Meunoe neukheun meusempeuna  
Ya Ilahi Poku Tuhan  
That sukaran kamoe dimna

Beuek lon poh sihe syetan  
Poku Tuhan tulong hamba  
Lheueh neukheun nyan rahop jaroe  
Do'a meunoe bak Rabbana

Bangta ingat keu hekeumat  
Beutroh hajat kamoe hamba  
Deungon sakti hajat sampoe  
Lahe sidroe raja naga

Teuduek bak gaki po samlakoe  
Deumpek jinoe su that raya  
Ubak Bangta ka jipeutoe  
Nyan sakti droe Rakna Bangta

Rupa hibat raya leupah  
Lam babah asap meubura  
Rakna Bangta marit pantah  
He meutuah tulong hamba

Naga kaphe kapoh jinoe  
Tulong kamoe ulon raja  
'Oh lheueh tapoh keu noe tawoe  
Tapeutoe bak kuta raja

Naga deungo narit meunan  
Jitheeyoh nyan musoh teuka  
Meurumpok sidroe pahlawan  
Raya badan sabesasa

Rot deh panyang rot noe panyang  
Sabe timangjih bandua  
Hana saho talo meunang  
Beuhe tungang raja naga

Ka jimeulho leungo bumoe  
Sang sijak nyoe teuka geumpa  
Meucron keu deh meucron keu noe  
Hingga sampoe laot raya

Troh u laot han peue peugah  
Jimeureupah han ban peubla  
Han deuh taeu keu noe keu nan  
Meulinteung ngon gunong raya

Dalam gunong kala peusan  
Limpeuen tuan le han tara  
Juahpi that hana lawan  
Bisapi han na saboh sa

Ka jiteubiet dum meuree-ree  
Ka jikajee ateueh naga  
Naga raya hana jithee  
Jilop meuhee lam teulinga

Ban sare troh ka jitamong  
Teuka bingong alo-ala  
Ngon jiseungat han peue tanyong  
Limpeuen gunong sangat bisa

Naga poh droe apoh-apah  
Kayee patah hana reuda  
Naga Bangta sangat payah  
Jieumpah le naga Cina

Naga Bangta yoh nyan mate  
Meugule di lua kuta

Kala peusan jiteubiet le  
'Oh lheueh mate raja naga

Raja Pupot ate rindu  
Ka troh napsu bak jisangka  
Jikheun'dak poh musoh madu  
Meunan laku niet lam dada

Tulong Tuhan Poku Rabbi  
Kumari teuingat sigra  
Neuingat keu ismu alam  
Nyan saktian han saboh sa

Allah hai Po Tuhan Ghani  
Tulong neubri kamoe ham ba  
Neubantu lon he ya Rabbi  
Bek keuji ngon sitree, gata

Gata Tuhan sifeuet Ghani  
Keu lon neubri troh ban pinta  
Bek jeuet 'ayeb lon ngon malee  
Deungon sitree Raja Cina

Beukek lon poh sihe asee  
Peue nyang lagee jipeurupa  
Meunan lakee po samlakoe  
Neupruh jinoe le u lua

Neuingat do'a saboh roe  
Samlakoe banyak bicara  
Naga beudoh lom jigrak droe  
Miseue puroe meulho sigra

Neucok kayee teuma sikrak  
Neusrom jarak neugeulawa  
Teukeudi Po peurintah Allah  
Yoh nyan tiwah naga raja

Naga meulho laot ceukoe  
Naga yo droe ie meubura  
That jitakot hana bagoe  
Han tom puroe dilee nyang ka

Phon beungoh kon jimeupake  
Teuma mate sihe naga  
Bandum rakyat mangat ate  
'Oh ka han le naga raja

Sideh mate dalam laot  
Raja Pupot han le haba  
Sang-sang bangoh ka teumakot  
Han sapeue jeuet jipeurupa

Rakyat Bangta mangat ate  
Geuhei sare dalam kuta  
Tulong Tuhan Rabbon Kade  
Han ek sihe dipeudaya

Naga Bangta yoh nyan jiwoe  
Jipeutoe bak Raja Cina  
Laju jijak bak meuligoe  
Bak teumpat droe po ceulaka

Naga jijak bacut-bacut  
Jimeung hirup kuta raja  
Rakyat Cina ate kuyut  
Jiplueng ban buet miseue guda

Raja Pupot ka jideumpek  
Su that tarek miseue naga  
Sangat raya su jideumpek  
Uroe tarek ka geurana

Tan le leumah matauroe  
Seupot tuloe glap-gulita  
Reudokpi that han deuh sapeue  
Kilat soseue hana tara

Na siat ka teuka peungeuh  
Neukalon deuh saboh rupa  
Gunong leusoh manyangpi that  
Sampoe had lam awan migas

Asoe gunong dum lat-batat  
Dum jimeung kap manusia

Le that iblih lam nanggroe nyan  
Bandum deumam yo anggeeta

Teudong lingka kuta nanggroe  
Jeuoh ngon toe hana bida  
Peurintah Po Ilahon Hak  
Trok ban kheundak Rakna Bangta

Kareuna that yakin keu Po  
Hana hiro kaphe Cina  
Kaphe Islampi peuneujeuet  
Neu'etikeuet Rakna Bangta

Gaseh Tuhan samporna buet  
Cina kuyut han troh juga  
Ban sare lheueh neusrom kayee  
Laen lagee leumah rupa

Reudok hitam sang boh jambee  
Sret meuree-ree ujeuen raya  
Rakyat Cina meuseue-aboeue  
Jisaṅga peue teuka bala

Na sikeujap lheueh nibak nyan  
Leumah yoh nyan saboh rupa  
Jibeudoh ie raya han ban  
Lam gunong nyan lahe nyata

Gunong manyang taeu apoh  
Bandum luroh ka u donya  
Ureueng Cina yoh nyan kiroh  
Nyoe nyang ka troh ajai teuka

Jikalon ie that meu'u-'u  
Cina Cincu pungo gila  
Nyang hana ngop cit meuligoe  
Gle sinaroe ka binasa

Kala peusan dum sinaroe  
Mate jinoe han ek kira  
Kakeu reuloh gunong hekeumat  
Kaphe laknat sosah raya

'Oh ban gadoh cahya hilam  
Leumah bandrang le u lua  
Teuka peungeuh hana macam  
Gadoh waham Raja Cina

Rakna Bangta ngon tulong Rabbi  
Sakti hana saboh sa  
Nyang di kaphepi ngon sakti  
Kumaripi meunan juga

Teuma jinoe laen macam  
Meuhantam ngon tungkat raya  
Di kaphe ngon tungkat beusoe  
Samlakoe ngon peudeueng lanja

Meukri di jih aneuk bisoe  
Di sinoepi sama juga  
Ban di sinan meunan di sinoe  
Meunan bagoe Rakna Bangta

Bangta meuprang deungon sakti  
Tulong Rabbi han binasa  
Yoh nyan beungeh kaphe 'asi  
Jikap bibi jipet mata

Got that beungeh aneuk badu  
Matajih hu miseue saga  
Sabab han troh ban nyang napsu  
Sigeutu hana meuguna

Jiek laju kaphe asee  
Meuree-ree u lua kuta  
Raja Pupot nyang ek dilee  
Dudoe neuthee Raja Cina

Deungon tungkat jipeunari  
Jimeuheu le Rakna Bangta  
Ho ka gata nyang beurani  
Cuba taci deungon hamba

Mangat kathee ureueng jeungkat  
Nyoel tungkat kacuba rasa

Gantoe ulon bri bu leukat  
Wahe sahbat Rakna Bangta

Tungkat raya jeuet keu ubat  
Tatheun leugat nyak le gata  
Sabab lon bri gata sahbat  
Tanda syarat ka syeedara

Gantoe lon bri nyoer breueh pade  
He Kumari adek hamba  
Meunan jikheun Raja Pupot  
Meusambot deungon suara

Deungon tungkat nibak jaroe  
Narit seungkoe jibeerkata  
Wahe adek Bangta Kumari  
Theun sikali tungkat hamba

Jeuet lon gaseh sayang lon that  
Lon boh tungkat bak keupala  
Ube raya tungkat beusoe  
Tatheun adoe uleh gata

Rakna Bangta teubiet yoh nyan  
Silasiman Silanaga  
Raja Sakdan deelat laman  
Di likot nyan neukek lanja

Bangta Silah Bangta Sawang  
Nyan cut abang Rakna Bangta  
Bak uroe nyan meutunang prang  
Sang meuguncang nanggroe Cina

Nanggroe Cina sang teupeuro  
Prang meuhubo hana tara  
Sang-sang langet ka meutoto  
Surak a-o kiam subra

Tok Labala Datok Meuntroe  
Dum sinaroe ngon lasyeuka  
Ka meusapat bansinaroe  
Geuk jinoe atueh Cina

'Oh meurumpok dua pihak  
Deumpek surak hana reuda  
Raja Pupot ate galak  
Ka jilikak di nap Bangta

Silasiman ka jinari  
Di Kumari sama juga  
Geuprang Cina kaphe 'asi  
Tan beureunti peudeueng seuba

Nyang djি rakyat han peue peugah  
Le that bicah kawom Cina  
Ureueng Cina yoh nyan tiwah  
Surot pantah ka jigisa

Yoh nyan beungeh Raja Pupot  
Taeu jigrop siploh deupa  
Deungon tungkat laju jibet  
Raja Pupot beungeh raya

Ateueh Bangta jimeung peusret  
Jibeuet pantah lagoina  
Rakna Bangta pantah neugrop  
U bumoe sret tungkat raya

Tadeungo su that meuleubub  
Lam bumoe rub na sideupa  
Hana keunong putik rambot  
Tuhan peulupot nibak banya

Lom neuriwang teuma pantah  
Neugrop leupah siploh deupa  
Teuma jikhem le meuhah-hah  
Peue ri di kah kameuseunda

Bak uroe nyoe ingat keudroe  
Kupeataloe meuhad saja  
Jinoe kudrop kah kuikat  
Bah dalam jrat kameuhei ma

Bek antara beusoe kakap  
Bak kee meuhad han kuthee na

Meunan jikheun kaphe suang  
Seuot riang Rakna Bangta

Bek beurakah aneuk jalang  
Nyang ka ceukang han kakira  
Padum na le nyang ka kucang  
Kaphe suang kreueh that jungka

Jinoe ngon kee peukreueh babah  
Kuteumeung plah beukah muka  
Teuntee mate haram jadah  
Poteu Allah han kathee na

Meusidroe han le kukeubah  
Kaingat kah he ceulaka  
Deungon tulong sidroe Allah  
Kueumpah bek jan kahei ma

Poteu Allah han katuri  
Kah kaphe seumbah beurala  
Meunan neukheun bungong keumee  
Kaphe sitree beungeh raya

Yoh nyan beungeh hana lagee  
Jitak meuhee atueuh Bangta  
Hana keunongpi meubacut  
Neugrop meuhuet ban geulawa

Lom jitamah tak sigo treuk  
Ka teusireuk si ceulaka  
'Oh ban reubah ka teusungko  
Yoh nyan tajo Silanaga

Jicok tungkat he teungku e  
Ka meuhambo bak jihila  
Ka jitarek pantah han ban  
Nagasilan sangat teuga

Teugajih that hana lawan  
Lheueh bak tangan tungkat raya  
Silanaga ka na tungkat  
Jipoh leugat Pupot Raja

Raja Pupot jigeuriwat  
Pruh jilumpat siploh deupa  
Yoh nyan jibet sibak bak u  
Jibalu u ateueh Bangta

Silasiman tajo laju  
Jimat bak u ka jihila  
Kong that jimat wahe teungku  
Lom neutajo Rakna Bangta

Kong that jimat hana sakri  
Bangta Kumari lom mat lanja  
Gaduh kuat kaphe 'asi  
Han jitukri ilah daya

Ka lheueh bak u nibak jaro  
Kaphe pindoe beungeh raya  
Silasiman jikheun meunoe  
Bak uroe nyoe kupeufana

Naritpi lheueh nibak babah  
Jidrop pantah laju jiwa  
Yoh nyan taeu jimeureupah  
Hana tiwah sabe padra

Keu deh keu noe hana reubah  
Sabe gagah ureueng dua  
Meucron keu deh meucron keu noe  
Jipo anoe u antara

Silanaga ka jipeutoe  
Bantu adoe sigo dua  
Yoh nyan jimat nibak gaki  
Ka jitadi nibakmuka

Jipohpi that hana sakri  
Bangta Kumari lom ka teuka  
Bangta Sawang tajo lagi  
Geumat gaki jaro ngon pha

Rakna Bangta mat bak ulee  
Ulee lagee lumo raya

Han le meumot kaphe asee  
Nibak abee ka jap muka

Teuma teuka Datok Meuntroe  
Peudeueng di jaroe tajam mata  
Geukoh reukueng kaphe pindoe  
Ka teupipoe sinan fana

Raja Pupot mate lam blang  
Kaphe suang jeungkat raya  
'Oh ban mate nyawong hilang  
Gadoh garang Raja Cina

Raja Cina that meupot-pot  
Yo ngon atot miseue geumpa  
'Oh ban mate Raja Pupot  
Rakyat kalot plueng meutaga

Dalam kuta keu nan jilop  
Laju jitop pinto kuta  
Rakyat Cina han le sidroe  
Teuma uroepi ka sinja

Rakna Bangtapi ka neuwoe  
Ngon sinaroe balatantra  
Rakna Bangta nyang meutuah  
Seun sipatah neumeuhaba

'Oh lheueh mate laknat Allah  
Rakyat dahsyah ate suka  
Bak malam nyan teutap sinan  
Teungoh padan keu prang raya

Bangta marit deungon rakan  
Wahe teelam dum syeedara  
Singoh beungoh taprang dalam  
Tacok intan Rakna Keumala

Peukara nyoe han jeuet lintang  
Mangat rijang tajak gisa  
Bak meuligoe singoh taprang  
Tacok pulang putroe muda

**Meunan neukheun Bangta Kumari**  
Dum beureuhi rakyat Bangta  
Kukuek manok pagi hari  
Cok ngon beude sama rata

Sandang peudeueng ngon geudubang  
Bandum garang bak meungaza  
Ho ka dalem Bangta Sawang  
Peubeudoh prang jinoe sigra

**Meunan narit Bangta seudang**  
Rakyat girang that guranta  
Teuma teubiet laju u blang  
Silasiman Silanaga

**Bangta Silah Bangta Sawang**  
That guransang hana tara  
Datok Meuntroepi beurangkat  
Sapeue pakat Tok Labala

Laen nibak nyan teuma rakyat  
Silaksa peuet ribee neuba  
Teiduek siblah dilee 'oh noe  
Lon hareutoe Raja Cina

Sosahijih that hana bagoe  
Han le adoe nyang peurkasa  
Teuma jikheun narit meunoe  
Tango kamoe he syeedara

Lon jak meuprang bak uroe nyoe  
Bantu kamoe uleh gata  
Maleeku that hana sakri  
Kumari hana soe sangga

Jitueng pulang Putroe Siti  
Bak laku ri kueu rupa  
Lom ngon adoepi ka mate  
'Ayeb keuji jeuheut nama

Di lonpi han kuudep le  
Bahle mate ngon syeedara

Bahle mate jinoe sajan  
Ngon lon tuan sama-sama

Ma'leeku that hana lawan  
Jinoe kuprang Rakna Bangta  
Lon tueng bila Raja Pupot  
He adoe cut tulong hamba

Han lon ingat le u likot  
Han lon surot bahle fana  
Meuna gaseh deungon sayang  
Tabantu prang he syeedara

Tuan putroe bek tapulang  
Meugoh hilang nyawong hamba  
Teuma seuot ueebalang  
Sikalian rakyat nyang na

Tatkala nyan dum jiseuot  
Ban nyang patot po meukuta  
Baranggapeue kamoe ikot  
Adat mawot han le kira

Raja Cina ka jjiem droe  
Hana sapeue le meuhaba  
Teuduek 'oh nan raja pindoe  
Teuma uroepi ka faja

Rakyat Bangta geuheui sare  
Ka geueuk le santeut banja  
Cukop alat tumbak beude  
Bandum ase peudeueng ganja

Keumeung jak poh raja kaphe  
Ka geupuh le geundrang raya  
Canang geundrang geupuh sunggoh  
Su geumuroh lam blang raya

Geuek laju hana piyoh  
Hingga troh bak bineh kuta  
Bangta Silah Bangta Sawang  
Silasiman Silanaga

Datok Meuntroepi that garang  
Bandua ngon Tok Labala  
Bandum rakyat that bit girang  
Tambo geundrang that meutaga

Rakyat Cina yoh nyan kiroh  
Pinto tujoh ka jibuka  
Cok seunapang aneuk jiböh  
Jiteubiet troh u lua kuta

Ka jiteubiet nyang di dalam  
Jiek curam ban boh panta  
Ban meurumpök jimeutak tham  
Sabe agam han peue kira

Di likot nyan wahe sahbat  
Ka jikarat Raja Cina  
Sama-sama deungon rakyat  
Jiek leugat santeut banja

Ban neukalon le samlakoe  
Ka neupautoe tanyong lanja  
Teuma neukheun haba meunoe  
Kadeungo nyoe wahe raja

Meuna gasehteu keu kamoe  
Pulang putroe judo hamba  
Han tapulang ingat keudroe  
Bak uroe nyoe kutueng nyawa

Ban jideungo tuto seungkoe  
Beungeh tuloe Raja Cina  
Teuma jikheun narit meunoe  
Ingar keudroe gata muda

Teugo baroe han kulawan  
Jeuet barangban takeurija  
Bak uroe nyoe han le kuplueng  
Bila kutueng bak kah saja

Adoe ulon kakoh réukueng  
Le that ureueng kapeufaňa

Jaweueb Bangta meunoe neukheun  
Bila katueng hana daya

Han ek ase han peue kakheun  
Dumna keueueng sineuk lada  
Padum na le nyang teubileueng  
Ka seulinteueng mate fana

Cit sabab kah kaphe bajeueng  
Abeh ureueng dum binasa  
Kah uroe nyoe nyawong kutueng  
Bila ureueng nyang ka fana

Ban jideungo meunan geukheun  
Beungeh ban hueng si ceulaka  
Jibet cokma raja sitree  
Jipoh meuhee Rakna Bangta

Tuhan tulong neupeusilee  
Sret bak abee tungkat raya  
Rakna Bangta neugrop lambong  
Neusayong peudeueng bak muka

'Oh ban keunong ka teupanggong  
Meuk meukeupong na ban sua  
Keubai sangat aneuk jalang  
Bulee sikhan han binasa

Bangta Silah ka neulinggang  
Bangta Sawang ka neulila  
Silanaga ka jinari  
Miseue piti plueng bak data

Silasiman ka jilumpat  
Timu Barat miseue guda  
Datok Meuntroe neugrop tanjak  
Ka neukeupak Tok Labala

Cina le that mate rusak  
Sret tangkurak peudeueng suba  
Rakna Bangta he adoe beh  
Meucang sunggoh hana reuda

Silanaga peurab keu nan  
Silasiman sigo dua  
Jitajo le sangat tajam  
Jidrop yoh nyan raja Cina

Rakna Bangta bantu leugat  
Neucok tungkat ka neuhila  
Raia Cina hilang kuat  
Gadoh hayat tinggai donya  
Rakna Bangta that beurani  
Neukap bibi neutop raja  
Mohon tulong ubak Rabbi  
Kaphe 'asi beuek fana.

Neubri kuat ya Tuhanku  
Lon poh madu Raja Cina  
Lheueh neukheun nyan adoe teungku  
Neutop laju teuntang dada

Deungon kreh nyang sangat tajam  
Bangta seudang neutop raja  
'Oh ban keunong kreh meudulang  
Ka irang pruet teubiet sigra

Yoh nyan mate kaphe suang  
Sinan di blang lua kuta  
Ka teugageueng sinan teudu  
Badan sulu miseue naga

Miseue bateueng sinan taeu  
Meujan teungku sang beurala  
Raja paleh han troh napsu  
Jih ka teudu hilang nyawa

Rakna Bangta ate seuu  
Ucap syuko pujo Esa  
'Oh lheueh mate raja sitree  
Neukoh ulee neugeulawa

Sinan teutiek atueh abee  
Baro jithee ureueng Cina

Rakyat Bangta geuhei sare  
'Oh lheueh mate Raja Cina

Ureueng Cina yoh nyan jiplueng  
Keu deh kingkeueng dalam rimba  
Keu deh u gle bandum jiplueng  
Jeuep-jeuep uteuen ngon beuluka

Sabab rajajih hana le  
Tinggai bangke nyan di lúa  
Uteueng nyang plueng han ek peugah  
Uteuen bicah han jikira

Yo that ate han le arwah  
Meuhah-meuhah jiplueng lanja  
Dum meusapat keu deh u gle  
Ureueng kaphe agam dara

Ladom tinggai dalam nanggroe  
Ka jisom droe lam-lam paya  
Nyang ladom lop u dalam krong  
Ngon punggong leumah u lúa

Meunankeu dum peuglah untong  
Lam-lam leusong jisom muka  
Di yup jingki ladom jieh  
Leumah beuteh cit u lúa

Ladom-ladom na sidroe-droe  
Ka jisom droe lingka kuta  
Lam-lam buga jisom ulee  
Lam-lam batee leusong raja

Lam-lam pageue ladom jurong  
Peulheueh untong ureueng Cina  
Kaphe paleh laknat Allah  
Muka juah hana tara

Rakyat Bangta keu nan ka toe  
Ka tanggoe u dalam kuta  
Dumna kaphe jibet jaroe  
Ampon kamoe nibak gata

Rakna Bangta neukheun meunoe  
Bak ureueng nyoe kawom Cina  
Agama Muhammad katem taklok  
Bek kueunsyok kah simua

Cina seuot teuma yoh nyan  
Ban hukoman po meukuta  
Ureueng Cina neupeusyahdat  
Nyang na hayat mantong nyawa

Teuma neukheun lom sipatah  
Neupeugah bak ureueng Cina  
Bek lupa agama Islam  
Gaseh Tuhan akan gata

Bek le tinggai agama Nabi  
Tuhan Ghani nyang that kaya  
Bekle 'ajab seumbah patong  
Page tutong lam nuraka

Taibadat Tuhan tulong  
Dudoe geusurung lam syeuruga  
Dalam nekmat Tuhan neubri  
Bek meuungki Nabi kita

Nyoe he Cina lon peuingat  
Nyoe amanat bek talupa  
Nyoe lom laen ulon peugah  
Jak peusiblah mayet dumna

Jak tatanom bandum bagah  
Meunan titah Rakna Bangta  
Ban jideungo meunjan titah  
Teubiet pantah dalam kuta

Jijak pileh mayet rakan  
Jiba kandran deungan guda  
Abeh bandum ka meusapat  
Tanom leugat dum sineuna

Rakna Bangta lon riwayat  
Tamong leugat dalam kuta

Teuma neuek u meuligoe  
Bak peutoe laju neuhala

Ban neukalon tuan putroe  
Sang geumaneo ro ie mata  
Din Syarifah Putroe Lason  
Ka meuhimpon keu nan sama

Geucok peutoe ka geuseuon  
Geupeutren dalam istana  
Peutoe kaca yoh nyan teuhah  
Teubiet pantah putroe muda

Ban lheueh teubiet putroe indah  
Jijak seumbah Rakna Bangta  
Putroe bae jikheun meunoe  
Ampon kamoe po meukuta

Jeh 'oh lawet ulon keu noe  
Tan siuroe lon keulua  
Han tom jiweh raja pindoe  
Ateueh peutoe sang meurua

Meunan jikheun putroe indah  
Din Syarifah ka teurtawa  
Nibak ate sang beurakah  
Ban jipeugah bukon seunda

Kareuna sifeuet ureueng binoe  
Baranggasoe han troh juga  
Ek binasa iman dum nyoe  
Na treuk sinoe ka trep lama

Sabet meunan 'oh tapike  
Bak bace peue takheun paya  
Meunan teusawo Din Syarifat  
Hana leumah nyan u lua

Teuduek 'oh nan saboh ulah  
Nyoe lon kisah Rakna Bangta  
Geucok rampasan that barollah  
Meuh mirah intan meutia

Raja Cina kaya limpah  
Han ek peugat le that areuta  
Bandum ureueng kaya sudah  
Geurampah areuta raja

Padun-padun meuh nyang mirah  
Ngon meutuah Rakna Bangta  
Laen nibak nyan dum alat prang  
Beude meuriam cokma ganja

Han ek peugah le that macam  
Peukakah prang le that rupa  
Bandum rakyat ate seuu  
Peue nyang napsu dum ka ek na

Peue nyang suka geucok laju  
Rakyat seuu ate suka  
Jeuetkeu dumnan lon kheun laku  
Maklum teungku dum sineuna

Beuriueh deungon Beuracan  
Meunasah Blang rab simpang lhee  
Padum lawet teutap sinan  
Geuwoe yoh nyan dum meuree-ree

Dum geupeuwoe ngon rampasan  
Ate girang bandum teuntee  
Sira geuwoe meupeurasan  
Peh bunyian macam lagee

Yup napiri tambo beundrang  
Panton deundang alah hai kee  
Bandum rakyat ate seuu  
Ka troh napsu he pangulee

Rakyat le that wahe teungku  
Bandum seuu hana lagee  
Sira geujak meu'en tangkeh  
Pura eh-eh saboh lagee

Bandum ureueng ate puleh  
Ka talo jeh kaphe sitree

**Raja-raja uleebalang**  
**Bangta seudang puleh malee**

Hana apon geuwoe bak prang  
Pulang bintang nyang mangat bee  
Rakna Bangta hana malang  
Tulong Tuhan puleh ulee

Cok geusong putroe seudang  
Rakyat linggang meuribee-ribbee  
Nyang me usong lingka-lingka  
He syeedara aduen sampee

Bandum galak ate suka  
Meugura-gura peugot lagee  
Geupreh keunong got kutika  
Di kuala piyoh dilee

Teuma marit Rakna Bangta  
Bak lasyeuka dum neubri thee  
Peukeumah droe sikalian  
Taek sampan bak uroe lhee

Meunan neukheun Bangta seudang  
Sukaan rakyat meuribee  
Peukeumah droe teuma sigra  
Peukong ija geusok bajee

Na lhee uroe sinan lama  
Di kulala piyoh dilee  
Bak lhee uroe geuek bahtra  
Rakna Bangta nyang boh lagee

Bak watee nyan got kutika  
Meunan Bangta ka neubri thee  
Hingga teuma he syeedara  
Geuek sigra ka troh watee

Geuek lam kapai dum sinaroe  
Maseng adoe kapai dilee  
Mangat ate hana bagoe  
Kheundak jak woe dum u juree

Tarek saoh buka layeue  
Angenpi kheue reumbang watee  
Kapai raja nyang jak dj keue  
Laen laju lom meuree-ree

Kapai jijak jroh meuikot  
Dalam laot dum jikajee  
Angenpi got laju jipot  
Bahtra ngon bhot plueng meuree-ree

Bandum rakyat that beureuhi  
Peuwoe Siti nyang mangat bee  
Di bidok pantah jilari  
Bhot api pantah jikajee

Uroe malam tan beureunty  
Kapai lari jroh meuteuntee  
Geupuh tambo yup napiri  
Suleng bangsi le that lagee

Bandum rakyat ate seuu  
Bungka laju woe meuree-ree  
Angen reumbang jipot laju  
Kapai lalu alah hai kee

Di gurap tajam ban gaseng  
Di banteng meuanggok ulee  
Taew jijak sapeng-sapeng  
Meuandreng meudilee-dilee

Padum lawet bungka sunggoh  
Lam angen mboh jeuep-jeuep watee  
Uroe malam hana piyoh  
Hingga ka troh teumpat teuntee

Troh bak nanggroe puteh leusoh  
Beude geucuh dum geubri thee  
Ureueng nanggroe yoh nyan kiroh  
Peue jeh ka troh bala dilee

Kadang ka lom teuka musoh  
Beude jicoh that meuree-ree

Ureueng inong nyang that kiroh  
Alah hai beh ho kuplueng kee

Teuma seuot agam utoh  
Peue nyang kiroh kajak ngon kee  
Bahle kuba kah u lampoh  
Tapiyoh bak jambo teubee

Peue kapeugah rimueng pajoh  
Agam biyoh kon lakoe kee  
Meunan-meunankeu dum riyoh  
Han ek lon boh le that lagee

Teuma ladom jiplueng ka troh  
U Baroh jijak peuteuntee  
'Oh ban jieu ka woe raja  
Ate suka hana lagee

Ureueng nanggroe troh le teuka  
Tuha muda dum meuree-ree  
U kuala kapai ka troh  
Geulhom saoh teuma dilee

U darat laju geuteungoh  
Han tatu'oh laksa ribee  
Ureueng nanggroe troh meuron-ron  
Jijak kunjong bungong keumee

Ladom jime u meulason  
Ladom seuon ngon boh kayee  
Jak eu putroe woe di Cina  
Rakna Keumala nyang mangat bee

Din Syarifah Putroe Lason  
Bandum jitren jak meuteumee  
Aneuk keujruen ngon bentara  
Nyang peutua maseng sukee

Dum meuron-ron agam dara  
U kuala dum jikajee  
Putroe mantong di kuala  
Rakyat teuka ka meuribee

Teuduek siat saboh ulah  
Din Syarifah lon peuteuntee  
Ubak Bangta ka neupeugah  
Din Syarifah nyang mangat bee

Wahe adek Bangta Kumari  
Idin tabri jinoe keu kee  
U nanggroe kamoe keumbali  
Idin tabri he pangulee

Meunan narit Din Syarifah  
Seuot pantah bungong keumee  
He teumuda nyang meutuah  
Pakon bagah le neukajee

Piyoh cutda dilee sinoe  
Teuma dudoe woe u juree  
Din Syarifah kheun lom meunoe  
Wahe adoe kadeungo kee

Lon woe siat cit u nanggroe  
Teuma dudoe ban patot mee  
Deungon rakyat dum sinaroe  
Bahle lon woe siat dilee

Sabab ka trep cre di nanggroe  
Kadang soe-soe nyang ka padee  
Meunan jikheun sinyak putroe  
Idin jinoe laju teuntee

Din Syarifah laju bungka  
Bungong jeumpa nyang mangat bee  
Deungon rakyat balatantra  
Nyang na neuba masa dilee

Bangta Sawang Din Syarifah  
Ate dahsyah woe u juree  
Di likot nyanyan Bangta Silah  
Deungon syeekah laksa ribee

Deungon Cut Nyak Putroe Lason  
Ka meuron-ron woe u juree

Bandum bungka woe u gampong  
Bungong sukon nyang mangat bee

Silasiman Silanaga  
Bandua ka woe meuteuntee  
Bandum abeh geujak gisa  
Kapai bahtra laju kajee

Kapai jijak dalam laot  
Jroh meuikot taeu lagee  
Uroe malam angen bapot  
Kapai ngon bhot laju kajee

Padum lawet geubeurangkat  
Sampoe hajat wahe sampee  
Hingga ka troh maseng teumpat  
Ban nyang babat teumpat dilee

Hana sapeue teuka mara  
Sijahtra sampoe u juree  
Ureueng nyang woe 'oh nan teutap  
Bangta deelat lon peuteuntee

Rakna Bangta neuwoe leugat  
Ngon cut ubat nyang mangat bee  
Rakyat ireng dum sinaroe  
Bangta neuwoe troh u juree

Teutap sinan di meuligoe  
Tuan putroe ngon pangulee  
Rakyat teuka jeuoh ngon toe  
Kunjong putroe nyang mangat bee

Nanggroe Cina baro neuwoe  
Ureueng nanggroe troh meuree-ree  
Sajan jiba bungong jaroe  
U meataloe pisang teubee

Maseng-maseng ban kada droe  
Sepkeu 'oh noe lon kheun lagee  
Rakna Bangta nyang analan  
Teutap sinan dalam juree

Mat keurajeuen di Hindustan  
Sukaan rakyat meuribee  
Hukom ade po meukuta  
Ureueng teuka dum meuree-ree

Bandum rakyat ate suka  
Sabab raja ade teuntee  
Uleebalang ngon peutua  
Ate suka ngieng pangulee

Lagi ade hana tara  
Han meuriba hukom teuntee  
Rakna Bangta sajan po cut  
Rukuk sujud geunap watee

Rakna Keumala duek lam khaluet  
Sinan po cut dalam juree  
Dalam nanggroe seunang raya  
Nyan raja badai pangulee

Nanggroe makmu hana tara  
Sabab raja ade teuntee  
Ngon boh kayee le di cong bak  
Putik masak wahe sampee

Rakyat nanggroe ate galak  
Meulak-ibak dum boh kayee  
Deungon pade got that lam blang  
Dua gantang nam gunca lhee

Lagi ujeuen kayem datang  
Dum tanaman got meuteuntee  
Nyang meujudi dalam nanggroe  
Dum neusuedoe nibak ulee

Nyang pancuri yue koh jaroe  
Wahe adoe tinggai singkee  
Nyang meureubot neuyue tupang  
Sideh di blang pula kayee

Buet nyang karot got neularang  
Uleebalang bayek lagee

Nyang meudina neuyue bunoh  
Dalam tanoh neuyue seubee

Ureueng nanggroe yue ibadat  
Peubuet taat jeuep-jeuep watee  
Jroh that hukom samlakoe cut  
Barangpeue buet that meuteuntee

Aneuk miet dum neuyue jak beuet  
Neuyue tuntut dum eleumee  
Tuha muda yue meununțut  
Bek geuruleuet peugot asee

Hukom kreueh that samlakoe cut  
Sigala buet jroh meuteuntee  
Hukom ade sidek sasat  
Han tom rakyat keunong tipee

Aman nanggroe Timu Barat  
Bandum rakyat han le ratee  
Hana sapeue le reuen-mareuen  
Jroh ngon mideuen hana lagee

Raja ngon putroe that sapeue kheun  
Han tom siseun ṭango ratee  
Teutap Bangta mat keurajeuen  
Cahya buleuen dalam juree

Teuka reudok jitoh ujeuen  
Kameng jiplueng dum meuree-ree  
'Oh noe abeh kisah lon kheun  
Haba Jameun masa dilee

Kakeu abeh wahe aduen  
Apa keumuen wareh sampee  
Pat nyang salah leubeh kureueng  
Harah kingkeueng han got lagee

Lom nyang karot han jeuet takheun  
Nyan bandum meuah lon lakee.  
Sabab ulon eleumee kureueng  
Hana maklum lagi dungee

Di lampoh geupula gamat  
Ubat mangat puleh luka  
Rakna Bangta haba mangat  
'Ohnoe tamat abeh haba

Di sinan ladom amanat  
Beutaingat he syeedara  
Nyaŋ jeuet tatueng keu 'ibarat  
Taikat takue bak ija

Rab Gampong Blang Gampong Blang Cut  
Ngon Deyah Krueit cit meubanja

Ulon sambong ujung bacut  
Bek meukeuteut putoh haba

Kadang-kadang na meukeusùd  
Cuba tabeuet lhee peuet banja  
Lon keumarang hana that jeuet  
Nyoe bacut keu gura-gura

Teupin pukat rab Buangan  
U Timu nyan nan Lueng Bimba  
Nyoe lon peugah po karangan  
Tango kaman po areuta

Teutapi malee lon seubot nan  
Lon peugah nyan gampong saja  
Gampong di lon wahe rakan  
Geukheun nan Meusijid Tuha

Pulo Lhok Ngapi geukheun nan  
Rumoh sinan lon syeedara  
Nan Mukim Meureudu Dalam  
Keucamatan Meureudu Neugara

Di leuen rumoh cit na jalan  
Rot nan rakan jak u banda  
Han that jarak deungon peukan  
Sinan teelan rumoh tangga

Nyan ka abeh ulon peutrang  
Jampang-jampang jeuet neuteuka

Hijo-hijo tawo reuhat  
Nyang hijo that tawo buga

Ulon peugot nyeo hikayat  
Keu 'ibarat soe nyang baca  
Jampang taduek baranggapat  
Beuet hikayat keu gura-gura

Ate sosah puleh siat  
Haba mangat peunghibur duka  
Puteh-puteh bungong jambee  
Nyang mangat bee minyeuk ata

Meuna galak tajak lakee  
Tame teubee ngon u muda  
Meuhana nyan wahe sampee  
Laen lagee tame nuga

Meukon meunan bek talakee  
Kadang malee sret suara  
Meunyo ka na tame gantoe  
Jeuet tapeuwoe peue nyang suka

Meunyo gadoh wahe adoe  
Tagantoe bayeue hareuga  
'Oh ka tamat beutapeuwoe  
Baranggasoe he syeedara

Sabab payah lon he adoe  
Malam uroe lon meujaga  
Tajak u blang pot bungong crot  
Pileh nyang got boh lam ija

Beutasayang ureueng peugot  
Beutaseutot ho nyang jiba  
Jak u pasi pot beuramoe  
Tapeuwoe pasoe lam raga

Sepkeu 'oh noe lon hareutoe  
Haba rampoe sikrak dua  
Ateueh ulee lon grak jaroe  
Meuah kamoe he syeedara

Kadang na roh tuto seungkoe  
Bek meupaloe jeuet keu deesya  
Lon lakee meuah angkat jaroe  
Bak barangsoe nyang na baca

Dan nyang deungo dum sinaroe  
Keu kamoe peumeuah sigra  
Bukon sayang seuke pulot  
Got lagot buleuen puasa

Tamat surat lon that potlot  
Daweuet lon top keubah bak meja

T A M M A T

KIRAKALI NGTA KUMARI 2

Ramli Hartini

Perpustakaan  
Jenderal Ke

899.

RA

h



PN BALAI PUSTAKA — JAKARTA

